

書叢本基學國

集 城 彭

(上)

撰 攷 劉



行發館書印務商





由國家圖書館數位化、典藏

84
59
v
彭城集目錄

卷一

賦十首

卷二

賦五首

卷三

五言古詩六十五首

卷四

五言古詩七十五首

卷五

五言古詩六十首

卷六

五言古詩四十七首

卷七

彭城集目錄



007939

彭城集 目錄

七言古詩五十五首

卷八

七言古詩五十首

卷九

五言律詩八十八首

卷十

五言律詩八十六首

卷十一

五言律詩九十二首

卷十二

五言律詩一百七首

卷十三

七言律詩八十一首

卷十四

七言律詩八十一首



卷十五

七言律詩九十二首

卷十六

五言長律五十九首

卷十七

七言長律十首

五言絕句三十四首

卷十八

七言絕句一百三十六首

卷十九

制誥五十六首

卷二十

制誥五十九首

卷二十一

制誥六十九首

卷二十二

彭城集 目錄

彭城集 目錄

制誥六十三首

卷二十三

制誥六十首

卷二十四

奏疏十七首

卷二十五

表二十一首

卷二十六

表二十首

卷二十七

書十一首

卷二十八

啓二十五首

卷二十九

啓二十八首



卷三十

啓二十九首

卷三十一

啓三十三首

卷三十二

記十二首

卷三十三

論七首

卷三十四

序五首

卷三十五

行狀一首

卷三十六

神道碑一首

卷三十七

墓表二首

說一首

行狀二首

墓誌銘六首

卷三十八

墓誌銘六首

卷三十九

墓誌銘八首

卷四十

雜著二十七首

臣等謹案彭城集四十卷。宋劉敞撰。敞字貢父。號公非。與兄敞同登慶歷六年進士第。官至中書舍人。事蹟具宋史本傳。史稱敞未冠。通五經。博覽羣書。沈作喆寓簡亦曰。國朝六經之學。自賈文元倡之。而原父兄弟爲最高。司馬光修資治通鑑。自辟所屬。極天下之選。而任史記前後漢書者。敞也。其知兗亳二州。以不能奉行新法。黜監衡州鹽倉。哲宗初。起知襄州。入爲秘書少監。錢勰草制。極稱其詞藝。其後以直龍圖閣。出知蔡州。孫覺、胡宗愈、蘇軾、范百祿交薦之。言敞博記能文章。政事侔古循吏。身兼數器。守道不回。乃召拜中書舍人。蘇軾草制。稱其能讀典墳邱索之書。習知漢魏晉唐之故。其歿也。曾鞏祭文有曰。彊學博敏。超絕一世。肇自載籍。孔墨百氏。太史所錄。俚聞野記。延及荒外。陰陽鬼神。細大萬殊。一載以身。下至律令。老吏所疑。故事舊章。盈廷不知。有問于子。歸如得師。直貫傍

穿水決矢飛。一時書林衆俊並馳。滿堂賢豪。視子塵揮云云。蓋一時廷評士論。莫不共推。卽朱子于元祐諸人。自洛黨以外。多所不滿。而語錄云。貢父文字。工于摹倣。學公羊儀禮。亦復稱之。豈非攷學問博洽。詞章奧雅。有不可遏抑者乎。史載所著諸書。有文集五十卷。五代春秋十五卷。內傳國語二十卷。經史新義七卷。東漢刊誤四卷。詩話二卷。漢官儀三卷。芍藥譜三卷。今所存者。自詩話以外。惟東漢刊誤。散附北監本後漢書中。未見孤行之本。芍藥譜亦僅而不亡。文集則宋史藝文志。文獻通考。俱作六十卷。明文淵閣書目。有彭城集十五冊。不列卷數。今所傳三劉文集。僅有公非集一卷。凡詩四首。文二十三篇。蓋掇拾于散佚之餘。多所闕漏。卽宋文鑑所選者。且不盡載。其他可知。至以劉顏之輔弼名對序誤屬之。攷舛繆尤屬顯然。殊不足據。今檢永樂大典所載篇章尙富。蓋卽據彭城集收入。謹掇拾排比。釐爲四十卷。較之原書。所少不過十之一二。與新編其兄倣公是集。鉅製鴻裁。舊觀幾復。在北宋諸家中。可謂超軼二孔。而憑陵兩宋者矣。乾隆四十七年十月恭校上。

總纂官內閣學士臣紀昀

光祿寺卿臣陸錫熊

纂修官翰林院編修臣周永年



彭城集卷一

賦

宋 劉 攽 撰

鴻慶宮三聖殿賦 并序

〔案〕此賦見宋文。與永樂大典原本。互有差訛。今校改。

臣伏見陛下追述祖考崇奉明祀新作三聖殿以昭孝明功於天下臣以文學中第太常試官祕書目覩盛事不敢以鄙薄自絀輒作古賦一篇以歌詠盛德昔靈光景福之作世稱其美麗然其所謂狀大不出雕刻畫績文彩之煌煌而已又盛道工人之巧民力之衆材木之多金玉之偉臣以謂王者有作則必智者獻其巧壯者輸其力山林不敢愛其材府庫之聚皆所供億也是物理之常不足以夸大臣愚竊陋之若夫天命廢興之際聖王授受之符非敏智通達未有能究知其始終者固難爲寡見淺聞者道也臣竊大之是以略所陋而張所大不敢仰希風人雅頌之列庶幾有其志云爾蓋上帝之所以選建明聖命以天位者乃所以享德而報功焉未有德盛於前功播於後而其子孫寂寥千載無聲者也賢哲所談六籍之云德莫著於有虞功莫隆於五臣禹平水土夏姒以家司徒后稷是教是食肇商興周歷載數百皋陶大理五刑以明於其苗裔乃興於唐若夫董淳耀以攸司奏庶民之鮮食

焚山烈澤。害服妖息。鳥獸咸若。草木允殖。固伯益之力焉。天報以位。俾秦周繼。於其子孫。誣祖不紹。去火卽水。叛禮尙刑法。以慘急。然猶兼六國。一天下。而不知變於初二世。以斃。非天不相朕。虞之後。乃其否德。得罪於祖。而斷棄也。惟伯益之功。未報。是以大命復集於趙氏焉。五代喪德。九土分裂。海水橫流。民用墊溺。鳥獸昌熾。黔首失職。滔滔惑惑。蓋若洪流之未闢。於是太祖乘火而帝。繼益之功。天胙吉土。曰惟商丘。是爲星火。大辰之居。亦曰明堂。布政之由。出潛離隱。或躍在淵。以有九有。百度正焉。削禍戡亂。出民塗炭。風揮日舒。天地正觀。荆燕吳蜀。楚越梁冀。懾威懷仁。奔走失氣。崛強者執服。柔從者加賜。太宗承之。眞宗成之。登封降禪。矢直砥平。巍巍乎邈三五。而儔儷。彼漢魏之瑣瑣。曾何比京。夫伯益始掌火。而底績茂。宋以火帝。興于火墟。天之報施。豈不昭昭。可推而類也哉。且夫積功以凝命。而創業。因物以胙土。由土以建號。樂以反初。禮不忘其本。是故作於原廟。建之別都。三聖鼎列。大廈以居。以答景貺。以昭成功。俾子孫知厥所由。億兆仰德。而不窮也。厥後烈風雲雨。電雷震曜。儆戒於下。濫炎流燒。天子忱于大異。反己正德。伏念七年。乃其有得。曰天以德訓予。而以威震予。依類託諭。予敢不信。夫政不變。不足以日新。禮不修。不足以化民。天之示人。若曰政禮之敝。雖祖宗之爲。猶當勿憚乎改更。於是詔三事。飭九卿。和布揆於舊政。載損載益。以承天誠。以舉聖職。夫旣天行。而日白矣。乃復闕宮。獎夫神衷。三后在天。對越上穹。經之營之。不日成之。閎偉奇麗。所以使宮寢之勿踰也。清閒宵密。又鬼神之所都也。絜百圍而置楹兮。度千仞以架棟。擇一木於萬章兮。願餘羨者。猶衆。般倕。饒人之儔。獻巧而林立兮。莫不心競而賈用。互長廊其如城兮。闕

重門其似洞。欒栱粲其如星兮。侏儒屹其承重。如翬斯飛。如鳥斯革兮。誠可慄其將動。闔陰房之密靜兮。雖六月其必寒。闢陽榮之敞麗兮。蓋中夜而已旦。涉廣除而徑上兮。每百盡而一級。歷青珉之瑩滑兮。曾不得而側立。顧風雨之在下兮。足以避夫燥濕。良非人力之所爲兮。宜鬼神之攸集。於是使夫設色之工。後素之巧。想象形容。圖寫必效。夫其龍顏日角。天質之顛昂兮。臣乃今知真人之異表。於是駕鑾輅。登玉蚪。千乘萬騎。雲動而景附兮。想平生之豫游。旂常繽紛以旄翕兮。鐘鼓軒轟。簫管發而啁啾。雜魚龍之奇技兮。蜿蜒曼延於道周。百神紛而並迎兮。出闔闔而御夫龍舟。爾乃川后靜波。屏翳息風。舳艫相銜。若複道之延屬兮。互千里而相通。百工備官而夙設兮。棹夫謹呼而奏功。惟吉行之五十兮。餘日力而靡窮。既屆既止。威儀若初。以幸夫壽宮。乃卽前楹。以修祀事。威神如在。望之可畏。殫金玉以備用。罄飛潛以薦味。帷帳筦簟之安肆。几杖筆研之儲侍。靡一物之蓋闕兮。所以廣孝思而盡心志也。守臣侍祠。罔不勝飾。既事而旋。闕而莫覲。列仙之儒。偃佺之倫。迎神頌祇於其側。若夫祝融重黎。相土闕伯。固已喜動乎魄。情見乎色。護清蹕而睇盛德也。巍巍大哉。不可得而記已。且夫天命之不忘。人主之大寶也。祖宗之有繼。子孫之勿替也。茲聖王所以正統垂業。超商邁周。卹嗣錫羨。貽厥孫謀。使萬有千歲。得以睇風而承流也。遂作頌曰。

崇崇商丘。大火主兮。曰宋之興。道是配兮。建邦設都。以有九土兮。有皇上帝。明德輔兮。伯益之功。邈不可忘兮。三聖承承。有烈光夸。奕奕寢廟。神翱翔兮。胥千萬年。尙無疆兮。

葺所居賦并序

治平三年秋京師大雨。涌水出。民舍多墊壞者。予所居獨完整無恙。及雨止。加葺其垣牆。因爲小賦。蹟至理之茫昧兮。同寓形于一區。任所遇之則然兮。夫孰賢而孰愚。彼每正而或禍兮。亦用拙而自如。雖背阪而向隍兮。將愈乎廣廈之宴居。歲荒落之淫雨兮。涌雖出而爲災。汨波流之罔極兮。浩潺湲而無涯。棟梁圯而弗支兮。堂壇蕩而爲溪。何昔日之高明兮。今直委而汙泥。彼攜持之與抱負兮。或耄耄之與孩。嬰念獨不保其闔廬兮。亦有朱戶之亡其閉闔。將鬼瞰之使然兮。固天理平其不平也。愧予居之僻陋兮。豈擇處而淹留。四鄰聳而逋逃兮。恨衆人之我尤。福莫大於無過兮。顧舍此其何求。葺垣牆而圻墁兮。其托喻以監予。曰全生之近道兮。念無厭其所居云耳。

寫憂賦

悲四序之驟失兮。哀逝者之不復。春與秋其幾何兮。霜與露其相續。稚呱呱而旣食兮。墓積草而已宿。追音聲而在耳兮。悼容色而記目。願一見而無期兮。情可殺而逾毒。徵圖書於疑似兮。索夢魂於因想。雖可得其髣髴兮。嗟暫覲而復往。盼黃鵠之怨別兮。余猶恠其單飛。雉朝雊而泄泄兮。牧犢子感而陳詩。心鬱悒而怊悵兮。何使予懷之不夷。昔聞道於賢者兮。雖忘而未信。謂生爲勞役兮。謂死爲歸人。今吾百憂之叢中兮。旣積月而累辰。何重負之如是兮。願脫去而奚因。彼冥然而無知兮。獨甘寢於巨室。天地覆墜之不聞兮。諒絕世而愉逸。伊聖言之可徵兮。悼吾學之不競。不窺隙於未兆兮。顧飲藥而加病。遂迷塗而不

反兮。非智士之能竟。排多慮而去妄兮。引至理而自鏡。雖既往之不追兮。庶來今之能定。

不寐賦

惓鬱悒其馮中兮。何鑒寐其弗夷。方永夜之未艾兮。廓靜處而長思。悼既往之弗及兮。慨來今之曷知。緒將絕而復續兮。精發越而淫移。倏四海其再撫兮。泯萬期乎須臾。武勝殷而歸周兮。天保定其千億。叔且兼乎三王兮。仰勤思而有獲。孔潛精於好學兮。致憤懣於無益。樂好善而用魯兮。孟見喜乎顏色。仁弗遇於衛頃兮。願奮飛而不得。繫視氛而見祥兮。獻肇謀乎虞虢。彼遠慮之與近思兮。智與愚皆從其職。良民生之多艱兮。嗟以心爲形役。君子有不安其命兮。小民有不度其力。非蚊虻之嚙膚兮。曾內懷於大棘。惟昔夢之蘧蘧兮。旣悵然而獨寤。亮伐柯之不遠兮。何內韞而采固。睇聖人之大覺兮。緜萬世而不遇。幸曲肱而自怡兮。度無迷於初度。

鬪蟻賦

邈乾覆而坤載兮。固悠遠而無極。叢萬族於厥中兮。旣生生而息息。雖至大之可倪兮。猶至精之可識。諒擅己而自用兮。羌是非之增積。嗟子駒兮。何爲諡公字小兮。紛紛而離離。好惡利害之發兮。誰其尸之。憑怒積怨兮。交戰而在斯。何矜很之若是兮。怙勢凌弱之不移。欲一究其端而不得兮。聊索數而推之。夫其列壤分國。穴垤重襲。碩鼠之所不容兮。蟬螿不可以徑入。豈天壤之偏隘兮。曾分土之汲汲。化飯以爲子兮。祝腐以爲民。其生孔易兮。其衆實殷。夫其子孫千億兮。固鮮愛而靡親。又豈有珠玉皮幣兮。肇乎禍亂。

之因。若是則鬪其可已。羣嬉散游。足以已矣。奪微篡寡。何足美矣。豈樹之君。而患亂甫起。抑天之有時兮。故將雨而不能自止也。嗟子兮。汝獨何誅。觀世之有關兮。曾何足以爾殊。饜他人之有兮。慊己之無。妄劫於無用兮。矜多於有餘。一己之不保兮。顧有志於九區。夫豈無大人之旁觀兮。諡之陋而名之愚也。嗚呼。

秋懷賦

世量力以爲智兮。孰不自師其成心。不強短以被修兮。亦各濟其所任。蓋周任之明清兮。予嘗服於德音。性專直其似愚兮。遂底滯而廢沈。惟古人有不遇兮。亦奚慨於斯今。昔旣冠而從仕兮。冀陳力而帥職。何日月之不淹兮。蹙蹙至乎不惑。世與我豈其異衷兮。增余懷之默默。數廢日而倍參兮。願自竭而安得。將奔而及事兮。愧初心而變色。譬游者之無術兮。念愈躁而愈沒。荷衆賢之并容兮。曾介善之不遺。辱與廉之末舉兮。遂以造夫攸司。君之門不可以徑入兮。旣待詔而歷時。唯褊心之狷狹兮。樂繩墨其自持。誠詭遇其猶獲兮。雖得獸而恥之。信天命之有在兮。非智勇其孰勿疑。時旣秋而涼風兮。草木落而變衰。日月麗於西廂兮。蟋蟀迅而鳴悲。閱四序之代謝兮。旣逝者之如斯。悼我心之弗獲兮。起惆悵而稱詩。

射豹賦

悲抗獨之難立兮。何有用之必害。不信孚於弗爭兮。雖忘懷其獲罪。齒恆足以自保兮。而隕奪於多輩。彼南山之珍獸。喻變化於君子。或隱霧而不食。亦胥疏而視履。猛毅資於天成。文彩蔚乎自己。伊麋鹿之強圉。與麇麇之儼儼。雖騰越其不羈。固指掌之所昧。何衆吠之狎狎兮。羌朋很而曹戾。競張目而涎吻兮。衆

遮道而覲伺。諒勇怯之不敵兮。非乃心之攸畏。忽機辟之潛發兮。遂解脰而喪精。爪牙曾不得而少用兮。貽獫狁之成名。吾固知夫皮毛之爲患兮。而黨與之足懲。嗟物類之相召兮。必機數之潛用。非明哲之周萬兮。未有不墮於衆。故曰。刳心去智。萬人不謀。和光同塵。乃與道俱。彼形謀而成光。與飾慧以矜愚。材愈大而增累。雖微末而可圖。

崆峒山賦 并序

臨汝西有崆峒山。其下卽廣成澤。按莊子。黃帝聞廣成子居于崆峒之上。故往見之。莊子雖多寓言。無實然。此崆峒廣成。適皆同處。意其真有所謂廣成子者也。又大隗居具茨之山。黃帝至襄城之野而迷。皆與崆峒相近。事未必皆虛也。予因作崆峒山賦。

馳平原之曠曠兮。登隱弁之高丘。林蓁蓁而雲茂兮。樹參天以相繆。鳥哀矜而思侶兮。獸銜草而羣遊。卽崆峒之舊址兮。訪成子之所留。烏乎。服天下之爲至美兮。夫豈知聖人之緒餘。獨修身爲妙本兮。窈靜默以玄虛。何軒轅之徇齊兮。而猶特室白茅。三月而閒居。順下風而稽首兮。曾南首而晏如。彼非至人不能以下人兮。信崇高之叵娛。謂莊生之寓言兮。羌林麓其未改。瞻具茨之髣髴兮。知大隗之所在。嘗迷道於襄野兮。七聖偕而無悔。得要道於牧馬兮。稱天師而再拜。悲世俗之狹隘兮。疑至言於否壘。航污瀆之淺狹兮。僭瀛海之浮匯。守竊奧之熒燭兮。昧白日之輝曬。追古人之不可及兮。獨臨風而悲慨。彼六相之輔治兮。曷四海而弗寧。名百物而垂衣裳兮。雲門用而告成。尙紆思於荒澤兮。勉聞道於長生。豈在野之不

可蔽兮。固前修之所營。眇抽思而成章兮。庶來今而作程。

碁賦

惟夫太樸之未判兮。圓方渾而無際。倏物生而有象兮。迺置同而立異。迨數起而滋滋兮。紛萬彙而多事。此弈碁之始置器也。於是乎經緯縱橫。封畛遠邇。包穹昊之度數兮。極厚地之疆理。局有上於方罫兮。信宇宙之異此。念巧歷所不能究兮。茲古今所以甘心而不已也。咨白黑之相反兮。譬寒暑之進退。寧我盈而彼虛兮。況生殺之與成敗。智詐殺然而並用兮。莫不矜多而務大。有一言可以行之者兮。惟見幾而得先。衆蚩蚩而我隨兮。乃收功於萬全。伊昧者之弗察兮。雖服膺而拳拳。暨應變而赴敵兮。常操末而真顯。或敗形已兆。力鬪未悟。忽焉顛仆兮。乃悔其辨之晚暮。與覆車以同軌兮。孰若易轍而遵路。或狃快小利。死生契闊。雖得雋於錙銖兮。而外勢其已奪。或決機兩陣。閒不容思。彼多算其泰然兮。既先據於便地。謂戡敵而致果兮。顧自戕而隕斃。論茲藝之微眇兮。奄衆技而首出。語之有道兮。用之有術。誠巧拙其天子兮。莫可得而齊一。貴不能得之於賤兮。又況老耆而不屈。太上貴德。服不以力。審布置以陰陽兮。謹裁度於繩墨。故撓之者無抗。詐之者必北。其次狙詐詭爲。奮其祕算。或見易而守難兮。或取近而先遠。雖僥倖而全勝兮。亦蹉跌而事反。靡精心而極意兮。每隨手而應疾。貪彼虛之可乘兮。忘己力之未實。竊冀幸於弗覲兮。故雖獲而逾失。何度量之相越兮。乃倍蓰而十百。甘受責而無辭兮。雖三五而不敵。或騰口而攜詐兮。或匿智而叵測。或同行而習熟兮。或旁觀而少得。或乘勢而亟捷兮。或銜利而加惑。故每譬於用兵。

兮。擅廟略於籌畫。必知己而知彼兮。保常勝而有獲。

詆風穴賦

背崧右洛兮。維汝泱泱。左界韓鄭兮。前關魯陽。陵丘曼延兮。土膏脉良。生植遂茂兮。厥天且長。咨飄風兮。胡很而狂。乘冬肆威兮。怒號以常。通晝互夕兮。日月奪光。宇宙昏惑兮。顛倒玄黃。折枝排根兮。松桂毀傷。衝空動樞兮。披戶登堂。獸亡其曹兮。鴻鵠失翔。問誰尸之兮。底此不祥。曰茲穴之詭異兮。竊神之機。幽嶮窮奇兮。狹中不夷。鼓舞蜚廉兮。招搖南箕。平居無事兮。淫樂而爾爲。歷九州而遐觀兮。孰樂土其若此。獨蠻夷之僻陋兮。乃自古記之矣。邈炎州之荒忽兮。汨大海其千里。上霧下潦兮。墊隘瘴癘。魍魅羣遊兮。樂人之死。蓄爲颶風兮。癘毒疵癘。扶濤駕山兮。舟航糜毀。歷日旋時兮。然後得已。西極曠蕩兮。陰積無垠。流沙不波兮。瀚海無泉。五穀不生兮。蓬棘蓁蓁。熱風之來兮。天地翳昏。觸肥爲瘡兮。四肢若燔。亦幸有老聃之先知兮。嗚呼而告言歸。命野獸兮。厪焉得存。彼鬼方之幽昧兮。固宜以然。慨中土之與鄰兮。不僻不偏。胡穴神之忍兮。固蔽以頑。用夏變夷兮。至于髦蠻。外百里而不同兮。茲邑獨爲匪民。帝之高居兮。臨照在下。虎豹服仁兮。九關莫阻。巫咸上愬兮。帝命斯許。巨靈夸娥兮。幹其絕膂。拔山投石兮。北海之渚。大野夷爽兮。八風攸敍。號令專一兮。莫予或侮。蒙常聖時兮。維民所取。穴神雖悔兮。夫孰閔汝。



彭城集卷二

賦〔案〕敬序公是集。以律賦列之外集。今略做其意。故以律賦列第二卷。

臯陶戒舜在知人賦

惟舜德所以大聖。非自爲其與人而同者。蓋擇善而從之。執兩端而用其中。志存樂取。見一行而莫之禦。衆豈遐遺。緬思古人。實惟虞氏。審萬物之備我。體至人之無己。蓋夫慮善以動。則自用者小焉。與人同功。而任事者貴矣。察言好問。但見其聞斯行之。明目達聰。孰有夫怨乎不以。若乃耕稼以力。陶漁是親。試諸難而興事。納于麓以明民。然後謳歌之所屬。歷數之暨身。曷注措之天若。奚持循之口新。夫何爲哉。徒正面而恭己。弗可及己。常稽衆以從人。且夫羣於人者。物莫能離。同於善者。德有常主。故我總萬彙以兼載。人自一言而汎取。克協于帝。是以謂之重華。尙論其人。斯弗忘於稽古。譬夫山嶽之高也。其積以細。江海之大也。其受以虛。蓋與其足己而弗及。夫孰若忘懷而有餘。求福不回。顧明德之若此。樂告以道。靡寸長之失於。然則一心之所謀。其智也淺。一力之所濟。其功也鮮。故道莫貴于因衆以寧。德莫大乎與人爲善。不然者。安得側微在下。九男順而服從。登庸受終。五臣與而不顯。大矣哉。不震不盈。不伐不矜。肆昊天之

眷命實億姓之與能。是以妣氏承風。聞昌言而亟拜。子淵希德。聆介善而服膺。世之人行己也專。改過而吝。以出衆兮爲可任。以遜志兮爲必信。然後知善與人同。巍巍乎其斯以爲舜。

五星同色賦

德配淳古。祥開上天。五星之色同矣。四海之民晏然。驗以璣衡。察齊輝於七政。偃夫金革。啓昌運於千年。眇觀乾文。俯稽皇國。伊天事之常象。何聖人之合德。時也。懷柔乎窮髮之北。服叛乎流沙之域。人迹所及。萬寓於焉。太寧和氣致祥。五緯由之齊色。觀夫寥寥太清。垂文降精。靈臺考象而有舊。保章啓占而可明。遠而望焉。若連珠之並彩。陳其數也。告緜區之偃兵。且夫仁義修則金木爲之興祥。禮智用則水火由之凝祐。羞五事者莫若信。載四象者莫如土。倬彼天明。粲然物覩。候其色兮若一。問其名兮有五。克明克類。喻王道之無偏。不縮不盈。狀君德之周普。是以海內蒙福。羣生大同。鞶囊之令丕顯。稼穡之事從隆。豈特候於建星。當太初之定歷。聚于東井。告漢祖之成功。非皇求于列星。惟星依于帝者。非星私於我皇。惟皇化于天下。赫赫垂象。巍巍純嘏。察其軌道。黎民仰首以觀乎。眩彼交光。疇人推策而知也。甚矣哉。天之鑒人也。明於視。德之逆祥也。捷於馨。何精禋之哲哲。顧神化之冥冥。彼候以非烟。紀輪困於雲瑞。占於半月。驗光華於景星。語象則幽微。推數則疎遠。豈若考五精之同色。知七兵之盡偃。方將升中而告成功。視大道之來反。

不愧屋漏賦 以君子慎微心無所媿爲韻

噫。治身莫若慎獨。求仁在乎表微。故屋漏之不媿。則君子其庶幾。誠而明之。雖戶白之甚邇。禮無違者。豈顏厚以蒙譏。考垂訓於前經。達嘉猷於載記。謂夫仁也。非顛沛之可捨。道也。非須臾之能離。故中庸之爲善。欲內外之同致。然而十目所視。惟愚夫知其不欺。一室之間。獨至人。可以無媿。斯蓋擇善圖遠。閉邪慮深。非曰鬼神之處。儼如師保之臨。仰瞻西北之隅。曾微物覩。內省光明之德。罔憾余心。且夫資之深者。處之安。爲之難者。行之慎。故不爲顯晦以殊節。出處而易信。達黃中之理。常祇若以存誠。念陽厭之方。豈儻焉而終吝。衆謂之微。以其弗見。世謂之隱。以其弗聞。蹈先覺而秉哲。無慙德而集勳。邇之足以治下。遠焉可以事君。謹爾燕居。自獲申申之樂。仰夫匪隱。罔貽負負之文。向若識謝鄰幾。仁亡由己。昧知非乎伯玉。違好學於顏子。則雖志深媚奧。寧足追於多慙。名或升堂。亦深虞於可恥。是知觀大者莫若小。責有者始於無。則善惡不能以理奪。賢愚不可以智誣。美子思之著書。誠爲治本。稽衛后之興刺。彼實迷途。異哉。閩奧之間。尋墨之所。猶內深乎戒惕。而外齊其居處。則夫朝廷鄉黨之中。復何虞乎失步。

雕蟲小技壯夫不爲賦

古人之賦。詞約而旨暢。今人之賦。理弱而文壯。原屈宋而瀰漫。下卿雲而流宕。豈所謂言勝則道微。華盛而實喪者哉。觀夫緯白經綠。叩商命宮。以富艷而爲主。以瀏亮而爲工。家自以爲游二南之域。人自以爲得三代之風。差之毫釐。譬無異於畫虎。得其糟粕。殆有甚於雕蟲。亦猶樂府之有鄭衛。女工之有紈綺。悅目順意。蕩心駭耳。里人詠嘆。其繁聲。婦女咨嗟。其絕技。亦何足薦之宗廟。獻之君子哉。若乃託興禽鳥。致

情芻蕘。上則恢張乎宮室。下則吟詠其笙簫。且子虛大人之文。無益於諷諫。靈光景福之作。不出乎斲雕。故白玉不毀。珪璋安取。六義不散。體物何有。夫殘樸爲器者。匠氏之罪。判詩爲賦者。詞人之咎。亦奚足以計得失。辯能否也。是以子雲以無益而自悔。枚臯以類得而詆謔。故曰童子之功。壯夫不爲。且使孔氏用賦。仲尼刪詩。則賈誼升堂而不讓。相如入室而不辭。然無益於王道。終見譴於聖師。豈非君子務其廣大。世人競乎微小。故爲學者衆。好真者少。非龍變乎詩書之林。曷蟬蛻乎塵埃之表。必若明敦厚之術。閑淫麗之塗。言必合乎雅頌。道必通乎典謨。亦可謂登高能賦。宜爲天子大夫。

敵弓賦

昔桃弧棘矢。成周所以服荆楚。楛箭石弩。明王所以來東夷。伊敵弓之在御。亦厥貢之同歸。想夫極北窮髮。千里無草。殺氣之門。回復植物於焉凋槁。風霜凜乎無期。冰霰積而皓皓。非剛強不能以自存。故有生而必老。粵有喬枚。是惟陽幹。託巖谷而挺本。擢雲霓而上冠。理堅厚而密緻。根槃深而交貫。鷹隼晨擊於其傍。熊虎暮嘯於其畔。伊猛毅之攸司。雖採擇而可憚。爾乃落以斤斧。附其膠漆。弭切象以潔白。簫飾樺而柄鬱。錯良金於拊中。績鹿斯之殊質。豈旣弛而不張。諒有直而必屈。乏繭絲之爲絙。乃裂革而加裘。雖樸質而可喜。得漢巧之十一。矧夫俗本射獵。士習縱送。騁良驥而夸勇。腰敢矢而備用。馳突乎荆棘之林。藺轢乎羶兕之衆。擇肉而後發。先得而命中。皮毛爲之寢處。滋味得以衆共。莫不興利而除害。便己而自奉也。豈比夫繁弱之爲分器。大屈之爲寔好。顏高之堅。和氏之寶。載厥美於史冊。歷千古而擅巧。亮萬俗

之異便。吾安得較美而定客好。有系而稱曰。懷柔以禮。羈縻以德。遠人是以來賓。大弓爲其貢職。向使威武不競乎金革。文告不行乎邦域。是弓也。足資乎凶器。彼人也。孰匪其敵國。





彭城集卷三

五言古詩

擬古六首

南轅適郢都。日與冥山背。重生與徇名。夙昔不相待。藜藿采薇蕨。芰製蘭爲佩。遊樂天地間。安知一身外。
麒麟鬪大荒。日食星見沫。夷齊餓西山。咨嗟爾胡罪。
澤陂生芙蕖。映此蒲與荷。彼美不可逢。憂心涕滂沱。行樂在及時。株林起酣歌。歡宴未渠央。國門擁干戈。
巫臣視不悟。室家嬰禍羅。謀己旣不忠。孰能爲君多。
趙王飛龍駕。翱翔狃天關。塵土暫反顧。金玉高如山。自喻固適志。超遙亡愧顏。安知馬服子。軍破不得還。
前亡四十萬。後復圍邯鄲。虛盈固天理。循環乃無端。覺寐已不殊。何況百歲間。嗟嗟道傍子。萬金非所安。
秦昭登西山。慕與火帝游。頽林刊喬木。詔世爲博籌。富貴良未厭。夸謾豈知尤。投龜詬蒼蒼。楚靈輕九州。
塗窮乾谿旁。衆散不可留。徘徊餓山澤。覺失涓人疇。新王固有命。玉衣被纍囚。
嵯峨三神山。浩蕩仙聖游。金臺冠絕景。玉果垂千秋。龍伯日已侵。巨鼈幸無憂。波濤各一隅。但見雲氣浮。

跋予望可及。隱約清淺流。大帆交問津。長風輒回舟。不怨道路遠。所悲到無由。世主自甘心。仙者非有求。老萊隱窮楚。因與時世隔。暮歸怪車轍。夜起避山澤。若人不可見。況肯低顏色。安知叢臺下。一旦三千客。西邊竟不還。嗟哉少良畫。

讀黃寺丞十月十三日寄原甫詩因同作

寒日流短明。涼風起秋色。嗷嗷鴈晨翔。悄悄蛩夜織。節物悲旅人。天地亦行客。心事已如翁。但知頭未白。黃公青雲氣。疇昔振六翮。成紀獨不侯。長沙嘗遠謫。賣瓜青門外。種豆南山側。浩歌寫窮愁。我預聞損益。外事來無涯。開口笑不得。惟當林下遊。相存度阡陌。

續董子溫詠陶潛詩八首

佳魚樂潛深。智鳥不遠飛。達人避形役。逝與風波辭。逍遙彭澤下。聊然三逕資。好酒豈恹情。讀書不求解。天真任自我。淳白忘機械。鼎鼎世上名。百年竟何賴。嘉樹每交蔭。時鳥初變聲。欣然環堵居。自覺軒冕輕。予亦葛天民。千歲同此情。馬隊待賢士。久知喧且卑。周生自晚悟。徂謝仍響隨。豈若田畝間。尊酒時賦詩。時命昔大謬。賢傑同隱淪。陶公晉卿族。晚節恥屈身。躬耕抱羸疾。嗟哉畎畝勤。道術既分裂。人人得其偏。丹青照千載。始覺真檢全。爾時揚仁風。到今猶慄然。貴生未必全。徇名良自賊。區中共茲患。形影相與惑。神釋乃超然。道真於此得。

藍輿適山野。葛巾傲賓客。既無軒冕拘。詎可形骸索。富貴能畏人。千秋但慙色。

偶作

時命有通塞。百齡皆謂然。流行自非我。底滯亦在天。人知信百齡。陰定不可遷。苟云有所繫。朝旦猶億年。天地無窮期。百齡未爲繇。朝旦不可期。人事皆具前。所以賢達人。放心無所懸。萬塗以一究。會理寧復偏。六月淮水深。南風阻歸船。客行厭滯淫。親朋限長川。至言莫與聞。達理誰爲詮。無以謝羈愁。聊作言命篇。

效白公詩

不得起厭心。厭便住不得。不得作戀想。戀卽去不適。厭生憎疾業。對面爲怨賊。戀結貪著因。轉腳落沈惑。上士禮自然。知慧金剛力。中人勤埽除。補闕塞瑕隙。行莫到門返。饑莫看人食。欲驗齊死生。且覩居官職。默坐念逝者。身存至頭白。起行觀病者。身健有餘力。出門視勞者。身閒免事役。入鄉閱貧者。身足飽衣食。寓形天地間。幸已不失職。奈何不自休。汲汲復戚戚。大鵬彌九區。轉動恐偏窄。鷦鷯巢一枝。隨意翻羽翼。馳光無停留。駟馬方過隙。君看北邙山。貴賤一真宅。

效韋蘇州古調詩

於人無舊新。相見常爲歡。本不作崖岸。中亦非斷剗。賓僚自了事。縣邑無曠官。豈惟競勉力。退亦絕聞言。觀者以爲稀。不自知其然。吾聞西方說。夙世常有緣。將此會中人。厚德無讎怨。文人諱異術。且以儒事論。孔聖不可及。孟氏固所尊。軻云創業易。成功則在天。乃知古今士。無有能與賢。達人同衆人。不肯妄自尊。

古意

牛刀割雞雞未足爲深恥。奈何狐父戈。資以斲牛矢。魯人稱家丘。會計當而已。郢匠不揮斤。其質久已死。秉心若松柏。潔志如雪霜。松柏摧爲薪。雪霜晞春陽。乃知丈夫勇。萬物無以方。賜兮不受命。棖也安得剛。

雜詩

重生世所同。徇利良獨愚。嗟彼緯蕭子。安事千金珠。沈身九重淵。脫死驪龍胡。得失覺寐間。危哉悲矣夫。九方焉知祥。梱也終奚如。雖同國君倉。乃在渠公衢。餒也命使然。顏原亦多娛。

荆山有奇璞。貴乃和氏儔。連城詎云多。一視以爲優。攜挈向都市。光彩傾天球。雖無指瑕累。願得千金售。驚詫遽自反。閉匿成千秋。豈忘待時意。欲往仍遲留。凡目陋至寶。後生異前修。蒼蠅矧多變。珉石仍先收。萬一人我欺。永爲神物羞。

樊遲請學稼。尼父已深愠。安知連城守。權酤殿最問。周公無彝酒。用是垂大訓。願得烹弘羊。耕織始安分。龍伯釣鼈時。連六方自快。事緣貪餌起。上帝獨何罪。土疆日侵削。形軀仍眚殺。纒餘數十丈。尙足令人駭。寄言諍畢人。努力事機械。何當大荒野。與爾競行邁。

齊有梁丘據。晉有樂王鮒。據能愛晏嬰。鮒欲殘叔譽。二臣嬖兩朝。事君爲悅豫。豈有尙賢志。據逆以爲助。平失宥善心。鮒乃速其去。毋以據爲賢。易地則同趣。丈夫處世間。必有遇不遇。豈無覺者乎。正色君亦悟。區區嬖幸徒。何忍就朋附。

伯夷餓首陽。太公封營丘。同時海濱人。將老歸西周。世故莽難量。後王異前修。徒讓千乘邦。不如畜陰謀。良知命分然。何怨復何尤。塵埃采薇詩。益使夸者羞。自茲姦雄人。日日希公侯。虛舟適誰迂。飄瓦殊暫然。伎心自無怨。豈必絕世賢。握火欲提人。唾空不至天。一心抱區區。萬事長可憐。佚女處瑤臺。豐肌豔皎皎。端令鳩爲媒。告我以不好。猶豫令人悲。自悔辯不早。如何問雄鳩。佻巧豈可道。野人構茅茨。櫟柱樗作棟。不意豫章材。一時同見送。拓手百尺長。連軫萬鈞重。斤斧欲安施。棄置因無用。本是絕世姿。胡爲與衆共。臧孫被惡名。魯侯失其位。軒冕非不尊。家富馬千駟。不用子家羈。而棄柳下惠。末儀諒何爲。矧論仁與智。竊位良足羞。乃復爲君諡。

雜興

阿嬈年八十。睢盱事粧飾。仍夸少年日。自謂美無敵。與子不同時。寥落復異域。人事雖萬殊。近者猶可測。顏顏與白頭。何日好顏色。

讀李某詩〔案〕題爲讀李某詩。而詩止敘李某之事。疑有脫誤。

李某崆峒人。生長西北蕃。赤鬢如蝟毛。僅能爲漢言。筋力勇自負。馬上帶兩鞵。作賊十數年。身有百刃痕。泳河不用舟。羊革隨輕軒。危厄輒自脫。天幸尙得存。過壯忽自悔。翻然歸漢恩。徙家汾水陽。百口蒙輕溫。拜官隨立功。蛾列上閣門。封侯未可量。專城誰復論。已見狄將軍。堂堂樞府尊。由來功名際。鷓鴣勝皇鶴。

富貴百惡除。詎問鉗黥髡。豈與詩書士。履繩不敢奔。終身蹈薄冰。衆口猶喧喧。

王四十處見舅氏所錄外祖與日本國僧詩并此僧詩書作五言

滄波浩無涯。泱泱際朝日。安知鮫魚淵。而有邑居室。便風送來颿。夙昔多人物。始信天地間。見聞豈云悉。惆悵蓬萊說。胡爲浪自黜。夷倭與侏離。九譯迷彷彿。書問顧已同。紙墨存落筆。俛仰六十年。舉指不任屈。好事見君家。聞詩初未失。杜鄴富小學。平通知祖述。鄙老獨何能。執書幾涕出。

偶題

旦出輒暮歸。終年長役役。自顧若有營。誰言了無益。少小不如人。老大轉衰僻。昏忘復相仍。十事不一憶。勞心非所長。但覺安坐食。使我忍媿羞。不如學勞力。勞力當自耕。自耕還自織。百畝爲己憂。雖憂乃易釋。

喜雨和任判官奉呈太守（原註）先是司天臺上四月朔日食。及是大雨不見。

愆陽歷冬序。入春光赤。原野爲之焦。無復青青麥。明廷卹農功。詔旨懷愍惻。誰能共此憂。惟良二千石。禱祠遍羣望。百神潛率職。迅雷出深淵。密雲會將夕。應龍不無神。女媧罪所極。滂沱浹宇宙。變化纔瞬息。矧茲顛穹意。豈獨垂沛澤。嘗聽君平言。以茲消薄蝕。周宣成陽事。往往在簡籍。不聞二美具。介福逾萬億。三農耒耜出。自此豐黍稷。使君憑熊軒。勸耕駐阡陌。上客歌吉祥。清文綴環壁。我豈擊壤翁。不能知帝力。斐然遂成章。聊用同悅懌。

贈周員外鼎

束髮去鄉里。白首還舊邱。曾無高蓋車。願爲夸者羞。歲晏東皋田。躬耕方薄收。知君近有道。足以無外求。
次韻和王平甫贈張舍人（原註）王時在城東佛舍讀書。將應舉。張與呂推官過之。

通物樂自任。濟時常後安。戢翼思迅風。騰鱗慕驚瀾。天書進廉良。大罟綱目寬。頃來中林士。繼踵青雲端。
王侯經緯氣。錦繡羅肺肝。念當五鼎食。肯甘一瓢箪。

著書成揣摩。脫劍橫鏌干。孟明已焚舟。廉頗方據鞍。閉門謝塵軌。釜魚朝未殮。竟完稽古力。已使同學歎。
鳳池響鳴珮。芸閣峨高冠。忘年義已深。踵門情更歡。縱談劇流輶。處畫逾轉丸。廣廷來風清。落日微雨殘。
泉爲濯涼漑。佳樹聊盤桓。長歌爛篇軸。大盟粲珠盤。寧爲端木子。矜此道旁觀。

閱雨

山上田萬頃。江中水千里。東流自瀾漫。旱苗日焦死。惜哉不能救。地勢正如此。雲雷未興潛。蛟龍困泥滓。
昭回雖在天。歎息真已矣。

君子行

君子貴自然。不爲時俗觀。升車不廣欬。卽席不變顏。疾驅不踈轡。高張不急彈。塵埃視流俗。中立何可干。
顏生處陋巷。求仁得所安。簞食一瓢飲。孔聖推其賢。

雨中

丹桂更束薪。白壁償斗粟。況茲風雨朝。泥潦壞牆屋。敗竈方生魚。并日能薄粥。始知簞瓢人。陋巷本自足。

寧見子桑詩。若歌復若哭。

游景靈宮

漢家祈年宮。玉宇黃金塔。回廊起層城。高閣橫蒼崖。觚稜拂星斗。廣除霽塵霾。清渠寒泉交。盛夏涼風潛。火雲赤宇宙。道塗若燔柴。幸茲清涼遊。復此朋友偕。前殿朝衆靈。瑄玉茲禋柴。顧予塵土姿。進拜增慄齋。掃庭有餘潔。酌水欣素懷。並坐俯堅珉。長吟翳高槐。丹青四壁畫。權輿自軒媧。千年羽化人。志怪非齊諧。始知慕神仙。自顧輕形骸。聖賢幾吹呖。寒暑一病疔。學道賴遠復。養生知有涯。悟真覺理勝。適志忘事乖。伯陽推谷神。莊叟稱安排。英風摩蓋壤。遺躅欣吾儕。飛雲肆冥鴻。拘井嗤沈蛙。虛心自茲得。歸去顏色佳。

惠州豐湖

昔在葛稚川。求爲勾漏令。丹砂頗易得。羅浮聚仙聖。窮荒非人情。適己自無競。千歲若須臾。斯人已遼復。忽聞惠州守。修舊有佳政。漲泉作豐湖。百頃湛明鏡。芰荷爭秀發。魚鳥恣潛泳。新疇日已多。耕者樂其盛。高齋面空闊。寫影窮綠淨。長嘯來清風。炎蒸亦無病。勤憂本劭農。爽豁賴怡性。寧須學神仙。豈必謝朝請。明珠還合浦。夙昔人相慶。君有近郭田。足繼甘棠詠。

柘湖

南海浮柘山。嘗試問水濱。桑海變未久。婉變茲爲神。昔聞仇池穴。上有牛女津。物理寧可窮。空驚舟楫人。東關山水

青鸞望不極。連峰如置關。不知清溪水。漾漾出其間。孟夏江水深。溪清正西還。崖根亂石多。散激聲潺潺。雜樹色相映。密竹不可刪。造幽覽衆妙。撫事清心顏。洄洑自多魚。網罟羅前灣。幽人閉上方。繚逕纔可攀。疇昔新安江。寤寐龍門山。目擊暫有遇。絕勝猶班班。客程非趨時。淹泊寧所艱。少留盡餘興。更伴浮雲閒。

坐嘯亭納涼

長嘯振林木。半空鸞鶴聲。清風蘋未來。孤月海上生。坐久物色改。如有神仙迎。

束芻

束芻食騏驥。斗水活蛟龍。轅下雖可哀。泥蟠未必窮。解驥就衢路。借龍起雷風。寥寥四海廣。去矣君安從。題常寧黃令灑然堂

叔度萬頃陂。清濁誰能料。割雞用牛刀。吾亦寄一笑。示我林下詩。筆力勇奔峭。故知才者心。玩好必同調。岑岑青玉竿。千百壯非少。清風掃埃塵。日影金色照。環墀發寒泉。霜劍初脫鞘。枕流不枕石。俯仰窮聽眺。上堂梵唄聲。空寂總衆妙。茲亦忘言徒。領理會其要。翔禽竟來集。狐猿遠相嘯。不作問鵬翁。刻意湘纍弔。

十月一日

十月西北風。肅肅天雨霜。節物感人多。客子心內傷。心傷鬢髮變。引領望故鄉。故鄉多喬木。丘壘生白楊。柏葉自宜翠。草根今已黃。旦思歸陽陂。暮憶栖後岡。況此佳辰朝。都邑事有常。平明重城開。車馬如飛翔。貴賤同一丘。蒿艾連石羊。慟哭朔風悲。一豁沉痛腸。奈何守微祿。局促限一方。墮官固非孝。捧檄固已狂。

黽俛聊自抑。涕流浩沾裳。

吹臺

梁王遊賞地。喬木空白雲。無復歌吹響。況乃麋鹿羣。梵刹擬化出。山河如綺分。北望十二衢。佳氣正網緼。賢者而後樂。固如孟軻云。感此多遠懷。因之濯塵紛。聞君已先我。攜手皆能文。置酒臨滄流。披牕遡南薰。由來登此臺。寂寞誰獨聞。慷慨作歌詩。悵然哀古人。千載豈不遼。忽如波沄沄。適意正在飲。無爲惜酣醺。

送歐陽永叔留守南都

白水帝舊里。大火天明堂。王都異豐鎬。原廟崇高光。畢命繼三后。商邑正四方。保釐自古貴。僉曰朝論昌。前旌烏隼旗。左佩麒麟章。阨途亂鏡吹。先路交壺漿。風物盛山東。令人憶游梁。緬然嚴鄒徒。賦筆嘗慨慷。廢池掃清冷。舊苑開荒涼。終留相如坐。一伴鳧鴈翔。

竹牀

炎光裂厚地。江漢如燔湯。閉戶樂甘寢。婉孌在一牀。問我何獨爾。愛此編竹光。側身照琬琰。熱手循雪霜。有時萬里夢。倏往浮湖湘。遂令傲軒冕。彌日慵下堂。昔聞負暄老。意欲夸天王。我亦悲世人。觸熱趨道傍。

南窗詩

習靜覺自逸。養恬遂忘儉。始知一席安。不比千乘忝。微風觸喬木。清氣襲珍簟。心空物莫喧。神超夢無檢。簞瓢敢望回。絃歌欣與點。彼哉晉楚富。吾道安用慊。

抱書南窗下。日午天光亮。陰陰夏木長。翩翩巢禽鬯。因之省疎慢。亦喜就閒曠。散帙寄忘懷。曲肱從所向。臨文眩今古。撫事雜歡悵。勞形竟何爲。有心得非妄。釋卷忽自娛。收視已神放。遠從華胥遊。卻立鈞天上。萬緣條皆空。至樂了無狀。悲哉俗學徒。頭白迷歸向。

登慈佛寺〔原註〕宋大師造。號宋芒兒者。

清溪淺褰裳。嘉樹大盈抱。古寺向百年。地幽景杳好。連峯拱蒼翠。秋雨洗穹昊。客至登高樓。西風動衰草。雄豪昔未遇。飮粥殆將老。豈知風雲期。草昧及天造。杖筮城下邑。傾困載金寶。良知積困約。固不慰枯槁。銘勳久猶存。餘烈漫浩浩。空餘祇樹園。常此伊蒲禱。階除稍蕪沒。梁棟乍傾倒。顧覽爲徘徊。物化那能道。

築室種樹

築室非我鄉。種樹非我廬。未嘗三年淹。勞力豈不虛。遠嘉叔孫子。去故情若初。此意人不知。嗟哉賢大夫。

和王絢道贈高七植竹

人言植物中。唯竹類有德。虚心道所存。外勁禮自飾。風霜不改陰。一何金玉色。丘澤無變根。還如古人直。繁花豈無實。所待鷓鴣食。卑枝亦可栖。不許鴟鵂息。爲君裁管籥。於此諧金石。爲君度短長。於此齊尋尺。〔原註〕律歷志。十丈爲引。用竹爲之。濟川倚巨楫。扶老杖輕策。大厦莞簟安。射侯弓矢力。乃知天材美。固待君子識。飽聞崑崙秀。盛說瀟湘碧。豈曰生不遷。念當厚封植。惟君傲聲利。心遠地更僻。擇交獨此君。開逕如三益。清風共忘言。明月爲莫逆。還當掃塵榻。會待遺名客。

涉伊水宿寶應寺

日夕車馬煩。路絕臨清伊。雲光與水色。極望相逶迤。飲馬清冷泉。涼風吹人衣。白石可歷數。遊魚仍俯窺。淺瀨乍褰裳。榜舟亦遲遲。古木號亂蟬。白鳥時獨飛。上方兩高閣。向水雙朱扉。迢迢際煙霞。安得青雲梯。暝投中峯宿。四山凝夕霏。鐘鳴衆禽寂。孤燈明翠微。

彈鳥

夷羿射赤日。霍然落天衢。獨成萬世名。皆曰摧九烏。偃仄慨時俗。臂射妨四禺。誰能鷁鷁間。計校死與枯。孰謂黨頻頻。莫黑相爲徒。何用知雌雄。攫肉爭謹呼。控弦非百鈞。投丸匪明珠。棄捐不俟時。詎比墉隼誅。矯翼似知機。回空如改圖。但使庭戶清。何必殘爾軀。念無網羅禍。寧當怨除驅。吾廬正深沈。嘉木多桐梧。萋萋映朝陽。會待鸞鷁鷁。

雪中退朝與諸同舍登祕閣

密雪晦空曲。天作白玉京。都城百萬家。漠漠浮雲生。束帶聽鳴鷄。謁帝開承明。脫身塵埃外。自覺肌骨輕。歸從諸仙子。笑語來蓬瀛。仰望策府高。天祿鬱崢嶸。步登雲蜺表。俯視朝日晴。寒門杳無涯。珠宮聯五城。珍木皆後凋。冥鴻亦同聲。還因閭闔風。共此夷曠情。

清漣閣

平湖侵危臺。天水相近入。縈迴古嶼間。空闊衆境集。大邦屏東南。開府記百十。勝遊雖日來。面勢忍遺葺。

能聲紹豈弟。敏政常暇給。喜聞棟梁新。甫見規模立。橫空眩藻麗。構迴愁藥炭。居然心意會。似匪人謀及。草樹亦增華。神明非舊習。青凝夕霏翠。冷激迴風濕。去鳥指暝飛。潛鱗視幽蟄。達生貴夷曠。外物辭妄執。泉壤正欣然。蒼波仍可挹。雖云吏隱最。世復登賢急。徒使棠樹詩。千秋意相襲。

歲寒谷

高松含悲風。綠竹帶凝雪。碧落翻怒濤。深崖墮寒月。蕭條非人境。合沓隱城闕。爽氣露草木。精神立毛髮。初無隱居迹。似爲吾人發。世事誰得捐。相從理營窟。長松過千尺。好餘萬丈材。上有積雪翻。下有清風來。四時景常好。六月凍不開。何事吹燕律。獨令陽氣迴。

過開元寺

晨霜聳喬木。初日明廣庭。俯巢鳥鵲馴。步逕莓苔青。卽心百慮擾。造境衆獨醒。安禪到無悶。看畫匝已經。梵音騰潮波。幡影垂流星。天花雨貝葉。帝樂飄鳴鈴。勝緣此邂逅。法界俱清冷。世喧暫回首。但覺塵冥冥。

久旱

山城帶嵩高。常候嵩高雲。雲興似焚柴。雨注如翻盆。田萊數百里。下澤猶平原。雖有耕鑿勤。不如霖霖恩。哀此民生微。所賴芻狗仁。乃知丘陵外。獨有五岳尊。今春苦淫霖。宿麥纔廬存。過夏乃不雨。窮秋氣如燔。象龍杳無藝。巫鼓空屢奔。豆苗落爲蕪。藜莠乘冬溫。黔首困粒食。或有茹草根。賣牛供租賦。不忍聞此言。此事亦神羞。誰能叫其闈。登高望連峯。正見朝煙昏。



彭城集卷四

五言古詩

寄題漢中三亭〔原註〕時伯父守漢中

梁山屏西南。漢水相縈帶。古惟千騎居。今亦一都會。守邦多偉人。按節森大旆。治聲我家貧。能事斯亭最。蒼峰上盤雲。清川近瀉瀨。隅分地俱勝。鼎構勢爭大。扶危新棟梁。增舊加粉繪。功成人不勞。事得文無害。長塗擁行輶。高宴羅羽蓋。開筵攬錦繡。勸客喧竽籟。陪遊慙望回。請賦嗟自鄙。安得凌風翰。徑厲褒斜外。

養生

世自不乏我。我亦安慕時。形骸與軒冕。冉冉相背馳。守約道可學。戰勝心自知。雖無一朝樂。亦免終身悲。

崑山

茲山本無玉。而有崑丘名。若人東南秀。遂馳終古聲。藍田亦若初。荆山高不傾。嗟嗟九原骨。千年不重生。

正月四日燕飲江氏

獻歲發春陽。青煒煥城邑。羣公三朝暇。冠蓋如雲集。主人高陽老。〔原註〕江氏北人。饌客素豐給。開門陳

壺觴從使來者入。春盤具柔蔬。香稻進玉粒。高談劇傾波。縱飲甚啜汁。戰碁效軍實。度曲儷風什。歡窮疊空。願惜馳景急。東風卷初雨。泱泱天地濕。震雷動龍蛇。稍復離幽蟄。而我獨何爲。無聞既三十。人生行樂爾。身外非所及。

五行王相詩

長生不我欺。幼學每自堅。沐浴蕙蘭芳。呼吸朝霞鮮。冠帶謁紫皇。左右賓列仙。臨官太清上。拜賜玉案前。帝王固陳迹。聖智不足甄。衰容了成稚。白髮倏更玄。病笑留侯晚。妙許成子賢。死者不復作。塵埃殊可憐。墓隧侵人居。海水爲桑田。絕跡自此遠。飄飄周九天。胎化兩珍禽。羽翼爲我先。養志幸有成。眷言慙自然。

自蔡河至陳州

舟行過林樾。密樹相排擠。仰視青冥天。飛鳥猶不移。臨流方浩歎。照水分鬢眉。三十有二毛。中腸默興悲。

除日得王深甫書因寄

除日令休吏。官曹停簿按。深居念馳光。忽忽自興歎。七十稱壽翁。我今已過半。時命豈不知。胡爲此羈宦。況茲山野性。放蕩破崖岸。應接人事間。何時無謗訕。屢誦小雅章。懼爲朋友怨。忽傳故人書。遠道情不問。上言久別離。下有加滄飯。贈我新詩謠。金碧光凌亂。鸞鸞不鍛翮。龍虎謝鞅絆。乃知韞上鷹。不及蒿下鷄。往事那復追。來今猶可諫。終當潁水濱。躬耕爲爾伴。

之官廬州初至儀真寄原甫

家居非不歡。祿仕亦豈急。愧身無所勞。而茲養生給。方剛幸未艾。黽勉冀有立。譴智無遠圖。挈餅庶云及。聖教非一方。吾愚寧妄執。所慙鷓鴣微。不過枝與粒。悠悠我之思。去去異鄉邑。大江浩東流。客悲莽交集。登船眺洲渚。暝色際日入。鬢變誰昔然。悵焉寄茲什。

將之官清水。李廷老來會。探韻得光字。

四十身無聞。忝官省中郎。未嘗學治民。繆假銅墨章。置我所讀書。低心課農桑。況此戎馬間。屬國皆軍羌。隴山一何高。緹羣正相望。聚糧三月過。始厭西路長。故人矜我勞。置酒客滿堂。固知後會艱。慨慷俱畢觴。天弧射狼星。旄頭爛垂光。分我一漢節。繫取穹廬王。

江南曲

江南多芙蓉。水綠看最好。輕舟浮江來。白露秋意早。露白秋已晞。游子行未歸。采香欲誰贈。但見羣鷗飛。鷗飛不避人。思我平生親。當親而返疎。悵望空水濱。

題歐陽永叔新鑿幽谷泉

江南多名山。少有琅琊比。琅琊盛泉石。晚得幽谷美。將非造物者。留以待君子。乃知智且仁。必好山與水。公有高世材。此山共森峙。公有濟物心。此泉共清泚。泉始居地中。隱塞未如此。今爲萬丈流。近自一勺始。東浮滄溟廣。下益松檜喜。奈何公之惠。及更局千里。安得從公居。曲肱偃吾几。安得從公遊。枕石洗吾耳。是非付天壤。塵事如脫屣。當爲谷中叟。肯爲軒冕起。

張六至

君居衆人裏，有如珠玉然。世疑假渾沌，我識真神仙。獨抱瀟灑意，不爲勢利牽。少留衡門下，談笑忘吾年。

題園樹

看花前日雨，吹葉昨來風。羈旅淹留際，年光瞬息中。今朝雪消後，重見樹梢紅。

先泊龜山夜聞後來者

秋鴈去極浦，寒星落遠山。太虛混茫外，羣動有無間。中夜數聲櫂，孤舟何處還。

次韻和蘇子瞻贈王仲素寺丞

龍虎不受羈，鸞鳳不啄泥。仙人雲濤觀，俗子閭巷迷。念昔喜讀書，五車號輕齋。東瞻識津涯，西顧分町畦。博物辨鼯鼠，誦賦嗤雌蜺。軒冕不克求，舌在徒問妻。世事莫相告，慕虛但攀稽。賴有逍遙篇，爾來頗思齊。道真本微眇，至言乃筌蹄。壹氣中夜存，大方剗角圭。勉從赤松子，定有青雲梯。非若朝市門，強力相排擠。晚友王子喬，如得照水犀。因之喻蘇耽，衰暮毋噬臍。緬思灑天柱，雲白風淒淒。築居留四鄰，與子參杖藜。

次韻和原甫登禪智寺上方院二首

訪舊起廢境，賞心如此回。平川似曲沼，崇岡象層臺。前驕經林藪，飛蓋凌崔嵬。漏遲日向永，景照春已來。卽事有餘勝，懷古常興哀。寥落江都宮，壯麗安在哉。方昔盛歡娛，寧知名已頹。一詠宜春賦，悵然爲停盃。夫子信與點，賜也敢望回。遙知成春服，復此登春臺。一水近清淺，衆峰遠崔嵬。林端白雲暝，竹下清風來。

谷深鶯徐轉。川迴鴈仍哀。賓至賦樂胥。觴行詠康哉。詞鋒與醉墨。餘響若底頽。何以喻珍奇。繁露將玉杯。
次韻和張屯田新年六十九

春風數盡九節物。都非舊幕府省文書。堦除減奔走。慵憐啼鳥喚。老藉高花誘。前林通杖屨。小樹勤箕帚。
喜逢張公子。七十健少有。解吟長韻詩。不避盈樽酒。困倉年穀實。鄰里均石斗。樊圃畦隴成。餘力到花柳。
長爲子孫主。擊壤歡百口。

人日同弟姪會賈夷叔遊射東園和仲馮以退之弄字韻次用

宦情本羈旅。節物猶戲弄。歛見林下風。初開水濱凍。登高舉遺俗。剪綵隨衆用。暄和暢四體。杖履率羣從。
觴酒從我來。林塘復君共。捷弈判死生。勁弓嚴縱送。新萸綴高柳。潛穎發枯葑。天空鴈相喜。泉潔魚始縱。
馳光若漫漫。來事常惚惚。君看飛雲陰。旣去不可重。

從劉園至澄心寺

春泥稍已熟。鸛鳴天氣新。野竹自有徑。空林不值人。悔將車馬來。鷗鳥未可親。

獻歐陽永叔

毛生重九鼎。劇孟雄敵國。布衣未易輕。壯士多感激。遍讀近古書。仰求當時人。膠絃非工聲。直釣良苦辛。
舉世無與游。行且三十春。豈乏富貴士。相視猶埃塵。屈指東諸侯。側聞廷中臣。霜毛九皋鶴。絕足大野麟。
往者移太常。正氣橫蒼旻。連翩少垂翼。浩蕩俄縱鱗。天衢自茲亨。要路實有津。諫疏必焚草。王言粲如綸。

雲霄入顧眄。方牧寧逡巡。豈惟國憂賢。固是材致身。南金一銷鑠。荆玉成礪磷。少留股肱郡。不廢廊廟珍。道悠任逾重。文雄聲益振。指掌五代論。藻鑑盈門賓。信陵虛左乘。程子傾蓋親。意氣已然諾。許與忘舊新。孤劍雖蒯緱。丈夫不差貧。願言敝緼袍。試託狐貉鄰。往無鮑叔知。那識夷吾仁。毋令箕山客。洗耳茲水瀕。

初冬晨起作四聲詩

霜風吹簾櫳。天高明星晞。鄰雞三號呼。林鳥皆驚飛。嚴城開重門。危冠馳輕肥。疎慵徒安眠。隆冬方無依。

右平聲

營居依蓬茅。在我頗顯敞。陽暉餘朝溫。野景有遠想。年華無淹停。俛首已古往。全生誰爲賢。偃仰與秧掌。

右上聲

山林何時歸。陋巷似好遯。通衢皆高軒。竟歲謝訊問。行歌聊逍遙。衣敝信命分。殊勝蒙塵埃。勢利強自困。

右去聲

開門誰頻來。設榻得逸客。明窗容棊枰。日昃熟藿食。叢蘭香襟裙。雪色覆轍迹。忘形非無緣。拙直獨莫逆。

右入聲

舟次淮陰寄張郎

風波不可測。夷險繫所遇。泊舟淮南岸。始知散千慮。高秋氣蕭爽。日夕稍寒霧。漠漠煙水深。翩翩飛白鷺。值景信所貪。有懷勞反顧。何時見歸艎。嘯吟成一助。

記夢

光彩曜白日。笑語凌高風。冥漠分永訣。夢想如暫同。當寐詎知覺。視色旋成空。達性悔不早。百憂坐相攻。

夢楊十七

昔游梁宋都。偶與夫子並。爾來各分飛。豈獨歲月永。往事若有亡。魂交幸俄頃。如從杏山宴。坐弄南湖景。置酒腸已開。論詩心爲領。君言此會難。驚悟臥南郢。人生日月內。覺寐誰能省。適心故爲歡。好夢亦所幸。自吾客遐方。塵事久幽屏。乃知逃空虛。終日思咳警。

張君以六十九作詩自道其康寧余時年五十九感而自詠

新年五十九。處事覺陳舊。敲石火難停。下坡日如走。詩書本拙畫。孔老徒善誘。誰爲萬乘器。謬享千金帚。爾來專城居。遲暮亦何有。此邦白髮人。夫子稱祭酒。貧居玩一瓢。健飲輕五斗。愧君十年長。願已甚蒲柳。方將外形骸。餘事勿掛口。

送汾西高長官

堯風遠以深。千載殊未央。寥寥蟋蟀詩。在晉謂之唐。今君試宰邑。正復汾一方。民社非不榮。腰有銅墨章。安得六七十。而非諸侯邦。翳翳桑麻區。雞犬音相望。因俗固易治。學古子所長。勿嗤儉以勤。葛屨從履霜。暮年會有成。坐見鳴鳳翔。吾知尹翁歸。治迹由平陽。遠道悵分手。游子懷故鄉。離羣以索居。愧慚參與商。

〔原註〕參商。曾子子夏名也。二子皆居西河。故云。

送陳同年遊固陵

送君固陵遊。勿憶炎漢初。天地不中裂。雄傑爭錙銖。追兵下陽夏。百萬風雨俱。鴻溝不可恃。平分知厚誣。叱咤梁齊君。王業成斯須。鬪智不若諉。小信良區區。爾來數千歲。英氣存信書。山川未改舊。壁壘皆丘墟。寄心阮嗣宗。撫掌當踟蹰。

汴上二首

渾黃下湍流。地勢東南瀉。潛石激陰怒。烈風鎮相假。客行何艱哉。極力無可者。永路未遽央。扁舟安得捨。端思九衢塵。快意堅車馬。

客從江湖來。風水畏難測。行行返渠上。牽挽意不適。驚湍卷前灣。怒浪潛亂石。至柔動必剛。況使相推激。隨波歎異心。枉道復退尺。顧思掛高帆。勇往逾箭射。行險何足憂。萬事亦天力。

望九華山

初行江南道。山水皆可愛。忽見九華峰。瑰奇又堪怪。去之百餘里。青翠若無類。羣山特徵茫。屹起視其背。初疑楚人劍。真能倚天外。快意入浮雲。恥令白日晦。又如羣游龍。垂胡飲江瀨。俯仰令人驚。頃刻千萬態。未知濤與霍。何能配嵩岱。得無失其真。吾爲古人悔。山中多良田。泉源得灌溉。頗思藏其間。將家事耕耒。塵氛未決往。暫若觀畫繪。日暮飛鳥還。臨風久俗礙。

晚春登樓

川原自不改。春事已疇昔。衆芳生晚綠。遠樹森重碧。流鶯歇復歌。乳燕飛暫息。對酒獨慷慨。惜無同心客。
和謝師厚鵝詩

君爲田鵝吟。哀彼田鵝艱。無舌以自鳴。銜恨安所宣。我徵古人詩。得之唐國篇。苞栩何足哀。悲在不得言。君看鸚鵡鳴。衆芳爲不蕃。黔雷詎有知。奮此亦已偏。萬生詎可窮。孰能厭多聞。頗識鳥獸名。從子求諸田。

邾園水閣煎茶

溪梅已爛漫。溪水方綠淨。惜春聊插花。愧花還照影。淹留待烹茶。初覺晝日永。

登瓜步魏武廟

陰崖不見日。側逕劣容步。鬼神宅冢奧。與物隨繪塑。惟惜飲馬初。想見投鞍處。木落山勢高。潮平洲渚露。

華山隱者圖

六王昔崩蕩。秦帝按劍興。虎爭四十年。方隅爲之平。豪氣竟未已。用民如不勝。因河旣爲池。起洮復堅城。嘉哉諸老翁。攜手西山行。避世往不返。逍遙塵外情。明星備灑掃。巨靈爲友朋。飢食玉井蓮。手攜三秀英。世事一朝變。龍蛇復縱橫。石火咸陽焚。蟻聚成臯爭。致身青雲外。顧視不爲驚。萬朞乃須臾。安知谷爲陵。爾來見圖書。真氣猶冥冥。世人但蓬蒿。安知鴻鵠征。桃源迷去路。蓬萊浪知名。異時三峯遊。會當慰平生。

詠史

原嘗四公子。養徒各三千。金玉棄如沙。快意當目前。好士要盡心。安知悉英賢。雖非霸王資。豪氣故翩翩。

生爲戰國雄。死亦名千年。晉重未反國。曹鄭方接連。靳惜糞土間。不能捐一錢。宗社幾不食。惡名高屬天。山樞刺昭公。死矣悲宛然。如何萬乘邦。徒爲人所憐。秦兵謀大梁。決河灌夷門。百萬皆爲魚。閭里無一存。不用無忌謀。人人皆有言。天方縱秦毒。蕩滌乾與坤。雖得阿衡佐。誰能救崩奔。政先趣嬴禍。指鹿遂亡秦。翟義爲漢謀。攝省因卽真。爲忠豈不難。殺身亦已仁。天道良悠悠。成敗難重陳。不見商山翁。采芝樂全真。羽翼安儲皇。天子不得臣。

晚歸望月

落日隱城頭。深林已微暝。相攜步明月。詰曲穿繚徑。稍稍歸鳥栖。回風亂鐘磬。

六月七日大熱及曉微雨

宿雲晦城闕。曉雨生微涼。綠縹草木潤。清虛塵土香。宇宙暫掃除。曾襟豁軒昂。忽如沉痾去。飄若凌風翔。適物能須幾。執熱每相望。永愧江上翁。終歲浮滄浪。

苦熱登樓

高樓亦炎蒸。況乃樓之下。念彼生民微。纍纍盡蝸舍。上天無清風。何以逃永夏。顧余更縑縷。眇然用悲吒。火流暑當反。日冥天欲夜。我躬且自閔。於此猶閒暇。

秋熱

蒸暑淹南國。季秋如長夏。炎涼亂平分。天地錯常化。短日迴朱光。六龍頓其駕。曠似山澤焚。憚我如不暇。

反思歲聿暮。卻顧旦輒夜。寧忍窺昆蟲。干時事矜詫。

夏夜月中

靜夜收衆響。南軒臥虛寂。繁星粲文具。初月懸星壁。流螢急自照。露華重已滴。鬼神頗虛無。觸事生慘戚。兒童戲相驚。庭有玄冠客。夜久待不來。微風動松柏。

苦熱

生長自吳會。北遊逾十碁。來還遂衰老。衰老何用知。六月江湖間。煩炎若蒸炊。疇昔不憚暑。今者殊畏之。纖絺置如仇。羽扇常自隨。對案不得澹。膾炙成蒺藜。憶我童稚歲。烈日猶奔馳。鬪草出百品。承蜩睨喬枝。頰顏不待濯。流汗始爲嬉。自憐筋力便。豈謂天序移。往聞終南間。盛夏含冰澌。將家就高寒。長與卑濕辭。

酷熱

堅冰念陽和。廣莫思柔風。天事有馴致。星火俄復中。飛鳥炎千里。羲叔頓六龍。焚林墮翱翔。沸鼎愁噉喙。路傍在家田。偃僂頭白翁。惡木不得息。百畝爲己功。如何富貴人。方借明光宮。

秋熱

百里異風土。我行豈蠻越。中星正常象。未與京洛別。肅霜乃溫風。授衣甫絺葛。林蜩沸如羹。芳草香未歇。天令不可推。有時倒生殺。九土皆若然。蒸灼何由豁。憶昔過秦隴。連山看秋雪。陰風鴻鴈號。積凍松檜折。驅車渡河洛。反顧尙明滅。大笑咫尺途。居然異寒熱。

次韻以道月中作

月從海底出。素景天外來。解道千里共。斯人安在哉。洞庭木葉脫。未央簾幕開。顯氣徹霄漢。炯炯不受埃。羣居笑李白。獨與影裴回。願言常相親。無使手停盃。

和孫少述雪

同雲晦天地。浩然自生明。蕭條喬木風。斷續過鴈聲。袁公臥深巷。意得神亦清。豈知長沙客。漂泊萬里行。餓隱賤祿仕。乃見終古情。

別黃子溫

田園不遇歲。羈旅常苦心。問君長沙客。幾年東武吟。白髮映青春。天涯一相尋。傷弓雙折羽。遲暮多哀音。平原客如市。珠履玳瑁簪。擔簦義何勇。歸袖贏黃金。世事不足道。丈夫多陸沈。何以慰別離。春酒方獻斟。

別王深甫

四海不易遇。各自東西人。那知汝穎間。三歲爲比鄰。愛君故清真。有以敦薄鄙。亦作酒客難。調笑鴟夷子。一旬輒攜手。曷日不寄聲。相期此胸中。無若平生情。士貧非農商。敢憚抱關役。經術又不如。空愧上書客。飛鴻羈旅懷。流水離別心。長因東南風。一冀子徽音。

與孫巨源、蘇子瞻、劉莘老、廣陵相遇。蘇請賦詩爲別。各用其字爲韻。每篇十韻。

都城每過從。車馬動逾衆。分飛無此歡。會合杳如夢。薄霜作微寒。淺水未成凍。秋花正爛斑。幽鳥雜清哢。

此邦人事稠。南北屢迎送。以茲信宿間。得與數君共。遂將結吾廬。念有用餘俸。稍營負郭田。畢力輸賦貢。百齡欲過半。來日頗自縱。冀君數相存。詩酒尙足用。

本爲東方生。避世不避喧。仍慕管夷吾。畏事復畏言。外物不可期。高風難重論。我辭金馬門。君來西掖垣。淮瀕一相見。握手雙淚痕。矜我鬢雪多。歲月何崩奔。默然念既往。所遇皆籠樊。恨不值羽人。拂衣入桃源。腰間銀青綬。車上朱兩轡。專城自不惡。相思徒種萱。

因言浙江潮。憶上吳山尖。八月天地空。千里澄圓蟾。海水爲羣飛。迅雷發幽潛。壯士懷惴栗。怯夫竊窺瞻。春風潮水平。青玉開鏡奩。輕舟載花女。翠髮腰纖纖。勝事冠東南。君行獨能兼。吾以狂自名。將老無所嫌。會當從君遊。不計歲月淹。鱸魚必令鮮。釀酒勿使甜。

嗷嗷南飛鴻。羽翼何莘莘。哀鳴衡山陽。落影湘水濱。歲晏道路長。雪霜多苦辛。豈無稻粱謀。畢弋如魚鱗。此鴈欲誰比。正若羈旅人。古來瘡痍地。常有忠直臣。扁舟慎自將。勿重蛟鼉噴。鵬鳥惡似鴉。端能伺承塵。東風發衆芳。宿莽熙陽春。鴈歸君未歸。悵望汀州蘋。

季孫肥

季孫事顓臾。禍起蕭牆內。秦皇築長城。滅國乃胡亥。蒙公不正諫。地脉豈其罪。戰國尙權謀。阿諛彼何怪。親爲聖人徒。鄙陋曾莫解。龜玉毀檀中。危顛竟誰賴。鳴鼓詎可攻。菹醢死無悔。

約謝師直出獵。師直小疾不行。作詩戲之。

雪後原野空。風高弓矢勁。歲時有陰殺。自古順天令。躍馬徑豐草。呼鷹下空負。然火生鼻端。割鮮矧餘興。此亦壯夫樂。不與兒女並。苦無枚叔辨。試起夫子痛。

觀獵

立冬殺氣凝。清霜會晨朝。滌滌原野空。烈烈荆棘燒。鷹饑肯爲用。馬寒意逾驕。旌旗帶林莽。笳吹含風颯。突圍狡獸怒。得雋壯士囂。老狐屈變詐。文雉輸英翹。討伐順天時。未許窮姦妖。翩翩馬上兒。弓戰各在腰。意矜百戰雄。巧鬪更相招。控弦落明月。飛鏑來九霄。雖虐終無傷。爲樂固已饒。晚臨清汝濱。寒水如落潮。揮壺酌美酒。醉歸遺阜貂。

雜詠四首

衆樹日改色。涼風下蕭森。喬柯無定枝。存葉非舊陰。白露變爲霜。百芳從此侵。代謝不暫稽。盛衰理相尋。懸蟲自包藏。棄巢絕來禽。徘徊蒼苔地。萬籟成哀音。

矩日不能永。月華代揚輝。暝暗來四隅。稍復清影隨。迢迢河漢章。天畢前南箕。簸揚塞無成。掩兔今亦時。蒼蒼城隅草。地勢元有在。涼風西北來。搖扞色已壞。天運正消殺。高明彼先罪。安見中國葵。淺智亦足賴。疾風吼籬端。嘯呼隨叱吸。翻翻走地葉。袞袞強相及。重門忽開扉。窸率如有入。飛蓬自無根。邂逅暫相集。萬生共馮寓。智愚因妄執。區區古今士。陳迹更綴緝。是非竟何常。得一已漏十。歲晏莽無成。白頭抱書泣。

廣陵蔣生死十四年。尸猶溫。有妻子存。嘗有書自遠與其家。〔案〕公是集亦有此題。

三徑積荒草。玉棺不上天。初疑青竹墓。有值吳門仙。妻子同脫屣。衣冠如蛻蟬。何年獨鶴歸。悲歌城市遷。
曹司封詩
自我勝冠帶。日聞鄉黨議。意嫌風俗衰。長老俱喻利。緬懷千歲士。未謂今昔替。果哉曹大夫。高度跨一世。
人皆競錐刀。趨走候形勢。強能弋公侯。弱或丐奴婢。而公獨長往。亦豈惡富貴。顧當拯頽波。且以伸吾義。
昔在天聖中。太后猶稱制。桓桓諫議公。正色風憲地。王室依老臣。蕭牆屏姦計。一麾竟謫守。褒贈身後事。
至今誦遺烈。每雪義士涕。天倫見霜標。粲粲真難弟。大雅貴老成。春秋有凡例。吾將編野史。著述二公志。
直清先伯夷。退靜後季次。願爲得者規。不使達者愧。

驟雨

山川近淮秀。風雨向秋急。初爲空曠游。頓喜清涼集。鳴蟬斷復續。沙鳥飛還立。平生耽勝事。未暮俱可及。

馳道

秦皇侈心極。登眺窮阻修。言從峽中度。復欲滄海遊。車轍去不反。馳道缺每留。君看鼎湖人。尙畏軒轅邱。

樹下

百芳與春違。嘉樹成密集。上枝下相副。朝影暮還接。徐風氣清涼。重露香浥裊。關關變鳴禽。杳杳飛孤蝶。
神仙彼何有。靜境我心愜。萬期猶視蔭。寸景疑度劫。何用窺蟠桃。滄溟憚舟楫。

過薦福寺

下馬喬樹陰。雪霜寒未晞。重門開相當。廣殿晴日暉。問僧亦何事。荷鋤殊未歸。勞生每多役。向此情依依。
分題李花得香字。

尋幽興不淺。佳木稍已芳。積雪春未融。明玉仍自香。赤日照未好。會待清月光。念無瓊玖報。聊復進雕觴。
夏雨

邑居苦囂塵。洒掃長不給。蕭條一雨餘。草木遍青濕。靜無浮埃生。清有涼風入。媿慙天地功。人力那能及。
馬死答劉先之

馬惡憂敗羣。馬死遂徒步。始知惡有用。但愧非善御。未能棄山野。不得事籃輿。猶當謀款段。尙取州里譽。
顧林亭

逝者如去水。賢達無復居。竭來顧亭下。但見林木疎。魚鳥樂深淵。風煙迷舊墟。徒幸百世名。歷歷存緒餘。
齊魯

齊魯大儒師。專門盛章句。應物非己長。何以責成務。乃其忠孝心。足以事君父。不如商利徒。反道趨詭遇。
剝床以及膚。泉貨山嶽聚。賜金稱百斤。封邑成千戶。若無天事變。豈不厚且固。商鞅旣誅夷。桑羊亦刀鋸。
寄言逢掖人。施施幸安步。

彭城集卷五

五言古詩

淮上

旦起風頗涼。暑薄意彌愜。長淮波浪高。咫尺不得涉。艤舟望連山。青靄亂雲葉。鷗鳥去杳然。空迥明惝惝。臥吟新詩句。閒理舊書帖。呼兒飼茭茨。看婦治箱篋。爲非急時者。無事用輕楫。淹留旣無悶。何必歌長缺。

次韻蘇子瞻

顧侯磊落人。稱是腰腹偉。不甘封侯相。蔡父誇小史。功名保唾掌。懷寶豈能已。鞅掌人所難。見之心獨喜。鄴中貴史公。秦諺推樗里。一蕘障九州。亦自其名美。金城上方略。萬里可寸紙。頂踵禹墨間。掛冠復遺履。蘇公相知心。乃在湯湯水。抑揚磕然笑。吾心嘲里耳。

次韻孫少述二首

藝苗欲其實。種椒欲其繁。我本正禮家。世人稱二難。學射庾公斯。取友念必端。相與今白首。交通可以完。羨君脫塵垢。顧己羞素餐。聊爲鵬鷄飛。各自天宇寬。一月三寄詩。一詩千百觀。悅若從君遊。君知我心歡。

爲貧始願仕。逢辰叨典州。樸直守故學。遲暮悲舊遊。此邦詩書林。處士原憲儔。怪我何所爲。千騎居上頭。君恩重泰山。未有毫髮酬。遠慙遂初賦。清節第一流。桑榆不相遺。歡笑脫羈愁。

喜王大白固陵歸

日月疾過隙。生者猶行客。念君於此中。復久事遠役。歲暮山林閉。天寒雪霜積。歸來道路勤。稍見車馬色。田事未宜緩。春冰行解釋。相從今其時。迨此役車息。

畏途

畏途十殺一。昧者已知戒。奔航失維楫。將恐亦同敗。凝冰難長清。甘醴復先壞。桔槔獨知道。俯仰非有罪。

椿下獨坐

凱風長羣物。赤日流正陽。幽居似囂煩。嘉樹亦陰涼。偶坐方丈間。吾非厭華堂。愛此真不材。保彼千載長。仰視龍蛇形。屈蟠正蒼蒼。忽疑翠羽葆。何以居我傍。吾聞高蓋人。專寵來百殃。我獨安隱幽。八鳥不亂行。

結廬

結廬東城下。適當車馬路。開門閱過客。擾擾不知數。客或爲我歡。客或不我顧。歡我我不驚。去我我不慕。俛仰各異懷。音容暫逢迂。照影清水中。然不相語。魂交夕夢間。昔昔已復寤。薄厚何從生。善惡非有素。寄語朝市人。知余養生趣。

後浦望水

春塘見游魚。芳草宜白鷺。溪流定幾曲。花發應深處。重來畏已迷。堅坐不能去。

奉和寬叔新橋之什

昔賢常奪高。彼聖猶伐樹。物情喜崎傾。直道每齟齬。況茲渾渾川。翻覆不可據。風波一生憂。忠信多逢怒。陰虹架層雲。雨氣生寒沍。操舟雖云神。失勢嗟已屢。早師漆園學。一悟南華趣。理會定無悶。神全諒何懼。吾道乘桴浮。斯文以筏喻。仰止金玉章。渙然謝煩慮。

晚泊長蘆贈南來鄰船

沿遡同一川。風波情豈別。維舟暫相從。銷憂自怡悅。明發南北飛。離懷更秦越。

苦寒

不敢怨雲霧。不敢悲雪霜。此是上帝令。所以誅愆陽。不見李與桃。前日胡爲芳。不見蚊與鷄。往日胡爲翔。反時固爲妖。徼倖真不祥。但令冷氣除。豈敢虞凍僵。吾道不終窮。君看松與篁。

賞心亭〔原註〕時馮當世置酒。會呂翰林。張舍人。章學士。皆在坐。因以詩贈馮

高堂面虛無。水色照羣有。不知歸流永。但見來帆久。蒼翠前後山。起伏龍蛇走。荒蕪六朝舊。獨此存不朽。涼風西北至。蕭颯驚戶牖。秋意條已高。玄蟬嚙衰柳。主人厚賓客。嘉贈隨所取。爽豁破縈紆。高涼謝塵垢。開筵窮日影。玉斗湛清酒。長歌激梁塵。爛醉頗無負。羈遊屢飄蕩。攀援每遲後。數公傾蓋歡。夙昔故未偶。夜闌天正黑。出戶攬星斗。明發復殊方。行行但回首。

汴渠挂帆

翩翩河中舟。一一西上水。彼船力有餘。我船力無幾。力薄日一舍。力壯日百里。遲速詎幾何。推分故爾耳。今晨東南風。帆席頻輕駛。舳艫密相銜。前後略相似。如將平不平。頗復令人喜。因之念時事。冥冥付天理。

寄韓持國

帝都冠蓋區。百吏鮮閒暇。學省獨優游。儒冠足休假。臘前辱飛書。雨後果迂駕。遠道靡告勞。心期莫予詐。三年坐窮山。物色多可訝。鶴林失昭師。演門吊兩謝。素交悵傾蓋。陳迹空怛化。孤吟不逢人。默坐常逢夜。朱丹親簿領。蟲早視禾稼。全人猶穽盎。薄賦兼倓幪。君來慰何多。高論聽雖乍。雄風快披襟。佳境逾啖蔗。從容外形骸。約略陳酒炙。尋芳問名園。臨溪陟累榭。數稱滢陽叟。謂實龐公亞。昔聞固已多。今得逾可詫。龍門走清洛。伊水共東下。舊都富形勢。時卉芬蘭麝。雲峰會深入。芳草正可藉。乘興寧有窮。歸馬何當跨。小官畏繩墨。跼蹐甚韁靶。苟無咫尺書。限此十數舍。舉頭怨鴻鵠。羽翼不我借。終更行有期。屈指計秋夏。

寄王深甫兄弟

曹子三敗辱。卞和再別悲。自古鮮其然。今子何似之。歷塊悞一蹶。千里差毫釐。白璧固有瑕。黃金豈無疵。識君向十年。每歎時爾遺。天命茲可信。古學滋可疑。上書欲薦君。身賤不得爲。寄君北門詩。相望空所思。

寄王子直

三見登賢書。每有千人進。少年盛名聲。高士離幽遁。吾憐王子秀。屢黜曾不近。棲遲困家食。屈首仕州郡。

始疑造物意。實於才者吝。寧與朝廷分。不使山野盡。間令特達士。竭力事推引。知音與彙征。千歲名雙振。憶君盛文華。遇事尤精敏。雷電騰火車。波濤駕蛟蜃。譬之逢羿射。所發無不準。固窮當益堅。達生尙無悶。府公樞軸老。治道常坐論。屢聞下榻迎。豈惟虛己問。人生貴意氣。感激多發憤。想見吐曾中。江河出方寸。便當薦書上。累鷲推孤隼。咫尺青冥天。勵翼見翔奮。年華不吾與。二毛條生鬢。祿仕久益貧。拙謀老仍鈍。干時尚有違。得名諒無分。行當鴻鵠舉。判與麋鹿渾。江魚事鈎罩。吳稻收困囷。君時據亨衢。寄聲勿招隱。決意千里遊。極當何日歸。終朝仍閉關。室邇人竟違。北風吹長空。弱羽相分飛。我呼君應聞。何意音問希。介者常鮮合。俗士所見非。會知相憶深。不爲輕與肥。

寄王深甫

昔居沈邱門。相過不盈里。蓬蒿啓三徑。杖屨通彼此。去潁已數年。居常夢湖水。陋巷君所安。所居未宜徙。憶昨春風時。君手種桃李。二年當著花。今秋應結子。同生記五人次。卿今祿仕餘。人皆及冠。誰最飽書史。娟娟懷中兒。長女久生齒。僣僣乳下秀。相繼今有幾。固陵好田園。往歲未疆理。菑畬無廢功。計程萬億秭。曩時豫君謀。家事最綱紀。欲令囊有錢。更使困餘米。伏臘足自了。衣食常好美。自茲謝俗徒。閉門唯隱几。豈論陶朱公。未慕子貢氏。有志懼難合。到今可誰比。將無尙瓢簞。幸不乏甘旨。南風素輕浮。衆口巧排詆。往聞里中兒。責望多苛禮。君從段干迫。詎免叔孫毀。又聞澤宮射。吾子時見罷。有言厭塵勞。自誓不再起。窮通非異門。出處皆一體。達生知順天。偏智乃私己。怪君未坦然。尙爾交憂喜。昨來赦書下。拔滯先賢士。

寧令有道卷。近自吾人始。丈夫龍蛇變。蓋棺事乃已。探穴必得虎。叱梟會勝雉。何能守一方。寂寥事行葦。吾爲諸侯客。正得戎曼鄙。簿書每陳前。弦誦不到耳。時方尙鴻鵠。自愧雜螻蛄。匠石悲運斤。郢人怨流澠。非君美無度。孰與裁狂斐。思心若煩醒。澠忍不可洗。彎弓輒墮鴈。投竿常獲鯉。寄書非無緣。勿愛繒與紙。

寄王子直

王孫意氣壯。文武兩自適。著書輕古人。時論有馬癖。塵埃間何闊。陋巷稀軼迹。西郊秋欲分。風露朝暮積。豈惟弓矢勁。況乃鷹隼擊。何當共馳騁。一見萬夫敵。

寄原甫

雞鳴行問津。日昃未得休。高山有懸車。深水時汎舟。二殺避風雨。太華行清秋。旅遊月魄毀。始覺岐路修。緬然望西南。落日荒維陬。應知念行役。天中時倚樓。

寄王掾

壯齒行九州。智當任百憂。常慕馬將軍。又憐定遠侯。汨汨州郡役。奔走無停留。朝與簿書期。暮從農夫遊。盡力蒿艾間。令人愧前籌。會計與牛羊。古來悲孔邱。王卿與我同。歲晏方田疇。烏攫道傍肉。貂餘身上裘。西風木葉零。清雨天地秋。歸來共尊酒。歡言役車休。

寄王深甫

昔有揚子雲。著書恬勢利。家貧官不達。賓客罕肯至。時復好事者。相從問經義。千載故寥寥。吾人一何似。

天涼風雨餘。草樹有秋意。蟬吟燕辭歸。窮士易失志。陋巷可相期。簞瓢固多味。

尋王深甫值其不在歸寄此詩

幾日欲出門。適此天和柔。邦人皆異情。我憶從君游。僻居正窮巷。冰水相交流。旁舍代應問。簷鳥聲啁啾。士貧難自高。柴水勞深謀。昂藏塵世間。何異川上鷗。我能乘興來。不能興盡留。清談無由接。竟夕心悠悠。

寄王深甫〔原註〕時爲亳州衛真主簿

公綽志不欲。滕薛非所居。黃香脫枳棲。仍集東觀書。餘鯁不挹漿。鷹隼非捕魚。狐裘匪負薪。鼎鬲寧柱車。物生各有宜。得志皆自如。違方易故常。操末繆續初。古賢貴相知。末俗隨毀譽。懷君乏羽翰。臨風一躊躇。之官汝州舟中作寄都下

淺智憚遠謀。弱力量所任。進途遠朝廷。退迹違山林。代耕抱微願。雲石安素心。小官慕既往。有道諗在今。問津自南郭。治舟遡清潯。鼎鼎去鄉悲。泠泠遊子吟。凌風卷晴綠。喬木庇高陰。黃鳥相喧呼。嘉魚一浮沉。晨昏偶素月。信宿在青岑。所遇多可歡。離念頗用侵。嵯峨天門高。浩蕩瀛海深。髦士相提衡。精義窮幽尋。顧余傾蓋交。問我瑤華音。戒車辱祖道。贈策悵分襟。簡書甫祇畏。僻陋方滯淫。搖懷日三秋。寄情望歸禽。

早春懷都下

沈滯幕府官。三見春華換。早聞知命言。豈敢竊自歎。樗老謝彫刻。鉛鈍繆鎚鍛。幸茲省文書。聊以騎款段。鄉閭越南北。弟姪稍婚冠。藹藹西掖垣。哲兄秉天翰。悠悠思者懷。歷歷念可看。仰視歸飛鴻。何當爲我伴。

瓜步

蒼蒼林表山下惟瓜步水。憶昔魏皇帝百萬嘗駐此。飲馬江水渾。揚旌朔風起。經營竟無成。歎咤有遺恥。去去常畏人。閔默垂五紀。大江限南北。天意固偶爾。奈何奸雄才。割據爭虎視。不有神武功。疇能混書軌。吾聞清流戰。王業實基始。樓舡蔽空來。天塹才一葦。此時東流波。不足投馬箠。煌煌軒臺威。凜凜向千祀。

寄老菴

茲山韞奇勝。四野窮眺覽。近峯擢矛劍。遠巘矗蓮萼。雲霞發光彩。氣候變舒慘。啼禽不能名。秀芳多可攬。招提就丘壑。初地首鈇槩。精廬爛金碧。淨供歡藜糝。佛香晝緜緜。法鼓晨統統。林風忽飄搖。天樂隨簸撼。靈泉初發蒙。溫液遂盈坎。異源判炎涼。及物萬塵黜。西南江路永。水墨畫色淡。漚鳥破青冥。帆檣出葭菼。吾人事探討。絕境更平澹。悟真心自知。得雋首獨領。剪茅地夷爽。築基土強礧。長松啓門扃。怪石列窾窾。遂初本逍遙。知略貴剛敢。〔原註〕孫會宗智略士。頽齡惜鬢髮。壯節露肝膽。由來抱軒昂。豈復甘黯黹。辭滿異多秩。摻祛嗟不寔。高風故難繼。弱質因自感。頽肩疲負任。勿藥羞是瘠。願言爾爲鄰。寧使我餘憾。卽今桑榆景。光翳將就暍。

潼關

上有蒼蒼山。下有渾渾流。兩崖類築甬。中道纔容轉。關門密相望。設險非一秋。借問前代人。屈指羸與劉。乃知伯王功。天險參人謀。百二制六國。一面當諸侯。東慙洛陽薄。北視朝歌羞。時平郡國通。官守輕戈矛。

旅程茲出關，悵然爲淹留。

汜水關

四山環若屏，土色類堅石。青冥積靄間，古逕漏天隙。虎牢一何險，飛鳥不可歷。狹處乃容車，天形正修白。山行十里盡，路與洪河直。驚波走狂沙，瀕洞踏虛壁。寒光著面目，瘖瘁避劍戟。殷然出地雷，下與千仞隔。壯哉造化功，置此限南北。乃知巢居民，老死皆異域。帝鴻始舟車，夏禹勤底績。輪蹄日相尋，隘路遂開坼。因緣楚漢交，英雄因智力。殺人何其悲，貽患實自昔。西風卷零雨，昏霧白日匿。泥塗未遽央，客子怨行役。

春日涼榭寄戴大臨

老去苦無悰，春還暫真賞。念無俗慮侵，得以山林往。尋幽喜人遠，習靜憎禽響。東風日暄和，觸事全勝尙。晚步寄徐從道

日夕興頗適，逍遙步城隅。連峯蒼翠間，決溝見平湖。鳥去一何逸，白雲與之俱。太虛自無礙，真意寧有拘。春華白藹藹，欣欣動羣枯。園畦亦成趣，嫩綠榮寒蔬。思君昨相語，水木西山居。況此天氣新，田野多歡娛。注想已自爾，念歸定何如。

秋園

夕陽下西山，反照林杪赤。初驚秋事早，遠見霜葉色。山林得吾心，消散理輕策。翠香襲晚秀，柔紫拾新坼。涼蟬時一聲，栖鳥相斂翼。還歸臥南簷，初月照虛碧。

寄王固子堅時在固陵治田。

蘇秦六國相。晚被讒。隱名使有東郊田。安得留此聲。古今事可知。達人盡躬耕。多君家事治。竭力從老農。白水負郭田。百頃畝一鍾。耕亦勿鹵莽。耘亦無滅裂。秋成霜滿畦。玉粒勝白雪。我懷沮溺心。早晚從君游。且當學林類。行歌復披裘。

陸瑁養魚池

何茲水鄉士。尙復穿池居。寧知湖上龍。不是淵中魚。漪瀾杳無際。綠淨望有餘。寂寞垂竿叟。嘯歌方歲除。自舒城南至九井。並舒河行。水竹甚有佳致。馬上成五首。

升曦上南山。千峯雲碧明。晨風激寒水。琴瑟環佩聲。蠶老桑柘空。麥熟黃鸝鳴。浩然田野興。遂爾忘都城。高高嘉樹陰。下下修竹林。水光搖日影。人語亂鳥吟。興適盡佳境。有逢皆會心。安知道路傍。前更登嶽岑。一溪分百泉。一泉流十家。惡竹莽連雲。古樹橫帶沙。魚子戲稻秧。鳧雛啜荇花。信美非故鄉。無由寄生涯。溪水轉山曲。杳如天際流。淺瀨不解衣。浮查曰爲舟。惜無同心子。此地聊淹留。但愛溪上兒。蓬頭坐垂鈎。南山近仙居。太古餘積雪。陰雲五月寒。松檜爲之折。如何車馬客。塵土倦炎熱。揮手謝世人。吾將與君絕。自曹還都。舟中奉酬子中見寄。

結束遡都門。歡言瞻上東。宿春不成裝。徒御殊怱怱。傾城千萬人。髻稚隨老翁。攬袪強我留。路隘馬不通。志微術無多。舉動非材雄。畦隧不知拙。雕朽寧謂工。尙憐畎畝民。欲使衣食充。吏課才第六。名品出下中。

豈期此邦人。念我如函風。竟慙不赫赫。用底書成功。人事非有常。物變何必終。移是趣日新。應諧猶不窮。恥爲堅白辯。判別僻與衷。由是知命來。但覺心源空。思君天材異。汗血流騾驄。定交旣非晚。接武崑瀛蓬。歲月使人驚。冠帶昔兒童。別離過三秋。會合今復同。新詩思何深。清月醒困蒙。相哀蹇無成。爲客謝諸公。意合非有求。道遠義彌敦。詩書獲我心。將老遂不諼。頽齡若馳波。哀逝稍不存。念君稅鼻羈。飲水棲衡門。正容悟失道。已矣將何言。

奉酬孫少述

還家

久客常念歸。還家自深願。雖非湖海遊。早已時節變。果羸施於宇。蠨蛸巧相銜。牆根思哀蛩。危棟辭歸燕。貧加鄉閭慕。病益兒女戀。棲遲免路旁。未厭茅屋賤。衡門過涼雨。秋草盈芳甸。耕耘儻及時。筋力自此勸。雪中檢故書。見王深甫書因寄。

積雪闕窮巷。天寒四岑寂。常時能來人。今茲亦絕迹。探囊理文書。卷軸浩堆積。歲序往不留。其人或成昔。忽如二三子。共此笑言適。我遊皆可人。回也實莫逆。詩句何軒軒。有若風中翼。使我多聞知。令我手不釋。聞君不作官。作官固無益。由來全生士。不以時世激。請問紫芝翁。寧知五鼎食。開門望四野。天地漫無隙。老鷹凍不飛。何由寄消息。

送張七和州判官

從仕如博奕。百萬繫一擲。君看大司馬。二十好顏色。與子昔獻賦。共登東堂籍。留滯向十年。尚爲諸侯客。我愚數亦奇。連蹇不自惜。念君復何爲。無乃玄尚白。時平棄奇節。幕府鮮籌畫。譬如埒堞間。安用鸞鶴翼。高秋江湖深。莽莽煙水碧。輕舟犯蛟鼉。勉子慎行役。

三女岡

吳女飛若煙。茲地留爾名。上有愁雲陰。下有蔓草生。如此粲者何。遺恨若未平。寧無東平樹。靡靡向孤城。

澄心寺後閣彈琴

高風動長松。蕭瑟清我心。亦有琴上絃。盡得天外音。試復向城市。餘響終難尋。

首春學省同舍十一人集。王彥祖爲主人。人賦十韻。得河字。

意遠智無涯。樂少憂常多。浮生共茲理。達士默謂何。歲月如奔車。冰霜變陽和。廢書獨長嘆。倚席仍浩歌。王子家千金。世勳誓山河。勅廚具豐羞。載酒信所過。重簾篩勁風。暖日蘇庭柯。左手持蟹螯。一醕朱顏醜。衰老愧投分。愛賢心匪他。相矜不及門。聊欲陳四科。

養魚

知此升斗狹。鱸鱠非所容。安知庖所捐。後不成蛟龍。爲爾釋囚拘。置之清冷中。不有網罟憂。安見拯濟功。掉尾一何歡。餘困猶險囑。孰云我非魚。正見所樂同。

小雨

十日無油雲。一春無奔雷。天事不可知。號令於此頽。疾風生梁棟。宇宙如沈灰。驚霆萬車走。激裂山石開。此聲昔未有。曩意非所猜。況聞波濤音。洶洶千里來。雖無爲霖實。猶得驅黃埃。終憂稻梁枯。所濟蒿與萊。蛟龍樂盤嬉。既往寧復回。茫然怨雲漢。赤日方徘徊。

檢覆邾城旱田示同官及寄河南諸賢

昔歲歉無年。今夏仍荐饑。罷民去南畝。賤價捐東菑。籍籍道路間。餓者何纍纍。藜藿不充腸。茶然旄與倪。嗟我祿代耕。每食爲不怡。徒懷仲由志。身賤那得施。屬城上民訟。比牒皆苦詞。奉詔實有無。百聞謝一窺。星言說桑田。行與父老期。觸熱不敢休。重趼寧告疲。郊原赤如赭。秉穗無子遺。墾藝不可分。四旁生蒺藜。流行誠代有。愚弱豈易欺。附上亦有刑。殘下罪攸司。鄙夫不忍此。告吏咸赦之。庶茲咻喚恩。足以蘇惛瘖。大農急經費。言利析毫釐。二吾猶不足。一切寧謂宜。國僑敏爭承。鄭邑用不危。馮煖焚券書。田氏人若歸。區區二小邦。兩士能若斯。當官在必行。匪石安可移。諸公悉吾友。此志良弗非。當令徇路人。一聽狂者詩。

退朝

慮澹事從簡。興發謀豈豫。退朝建禮門。走馬長楸路。陰風脫林槁。朝日破寒霧。簡書亦優游。賓友慰遲暮。神仙未嘗學。皋壤欣所慕。靜境出自然。勝遊非浪聚。杯觴謀須臾。肴蔌訊無慮。賞音愧聞絃。和歌容執御。引泉詩。睦州龍興觀老君院作。

上嗣位六載。吾宗刺桐川。余來拜旌戟。詔下之明年。是時春三月。繞郭花蟬聯。嵐盤百萬髻。上插黃金鈿。

授以道士館。置榻於東偏。滿院聲碧樹。空堂形老仙。本性樂凝澹。及來更慕玄。焚香禮真像。盟手披靈編。新定山角角。烏龍獨巉然。除非淨晴日。不見蒼崖連。上有擎雲峯。下有噴壑泉。泉分數十派。落處皆琤潺。寒聲入爛醉。聒破西牕眠。支筇起獨尋。祇在牆東邊。呼僮具畚鍤。立鑿莓苔穿。濃淙一派墮。練帶橫斜牽。亂石拋落落。寒流響濺濺。狂奴七里瀨。縮到疎楹前。跳光潑半散。涌沫飛旋圓。勢束三峽拄。瀉危孤磴懸。會聞瑤池溜。亦灌朱草田。鳧伯弄翠蘂。鸞雛舞丹煙。凌風換桂舵。隔霧馳犀船。況當玄元家。嘗著道德篇。上善可比水。斯文參五千。精靈若在此。肯惡微波傳。不擬爭滴瀝。還應會淪漣。出門後飛箭。合勢浮青天。必有學真子。鹿冠秋鶴顏。如龍輔余志。日使疏其源。

和原甫鄆州樂郊詩

人事有背嚮。勝遊不長絕。聞公樂郊行。慷慨矜歲月。東山翠屏秀。盧水寒玉直。尙有昔來人。借問寧異昔。淺蕖亂幽芳。梧竹凝茂陰。始知秋意高。詎厭徂歲深。因宜付衆妨。一作妙大巧常不爲。魚鳥皆自歡。賢者能勿違。華堂庇深沉。臯壤極虛曠。清池湛明輝。寒郊無近響。公來會旌旆。公晏盛笳鼓。魯酒若醍醐。齊謳豔巴楚。采芹自胥樂。食甚懷好音。因成池上篇。爲想思歸吟。

劉太尉廟〔原註〕燕人劉審交

世亂爭鬪繁。廢興不可載。磨滅幾何人。獨茲有餘愛。空同氣雄武。燕薊風慷慨。曾是鞍馬間。而爲治民最。桐鄉舊墟好。峴首遺碑在。歲久梁棟傾。地荒松栝大。古今猶過隙。俛仰成百代。咨嗟畎畝勤。勳業非永賴。

欲雨寄張壁

秋事亦已中。江南故炎溽。北風三日雨。正氣還淒肅。身老慮深簡。官閒睡常足。庭陰墮長梧。園芳亂新菊。借書喜未見。釀酒欣初熟。優游諒卒歲。何用恨幽獨。

雨中寄子直

繁陰不時解。雨氣如深秋。朝衣始絺葛。暮服乃重裘。天事亟變易。得爲有常不。如何世上士。欲以全自求。行身繩墨間。蹢蹢空白頭。唯君可語此。意豪力且遒。通衢雖泥塗。未至乘扁舟。興發騎馬來。墊巾故風流。

林都官種花

休跡異從告。退居乃靡祿。勞心不治人。寓興此嘉木。客來啓荆扉。側砌紛衆綠。名存洛陽品。秀出海南族。理會意必歡。誰能傷局促。時當載酒過。三徑成幽熟。

送邵興宗之丹陽

赤日裂石土。萬家如烘爐。君行何事役。似爲貧所驅。埃塵稍去眼。雪景日蕭疎。扁舟乘長風。倏忽徧三吳。六年羈旅倦。一旦誰掃除。慎勿忘回首。浩蕩江山娛。



彭城集卷六

五言古詩

作假山

幽意難具陳。靜境可因就。遠求澗側石。置彼窗中岫。前爲嵩華高。側構衡霍秀。巖嶸倏天成。風煙若神授。他時看圖畫。應接頗意究。氣色形似間。人人輕宇宙。嘗聞山林士。既往又不復。此語我知之。衡茅非所陋。

暑行

憩馬道傍舍。解衣仍佇立。四簷庇陰涼。蕭蕭風氣入。雖云茅茨陋。枕簟亦自給。已勝鞍馬間。筋力苦倦急。田野歸去來。餘年猶可及。赤日成畏途。相與逃熱行。中宵寢不安。兩舍雞初鳴。據鞍寢夢間。墮策忽自驚。官身跨官馬。倦飢奈有程。愧負田野翁。安穩眠到明。

傷胡二

古人雖千歲。我見如接迹。今人雖比肩。我視猶異域。乃知相知情。心識非貌識。所以識胡君。不得同硯席。

今朝滿衣淚。哭君寢門側。

傷逝二首

去水不可還。逝者日已疎。悲憂若沈痾。白藥無能除。英英韶華子。天天昔同車。令德其芬芬。佩玉聯瓊琚。舟移悼藏壑。天祝嗟愁予。蕙蘭秀不實。徒見荆棘墟。含悽撫衆稚。弔影還室廬。高天杳茫茫。日月空居諸。我昔曾遠遊。歲晏不得返。又嘗懼而夢。百怪紛亂眼。迨今疑若人。虛實未敢辨。促駕逝將歸。驚呼寤何晚。百年非淹期。愚智俱不滿。彭聃與顏殤。究竟同是短。愁憂浪無端。衷腸若湯涸。

巢父井

訪古慕高遠。回首笑流俗。千世得巢父。蕭然慨遺躅。古來知生民。滿腹所願足。何爲讓天下。牛口信爲辱。高風渺不嗣。世態日局促。至今西山翁。恥甘首陽粟。愛此盈尺泉。百尋瑩寒玉。遷陵復改邑。缺甃常湛綠。君懷浮雲志。塵埃茲可浴。君有冰炭憂。清冷相爲沃。長塗接周楚。軒蓋密相續。能令貪夫廉。更使賢士勗。豈如漢陰叟。抱甕傷窘束。我遊阻勝槩。長謠慰心曲。

題李白祠

舊聞謫仙人。多以我爲似。三生去來今。惟獨變名字。泊舟姑熟溪。風月不如意。舉頭望青山。酌酒聊一醉。漢宮三十六。當時各自貴。昭陽與華清。究竟誰爲愧。奴輩不自省。脫靴更誰避。而令棄賢材。孤負青雲器。宿蔡口

竟日鑑寒水。泊舟復新月。浮光鏡上下。空寂照毫髮。華星湧波際。人語自天末。潛魚躍相聞。去鳥飛漸沒。明生思慮盡。清入心源豁。洗耳事誠非。濯纓情愈闊。

立春

歲陰已暗去。春色復潛動。嘉樹欲芳華。歸鴻雜清唳。乾坤自長久。節物厭迎送。濁酒歡我愁。浩歌爲誰縱。古人盡流水。世事皆宵夢。白日少借留。青春亦公共。舉眼向高天。吾謀不能用。

次韻和楊叔恬贈鄭祕丞

緯蕭棄明珠。龜手安緝漂。浮生每殊塗。吹萬亦異竅。傳劍不成顯。談舌無與掉。園冠豈誤身。儒術真寡要。歲時不我與。壯年更稚少。白髮綠鬢多。班班已盈照。安排慕無悶。推命獨孤笑。趨愚甘就迂。遣累稍夷峭。嗟峨天門開。事業寄周召。登賢如弗及。得士故頗料。乃知古猶今。孰有賀隨弔。寸善曾不遺。有功輒先調。驂騑自西極。翠羽山丹徼。黃鐘陋巴歛。文鼎嗤畚篠。沉聞邱園秀。得以虛名釣。唯憂有道卷。莫敢後時誚。食苹鹿相呼。在鶴雞羣叫。飯牛歌何哀。築巖貌惟肖。顧子乃迷方。黥劓誰與療。章甫期適越。風帆欲踰嶠。敦敦樂瓢箪。耿耿甚熒燿。聊謹龜曳塗。猶畏犧入廟。同聲邈難期。僻陋常耳剽。逢君獨欣然。夙昔共明詔。屢聞諸侯辟。復見尙書召。奈何竟棲棲。塵土翳光曜。西山悲采薇。鼎食歸酒削。飛將不得封。重侯付嫖姚。新篇一何工。大巧全衆妙。上言道路勤。山海窮聽眺。次述疇昔遊。弁髦迨冠醮。下云厭屢空。藜藿甘咀嚙。英賢困奇蹇。爲善誰復劬。譬如飲洪鍾。偉量乃能醕。鄭公亦全材。大厦方容窳。珉瑤謝尺璧。絲管讓清獻。

同當鵠翻雲。肯爲魚在罟。千里由咫尺。西城始春燒。吾聞天祐賢。柞域民所燎。胡爲沮溺儔。躬耕老蓬藿。

寄劉道原祕丞

君家廬山南。雲水當戶庭。丈人懸安車。鯢齒頭髮青。吏隱粟三釜。繙書十二經。胡然辭羈旅。大江急揚舲。太史司馬公。老成兼典刑。周南歎留滯。武庫森長扃。叩關起九州。授簡歡真詒。自茲訪都邑。乘興及郊坰。清洛湛寒玉。嵩高環翠屏。宮觀想舊躅。叢祠記遺銘。俗物不挂眼。俚言誰載聽。畢事黃鵠舉。翩然問長亭。念昔始相從。子少予壯齡。定交自傾蓋。結好深鵲鴒。放懷脫羈馭。高論窮杳冥。縱博恣叱臯。極飲常虛餅。後會十五年。見子雲龍廷。官書職讎校。舊簡同編硯。瓠落無所容。柘彈緣蜻蜒。河梁一分手。南北如漂萍。歲月不肯留。瞬息無暫停。跳丸指飛鳥。急雪看凋莫。壯懷益漫漫。衰鬢成星星。勞生百年間。所恃七尺形。從衰得老病。詎足稱最靈。而君復何爲。疲茶非康寧。目視亂白黑。奇瘡出潛丁。飲腸日以狹。永夜甘獨醒。南方多奇藥。芝朮餘芳馨。引年亦多術。何必非豨苓。往昔志讀書。苦心過聚螢。期以怪幻聞。豈祇辨文麗。斑白乃自悟。有爲皆濁腥。古來豪傑士。蒲盧祝螟蛉。埋骨蒿艾間。鬼火猶青熒。孰知出宇宙。浩蕩浮滄溟。翳昏照白日。幽蟄驚迅雷。道心不可傳。法語容親聆。懷君意無涯。永望幾涕零。寄書南飛鴻。矯矯雙翅翎。

送楊祕丞

結髮仕明世。四十列朝籍。漢庭殊多賢。向子每歎息。羈旅間何闊。相逢頭已白。車馬故匆匆。復爲北州客。蕭條大河渚。疲瘵空城域。思得愛人長。而君著吏迹。去思常藹然。所居不赫赫。推此化百里。坐當致繁殖。

常服子路言。有志千乘國。饑饉師旅餘。可使義且力。由來騁騏驎。歷險始盡識。尙恨此中小。頗復拘繩墨。太平進取難。子雲嘗執戟。金張許史間。無所用奇策。不如課農桑。絃歌樹風績。無由之武城。贈詩慰相憶。題孫昌齡歸來亭

丈人髮如漆。筋力不知老。七十置官歸。時人以爲早。多公逍遙志。所向豁懷抱。雖云容膝安。不減專城好。忘機睨雲水。寓興植芳草。世故不經聽。塵軌從卻掃。壯子官瀛洲。濟美擅詞藻。親歡適爲主。家事意承考。古云陶淵明。避俗非達道。息交以絕遊。自處何枯槁。公爲鄉先生。里邑每傾倒。一言可鎮浮。不啻千金寶。宦遊失門戶。驚蹇悲棧阜。祝身得如公。每食心再禱。

江南田家

種田江南岸。六月纔樹秧。借問一何晏。再爲霖雨傷。官家不愛農。農貧彌自忙。盡力泥水間。膚甲皆瘡瘡。未知秋成期。尙足輸太倉。不如逐商賈。游閒事車航。朝廷雖多賢。正許貲爲郎。

寄題蕭山歲寒堂直已亭

我兄昔高第。時論推捷敏。由也政事科。五人實親近。古者邦諸侯。今之縣令尹。試材非不難。善政知所蘊。投虛刃若新。利剗鐘已泯。遂馳能者聲。肯作俗士窘。高堂久頽挫。往者嘗隱忍。卽事新棟梁。開軒凌隱嶙。後凋拔天材。破的見標準。山川濯襟塵。藥餌紆客軫。嗚呼九州間。勝事豈有盡。向觀松檜姿。稍欲死蒿莖。始知巖穴士。自古須汲引。願賦嘉樹詩。爲公廣招隱。

與亭

構亭彼爲誰。高士自相與。與遊皆可人。與言是真語。與醉不獨醒。與歌從和汝。與忘形骸迹。與偕同出處。實與不待求。久與非強許。世塗異冰炭。咫尺或齟齬。開此與者風。寧當轉棄予。

次韻穆父送仲至使北

結束大使車。張旛理輕策。八荒已信浮。萬里無直責。由來昆弟歡。庸非一日積。冠帶引弓民。長城限疆場。邊人安晝眠。老不逢鬪格。將帥剽甲兵。褒衣垂鞞纒。金繒出王府。百萬載書籍。候館如魚鱗。相望交國客。外門名家駒。長大儼且碩。誦詩三百篇。豈減崔亭伯。斯焉思無邪。羣書矧探賾。指掌幽冀州。左右皆阡陌。皇華一何遠。區脫爲我役。前驅弩在羈。郊候抹紅額。天聲暢無外。不必關塞斥。但看書同文。依然具點畫。夷羞珍湏酪。胡舞喧匏革。獵圍得狐兔。割鮮亦奚擇。儒生自古貴。忠信行蠻貊。雖今博望侯。何敢輕逢掖。

西都大內作

太紫異垂象。河洛殊出符。卜食綿往祀。宅中雄別都。旋宮千萬門。層城十二衢。佳麗帝王州。爽塏神明區。過位思自飭。簷闕在必趨。璫璃映瓦翼。瓊琅耀金鋪。白日互蔽虧。涼風倏來蘇。仰視制作雄。疑有神物扶。始知壯麗功。不使來世踰。擇材自千章。銜巧非一圖。儻無日新美。何以除規模。西賓尙餘諭。望幸猶踟蹰。何當樹翠華。萬玉趨赤塗。

慈孝寺送顧待制次韻和孔舍人

丈夫老益壯，鬢毛豈知秋。多君志慷慨，不避千里遊。躍馬過黃河，北視三四州。要官在東序，河圖間天球。古來功名人，未就不肯休。譬如鑿空使，尙致安石榴。況今南畝民，往往東西流。還定安輯之，千倉仍萬輜。新作西池，呈王守。

清源注長波，縈回十里內。泓澄鑒羣物，雜細分毛介。旱歲未嘗減，隆冬方可愛。傳云五龍舊，疑有神物在。惜此去人近，久隨荆棘廢。賞心一朝同，版築四面會。鑿池兩漢集，抗榭羣山對。種花漸成蹊，栽竹俄自倍。荷芰入四鄰，鷗鳥盈千輩。魚遊明鏡中，人語紅塵外。眷茲仁智樂，況乃登臨最。滄浪歡濯纓，藥餌勸飛蓋。訟閒固材勝，神逸自形泰。願言載筆間，屢得從公邁。

泛舟

出郭已清思，浮舟暫長嘯。水雲兩涵泳，青翠相照耀。賞心隨值遇，物色相顧召。逍遙忘迴期，頃刻攬衆妙。白鷗亦知機，潛魚不可釣。飛沉信樂然，迴首寄一笑。

和黃節推陪王守泛舟

清池堪百畝，珍木多十圍。灌泉昔未盈，移樹今更肥。境豁自心匠，宴游及韶輝。居然坐高齋，不減臨郊扉。青旗貫凍酒，春服成單衣。游人半童叟，好鳥偕鳴飛。彤襜照銀章，賓從相因依。置觴面高軒，密坐羅芳菲。清笳急鳴鼓，紅粧耀暉暉。澄潭止可鑑，畫楫相與揮。曳裙載筆簡，自顧才也微。之子傾蓋賢，賞心諒云稀。長歌善必賡，舊令繁勿違。徒令夕陽暝，不醉終無歸。

舟行

川形直如線。川水疾如箭。扁舟急鳴櫓。頃刻異州縣。晤語不及聞。注視目已眩。川后扈予橈。黃鵠莫我先。客行自超越。快意令人羨。寄語幽并兒。勿誇鞍馬便。

題卞大夫西湖所居

獻玉晚見售。刺虎有餘勇。宦游四十年。老髮成種種。乘軒非不榮。半刻未爲冗。而有田園歸。末路益光寵。平湖澹空闊。古木俱秀聳。樵斧間漁舟。稻畦連麥隴。田舍易所求。達生厚自奉。晏眠勝飲冰。一笑異將恐。予亦濩落人。不知物外重。賣書問東家。此計行接踵。

重用前韻贈卞大夫

辭滿苦不早。獨往始爲勇。聞君湖上田。二頃容五種。力農有休期。雜費寧謂冗。歲事副夙心。素封彌假寵。若人壽者相。眉豪耳秀聳。陶公請息交。林類歌面隴。諸侯非得友。明詔期不奉。叢茂鳥所安。淵深魚勿恐。由來浮雲志。九鼎未加重。胡爲突不黔。憔悴摩頂踵。

江行

移舟次北渚。風水亦有說。隱几見羣山。昂頭看新月。田舍煙微茫。江舡火明滅。夕陽歸鳥盡。入夜人語絕。勞生間憂虞。各自有怡悅。趣取一時歡。誰能問蠻越。

題劉義叟著作澤州園亭

王屋連太行。重關束其左。自古悲摧輪。多君識高臥。鑿泉深百尺。養竹成萬个。詩書滿高屋。談笑驚四座。人常求贏餘。世每敝名貨。看君逍遙風。陶阮不遠過。

次韻

落泉無時休。洩雲常自還。居然萬峯秀。共此亭戶間。擘華力何壯。鑿隴巧已艱。造幽非近規。會心寧愧顏。朝扉面蒼蒼。夜枕聽潺潺。蒔以松桂藁。葱翠皆可攀。長歌發真賞。錦繡先爛斑。座客齊起予。清玉聯玦環。夙齡慕遠遊。未能遍人寰。學仙理茫昧。遁俗事間關。風波天一隅。不到三神山。終當振衣往。對境聊自閒。

賀吳九

儒術喜迂闊。學官每留滯。君侯誠百一。才智兩自異。新書三十章。慷慨天下事。每聞一篇奏。左右稱萬歲。峨峩蓬萊山。冊府上帝祕。紬書必英才。念子方歷試。前此三數公。致身自容易。心知青雲路。已識翰飛地。豈獨鈆槩間。是正瓊瑤字。顧念傾蓋交。寂寞彈冠意。

盆池

覆杯坳堂上。兒戲種蓮芰。自憐守甌石。及物功已細。蟲魚共涵泳。蘋萍生自恣。清澄照毛髮。列宿鎮三四。炎風久無雨。淮海日騰沸。豈不潛蛟龍。莫肯救憔悴。惜哉萬里波。貽此升斗愧。人當問能否。何必嫌小器。

贈黃安期推官〔案〕敝本傳。從知兗毫二州。吳居厚代爲轉運使。奉行法令致財賦。乃追坐放廢弛。黜監衡州鹽倉。詩內言我來衡山陽。當卽監鹽倉時也。

退之謫陽山。始得區生喜。其後遷揭陽。頗復稱趙子。窮荒非人境。瘴海絕涯涘。親識久去眼。此言不到耳。所歡誠易爲。未必盡洵美。諭如逃虛空。聞人足音爾。我來衡山陽。情況本異此。一意等萬殊。何嘗分遠邇。四海皆兄弟。蠻貊固州里。而於擇友間。頗戒不如己。乃得黃夫子。風韻淡如水。爲學本之性。言文貫於理。遺我累幅書。磊落字盈紙。不詭亦不矯。不華仍不俚。胡爲連城珍。韞藏匱與甌。賞心一何快。區趙非所擬。昔我在朝廷。嘗得二三士。聲名未振發。自任以爲恥。于今復何能。有志而已矣。譬將助飛遷。身方在泥滓。作詩寫吾心。詞殫意未已。

同韓持國遊五嶽觀時原甫暨諸公先在因寄江鄰幾梅聖俞

簡服車馬輕。出郭塵埃遠。況茲偶同好。慵惰重推挽。壽宮如屯雲。重門謹關鍵。五城十二樓。瑤池芙蓉苑。境深日遲永。天近春纖婉。異花秀燁燁。弱柳垂宛宛。初從鈞天游。列帝皆龍袞。俗骨已屢驚。凌虛翻自忖。卻逢桃源客。笑語何繾綣。尙留樵叟棊。競勸胡麻飯。金醴泛餘杯。芝英餌豐本。平生此遊勝。餘恨相知晚。重來恐已迷。盡興仍忘返。羣公謫神仙。吏隱亦肥遯。尙平夙昔志。讀易明益損。寧知五嶽期。不待越崖巘。何當謝羈束。相與同息偃。

夏夜露坐

林臥霄露清。仰觀衆星暉。上天垂光彩。樓觀何參差。閣道絕銀漢。華蓋臨紫微。凝神雲霓表。忽與汗漫期。整衣闔闔門。濯足牛女磯。酌酒援北斗。鼓箠招南箕。極意謝囂煩。塵世良喧卑。

雨後

雨後炎氛減。空堂起清涼。蕭蕭野風聲。淡淡孤月光。晚睡夢亦短。常苦秋夜長。停燈覽羣書。坐以待未央。鷄犬互爭栖。鄰里舂黃梁。中夜寂無喧。蟋蟀鳴我傍。

送福州范文學兼寄張宜

山林忍長飢。君門不易入。今時行路難。自古志士泣。范生岷峩秀。學古名字立。流沙萬里駒。未恨晚羈紲。一命吏甌越。扁舟去鄉邑。文學亦備員。海禺更卑濕。揚帆下三峽。南斗安可挹。問津頗浩蕩。蹈險實蹇澁。吾聞養賢俊。不但糠粃給。乃知黃金臺。始隗衆士集。送行勿惆悵。人壽期七十。古來功名士。白髮亦可及。因君謝張老。青紫未易拾。且當黃鵠舉。不爾玄蛇蟄。

送孫巨源

衰老不擇交。傾懷未嘗悔。非吾相知心。亦有中獲罪。誰能若楸柏。雪霜不變改。自念孤劍心。炯然鎮長在。識君始恨晚。及此將十載。相與忘形骸。依然見樂愷。翔鳳刷羽儀。天真輝文彩。清泉濬長源。濫觴已自倍。乘間輒相過。慰我胸傀礪。使我意軒昂。脫我中心瘕。今君官南州。揚帆盡淮海。腰綬盤青綬。兒衣間繒綵。蘭羞當及時。倚門方有待。一值歸飛鴻。寄聲尙無怠。

登城望山

城隅見連山。蒼翠橫座中。白雲卷霄漢。千疊張屏風。此地有佳致。望望情不窮。忽如出塵寰。相對前後峯。

古牆有石色。草樹仍蒙籠。樵隱事不一。養痾方易容。

同謝二兄弟游城南王氏園坐竹中水上

昧旦從吏役。中昃旣休閒。慨然田野興。策馬從近關。謝公雖朝裾。雅意存東山。相期物外游。待我季孟間。晴陽煦烟郊。藹藹春氣還。南溪已浮冰。亂石聲潺潺。意得境彌好。形勞心詎艱。名園得暫息。奇樹多可攀。去水貫林竹。脩篁夾澄灣。波光龍蛇行。微風鳴佩環。窄徑偶深入。交柯存勿刪。並流一長嘯。照影清心顏。勝事豈有盡。向此同蒨菅。發興自我輩。忽如遠塵寰。嚴城迫歸鞅。夕陽稍朱殷。後游期不忘。秀卉春爛斑。

潁州始居

伐樹聖不憂。奪鬲賢不差。士生志四海。外物非預謀。乘流旣孤逝。擇廕方暫休。俱非田園歸。而媿鄉黨投。卜室遠人境。開門面良疇。車馬寂不喧。水火仍易求。主人邦之良。高義逾九秋。傾蓋仍舊交。食薇亦願留。如何干旄詩。千載令更酬。

春菴所居

貧賤智不遠。終年謀一身。北堂甫成冬。西軒已送春。開窗納清風。掃地祛凝塵。今是覺昨非。會意成日新。一悟蓬華興。寄言當世人。時事亦寒暑。無爲迷舊津。

寄傅推官堯俞

三川帝王宅。二周冠蓋都。上公釐德化。多士盛中區。是年詔有司。使獻賢能書。傳納事匪易。吾與夫子俱。

率馬仰馱驥。治玉慙礚礚。同舟共艱難。傾蓋聊歡娛。浮雲儼高冠。白雪紛長裾。馳辭若波濤。掌握皆明珠。詆訶詎敢然。倚辦實有須。從子驂之靳。相與步驟趨。棘園似南宮。大暑臨通衢。不遺老成人。頗多君子儒。丞相顧而歎。里閭共稱譽。狂士或妄談。衆人皆擲揄。至今頗自矜。快意勝過屠。不言世所無。請問誰弗如。微官苦繩墨。離別天一隅。向風願相從。不及單飛鳧。雲中多賓鴻。河中多鯉魚。契闊誠未忘。寄聲當勿疎。

和原甫同諸公飲郇公園

車馬何籍籍。相從城南陌。大第鏤名園。朱閤間素壁。卽事覽勝槩。撫舊歎陳迹。零落歸山邱。慨吒西州客。春風幾時還。顧盼生顏色。雜英綴初紅。宿萸吐新碧。故池無還波。喬樹實自昔。賞心及茲辰。緬想締構力。十千置尊酒。玉斗雪霜白。飲醉半歡哀。浩歌懷感激。天地亦旅人。川谷故變易。歡娛瞥過目。百年猶暫覲。卽今西馳暉。稍復向禺昃。我輩不盡興。將爲後時惜。

潁州和永叔

羈鳥能擇木。游魚知赴淵。飛沈豈異志。行止私自憐。玩世本無術。辟人庸得賢。卜居幸樂國。負郭依良田。心與地俱遠。我徒共熙然。生涯亦何有。聊以忘吾年。

送謝大城南還遊集禧觀寄謝大得箕字

驟雨墮河漢。烈風振南箕。秋陰變蕭爽。重此田野期。森木蔽巖籟。交流會清池。幽鷺起豐草。鳴蟬嘒喬枝。客車忽已遠。樽酒難重持。誰令語言適。架作別後思。夕霽歸馬輕。叩戶仙真祠。羽人披衣笑。官殿涼參差。

黃鵠自飛來。青竹方可騎。相從豈無術。望君隔前陂。

書懷

幼學慕高遠。讀書不求解。志爲逍遙遊。恥以聲名賣。寧從子桑簡。不願伯夷隘。未常憂瓠落。豈復顧機械。遯時良無悶。涉俗適得怪。但使心休休。那論行夫夫。世塗劇坎穽。人理甚蜂蠆。低顏費將迎。非意成睚眦。鐵冠喜彈畫。法吏樂冒絰。洗濯出癥瘕。丹青恣描畫。抗言畏不傷。奉職謂匪懈。指擿本無瑕。銷鑠緣鼓鞀。羣嬉更嘯呼。鬪巧逾狡獪。抵巇加捷翻。取必期稱快。上恩初優假。一眚猶縱解。雖蒙三面寬。未免六翮鍛。全生愧液楠。有道羨瘖聵。失馬未必悲。墮甌何足喟。后皇物羣生。大塊爲之噫。在盈或時虧。有支那可壞。行葦無踐履。甘棠勿翦拜。猶將采葑菲。詎有棄菅蒯。寧當置韶濩。始欲薦任劄。厭飫椒與蘭。玩惜饅而餲。宿名守枯槁。知命遺芥蒂。猖狂蹈大方。屈服嗑若喝。腰舟雖云慎。吹壘亦已憊。既往誠無追。有來當自戒。蕭蕭鬢毛改。杳杳歲月邁。愚謀向千失。晚悟猶一灑。龜手世絝紉。支離保鍼劑。嚮渡學操舟。閉肆從問卦。念皆賢者爲。亟聞古人話。有田倚江湖。往歲成畝澮。還歸豈無圖。緒業頗未敗。采菰仍得魚。種榆因及薤。小屋蔽蓬茅。大困輸精稗。逢迎具壺漿。稱貸償私債。暑從泉流濯。寒有簷日曬。何苦事明經。區區矜地芥。

剝棗

棗下人不行。四旁生蒺藜。秋來見成實。粲粲青紅垂。敲樹落碧瓦。濺石投赤磯。紛紛競口實。聊混兒女爲。樹上已空枝。樹下亦有蹊。人事但如此。桃李真自欺。

彭城集卷七

七言古詩

赤甲競渡

古潭蒼蒼照毛髮。龍藏水心波色活。風雷如在石壁下。有時雲雨何倉卒。今年天旱百昌死。神物亦恐俱埋沒。南人厭龍抱珠睡。駢舟伐鼓探龍窟。皆言龍驚當上天。九河翻雨石湧泉。君不見朝來積水上。魚鼈死盡龍安眠。

醱醺軒雨中

積雪猶殘雨復新。正朝日晦只逡巡。浮雲未省見白日。細草何事知青春。杖藜苦恨泥污客。解衣生憎寒著人。遷鶯來燕勢未可。天意靳靳留芳辰。

在郡作 〔案〕本傳。啟曾爲京東轉運使。又從知兗州。此詩云。今時督府雄漢魏。魯國太山四千石。當係此時所作。末句云。乃不及舞文巧詆爲詐忠。豈受吳居厚之譖。將去時作。

朱門深沈十二戟。高槐蔽庭有佳色。今時督府雄漢魏。魯國太山四千石。讀書作文五十年。齒牙脫落頭半白。平生心事竟何許。袞袞簿書爲報國。吾衰不復夢周公。聞道家邱居在東。垂老纔爲少司寇。殺一正卯那爲功。詩書誤身旣可信。却憶扛鼎之重瞳。宰割山河一何壯。指麾天地如回風。背關懷楚更齷齪。沐猴而冠塗遂窮。區區諸老爲城守。頭臚曉入旌旗紅。魯人之臯乃自昔。猶復絃歌一畝宮。聖賢萬事盡有命。世人何用誇材雄。府丞久吏掾史健。時雨霑足年穀豐。深居閉閣不復出。曲肱甘寢日正中。昔聞汲黯淮陽亦如此。乃不及舞文巧詆爲詐忠。

楊之美彈碁局歌

漢皇初厭蹙鞠勞。侍臣始作彈碁戲。東方諸公盛得名。魏文以來稱絕技。後宮粧奩乃可爲。客著葛巾尤更奇。誰令朱墨異貴賤。百世紛紛無已時。君從何處得此局。石理溫華瑩寒玉。山形四隕澗谷深。別將望秦森在目。少年博戲日益新。古事不復傳今人。君能興此亦先覺。辟雍老儒悲絕學。

過王氏弟兄

出城問窮僻。負郭正瀟灑。主人著書長閉關。嘉樹當門宜繫馬。下馬上堂還讀書。新詩古琴雙起予。昏鴉棲雞欲斂翼。興盡將去猶須臾。徒見城中軒冕客。不如吾人一逢掖。安得茅茨同里居。子在東阡我南陌。和陸子履魚膠亦名阿膠。可以羽箭。又宜婦人貼花鈿。

漢家金縉撫絕域。遠夷畏威亦懷德。南琛北珍不自惜。譯官賈人多未識。此膠出從遼水魚。居人釣魚取。

專車秋風時節候可折。白羽鋪綴隨呵噓。赤車使者來穹廬。繡鞶玉珎通函書。黃河之清那可埃。美人紅袖應時須。丈夫辛勤萬里外。少婦深閨苦凝待。京兆眉懶傳長安。翠鈿彩飾令人愛。鳳凰得髓麟取角。將來續弦不覺更嗟珍物空傳名。欲倩張騫問方朔。

● 昭君怨戲贈

武皇聽歌長太息。傾城不難難絕色。連娟脩嫫果自得。三十六宮寵無敵。君不見孝宣既沒王業衰。優游時事牽文辭。延壽丹青最叵信。無鹽侍側捐毛施。此時昭君去宮掖。邊風侵肌雪滿積。穹廬旃牆燒燼。琵琶怨思胡笳悲。猶憐敵情不消歇。子孫累世稱闕氏。傳聞漢宮翻可愁。紈扇綠衣長信秋。燕啄皇孫兩悽惻。當時無事成深仇。覆杯反水難再收。深淵瞬息爲高邱。塵沙蕭條猛虎塞。邊民獨記和親侯。

春日

春波淫淫泉脈清。捷菑作擔芳草生。女桑柔弱欲動色。落枝投斧聲敲鏗。山前一雨杏花白。布穀來往相和鳴。鞦韆繫樹徑路熟。童稚翁媪歡逢迎。田家此樂世豈知。人生所急食與衣。計謀雖拙日有效。筋力無餘身得爲。

幽州圖

鄙夫平居常歎息。薊門幽都皆絕域。安得猛士守北方。力排敵人復禹績。田生手攜朔漠圖。丹書萬里之強胡。掛圖高堂素壁上。壯或陰山來坐隅。長城迢迢屬滄海。古塞歷歷生黃榆。縱橫指顧皆舊物。撫事忼

慨時驚呼。太平壯士多虛死。念君避胡來萬里。九關深沉虎豹惡。布衣何由說天子。卷圖還君意黯然。咄嗟世事非余恥。

送王仲素寺丞歸灊山

〔原註〕名景純

灊山隱居七十四。紺瞳綠髮初謝事。腹中靈液變丹砂。江山幽居連福地。彭城爲我駐三日。明月滿船同一醉。丹青細字口傳訣。願我沉迷真棄耳。來年四十髮蒼蒼。始欲求方救憔悴。他年若訪灊山居。慎勿逃人改名字。

汲潁水

城中鑿井非不深。苦泉欲飲先煩心。天生潁水似碧玉。盛夏一酌逾千金。野童挈壺不盈斗。清能照眉甘適口。未曾一飮過閭里。猶以空餅累川后。

次韻范內翰西圻老人詩

大行宮車千乘強。翠華晚駕煙蒼蒼。龍髯墮地長秋草。白雲悠悠飛帝鄉。先驅軼出塞門外。天宇寥廓初無傍。淒風疾雨走道路。萬靈奔走誰非常。漢家德澤徧四海。戎夷執紼虛邊疆。鸛飛啄息願效死。以彼壤穴皆容光。詞臣宗功筆力壯。感激願遇思揄揚。周宣中興在雲漢。武皇最著惟宣防。道旁老翁話舊事。面目黧黑情摧傷。賜縑如雪身獨得。無衣自幸方同裳。桑田變海不可測。慟哭白日悲風長。君不見封禪之君皆不死。豈以衣冠之墓疑軒皇。

和蘇子瞻韻爲石蒼舒題

長安材豪雄五都。五陵意氣誰能除。作人不入游俠窟。寓興聊從草隸書。崩崖壞山出衆寶。石刻鼎鑄周秦餘。江東諸家擅逸氣。宜官鍾蔡幾不如。騰龍翥鳳動光彩。淥池滉漾華芙蓉。石生臨書得微妙。神凝意會下筆初。濃纖巧緻若出一。老庖利刃投空虛。人間流傳不得辨。錦囊玉軸爭貯儲。以茲得名號醉墨。聊取勝事題精廬。豈與西山少年輩。射獵狐兔夸里閭。杜陵詩仙有祖風。筆灑雲霧揮瓊琚。我今才薄厭數語。勉力和歌慙起予。

傅堯俞草堂歌

漢朝名臣有傅伯。諫諍由來犯顏色。蘭臺下筆不自休。義陽封侯勇無敵。石渠作者承明直。虎符今爲二千石。邀我請賦草堂詩。草堂欲歸那可得。太行之上無高山。濟水之外無清源。聞君築居山水際。清高正爲君家言。上有無心之雲出幽谷。下有勁節之竹森寒玉。四鄰空地猶幾許。容我東西一茅屋。

虎子

秦山十月朔風起。寒巖蕭蕭虎攜子。樵蘇繞山不敢採。赤豹黃熊相向死。關西少年勇似飛。白羽利鏃黃金機。解胸陷脰心應手。功名一決何辭危。坐皮食肉已自快。況復猛毅充提攜。雄姿英氣實少並。不堪籠檻長羈縻。至今求食每搖尾。摧剛遠害誠其宜。君勿愛澤麋山鹿大如馬。牙角雖具無能爲。阨窮隱約豈足諱。曾見白額跳跟時。

和李公擇題相國寺壞壁山水歌

蒼山本自千萬丈。怪爾斷落盈尺中。枯松挂崖正矯矯。白雲出谷方溶溶。憶昨高秋十日雨。百川湧溢騰蛟龍。丹青壞劫不可駐。金碧拂地俱成空。人間流落萬餘一。掇拾補綴幾無從。當時畫手合衆妙。得此誠是第一工。松陰行人何草草。禿幘小蓋馬色驄。長塗未竟不得息。嘯歌正爾來悲風。巨靈擘華疏黃河。夸娥移山開漢東。海波芥子互出沒。大雄遊戲神與通。我今與君未嘗覺。指視壁畫將無同。新詩飄飄脫俗格。得閒會復來從容。

空同

汝山不高鮮喬木。汝水不深無巨舟。荒草連天荆棘壯。土脈疎緩多廢疇。三年力耕食不飽。一時不雨人相憂。負薪代炭集市井。耳聾眼瞑垂白頭。土風薄陋趨向狹。一金之子稱良謀。百年人物可料數。里閭未見興公侯。君不見廣成昔從空同居。猗玗亦云隱商餘。千年兩士炯若日。希世之才安可誣。

畫龍

南人謁雨爭圖龍。畫師放筆爲老雄。煙雲滿壁奪畫色。雷電應手生狂風。觀者皆驚牙爪動。攫拏意似翻長空。吾疑奮迅出戶牖。何事經時留此中。共言葉公初好畫。當時亦有神龍下。天意爲霖非爾能。世俗慕真聊事假。

冬

蜂房割蜜留度年。中林置置長擊鮮。朔風吹空塞北戶。束薪明暖初無煙。缺籬補疎已乍密。敗屋髣茅元自堅。官租事空不復出。積雪塞徑長書眠。田家此樂不知老。兒孫滿前俱壽考。世俗榮名多變更。不似田翁一生好。

蘇子瞻家畫松圖歌

君家圖畫皆所見。近得此松尤可羨。根蟠平石蹙蛟螭。幹出青冥起雷電。樛枝橫斜復幾尺。綠葉茸茸鋪繡綫。空堂深沈白日寒。謾謾似有風吹面。此圖翦裂人不知。塵外分張數流轉。能令神物還相從。非君苦心誰與辨。更惜良工名不傳。可憐世俗多夸衒。爲君作歌君志之。後千百年無復賤。

赤甲祈雨是日獲之

君不見赤甲之淵色如墨。中有神物不可測。潛雖伏矣。心念國。翁忽變化誰能識。五月亢陽裂金石。婦女悲號望膏澤。簫鼓甘香樂靈德。須臾晦冥天正黑。風雷礮轟震穹碧。霧雨滂霏掃炎赫。生物欣欣動顏色。樵童牧豎亦歎息。千秋萬歲無終極。

市朝

市朝老去無希慕。枕簟秋來覺靜便。何事連宵夢顛倒。猶應三世業攀緣。螭蟲飽足尸鬼健。尙寐翻令愛不眠。

貧交行

貧交多相憐。富交多相捐。貧富尚不保。死生安可道。人能無以聲利爲。貧交富交皆不欺。君不見蕭朱隙末張陳死。惟有管鮑真相知。

古信陵行

薛公藏賣漿。毛公藏博徒。侯嬴抱關叟。朱亥市井徒。我思信陵君。下此四丈夫。富貴胡爲棄。貧士能令君存爲君死。

方仕致仕

在家出家古有此。方仕致仕吾自嗤。晏眠足當几杖賜。散髮每從田野期。息交便爾賓客絕。省事何說課最爲。山濤非隱亦非吏。仲元不惠仍不夷。

北門行

慕道逍遙遊。不作枯槁語。二年客都城。卒歲厭貧窶。乃知北門詩。聖人亦有取。自於萬事捷若機。今日已晤前日非。五月披裘不取金。放歌會採商山芝。

衰老

蒼耳嬰未疾。浴蘭殊未解。泉耳傳愈風。及秋始堪采。惟昔沙塞陰。偶從羊負來。葡萄安石榴。安可同語哉。雞雍與豨苓。適用卽爲貴。何必黃金盤。磊落薦滋味。老人學道破諸妄。猶有塵緣爲疾恙。安得澡身并澡心。使我有意煙霞上。

次韻孔常父

老翁衰遲爲日久。自知不是文章手。紫微熒煌十二星。青閣彤庭掖垣右。誰令孤翼此飛棲。正似枯槎犯牛斗。諸公可親復可望。黃鍾渾宏秋水光。但論四海矧故鄉。清詩翻翻鴻鵠翔。願言與子同升堂。

太液池

建章宮中太液池。水象星漢波漣漪。鳧雛鴈子相羣嬉。黃鵠來翔金爲衣。主人勿惜和梁恩。主人勿矜羅網繁。暫來可見不可親。乘風一舉超崑崙。

送原甫帥永興

讀書當爲王者師。論兵要作萬人將。古來志士希兩遂。白首儒生彼無望。騏驎一出凡馬空。豫章蟠根歲逾壯。金華事業爛然新。徂西謀謨誰與讓。旌旗蔽日紅半天。笳鼓隘塗車萬兩。中軍令出聽無譁。秦山渭水皆東向。荒夷懽威霜雪明。屬城陽和春日亮。趙張成事不足論。方虎遺詩猶可尙。龍文金鉉待調飪。璿樞幹中付羣當。西人歡歌公肯留。公車雙鹿畫轡上。

晚起

黃昏就枕日午眠。入春夜短常獨然。不嫌時世欲無覺。每爲身謀私自憐。夢爲嘉魚潛九淵。夢爲飛鳥翔高天。喜來寢覺了不辨。安知此興非神仙。

漁翁

老翁年侵耕作苦。官田稅多不敢住。身攜兒孫事漁釣。編竹爲家寄江浦。朝尋菱芡逗煙水。暮飮魚蝦宿風雨。人生如此亦自由。何用車馬稱公侯。

和羅著作漁翁

漁翁結網求魚子。得魚滿船心始喜。豈知陂池水不深。但有鯢魴少魴鯉。漁翁結網安得疎。漁翁用力常有餘。心疑他人得厚味。滿眼看來池無魚。古來任公不如此。期年得魚雄濶水。龍伯國人連六鰲。二山漂流不能止。由來萬事不同調。說似漁翁翁必笑。

大風

朝風吹沙天宇窄。暮風吹沙地載薄。視天昏冥畏其壓。視地震蕩憂其坼。一春三月風不息。跼天踏地勞筋力。波濤翻空礚礚怒。行路之難行不得。安得重雲十日雨。洗眼去眯分白黑。

初調江陰主簿

小來讀書非爲名。約身不肯遊公卿。祗憐狂簡真吾黨。謾有文章慙老成。漢廷好武臣尙少。郎官十年不見調。青衫黃綬赤詔除。落拓敢辭流俗笑。

送直史館孫兵部知陝府

侍臣數厭承明廬。太守何妨太史書。十里九坂二殺道。駟馬高蓋朱輪車。分陝已信召南貴。補郡詎比平原疎。諫垣風彩東觀筆。不待上計看回輿。

湘中阻風

十月北風不肯回。湘中白浪高成堆。小如飛鷗大奔馬。一輩纔去羣復來。一旬陰雲色死灰。劃劃掀簸初全開。晨陽照空幸澄澈。蜚廉暴怒猶喧。繫舟沙渚依曲隈。歲晏永路真悠哉。棹夫卷縮亦何恨。時乎寧有材不材。

欲雨寄張壁

北山雲起南山雨。返照卻見南山樹。逆風燕子能疾飛。隔葉黃鸝猶獨語。憶君池上波悠悠。憶君翠竹聲颼颼。興來冒雨故相視。薄暮雷電歸何憂。

寄楊十七

楊侯論詩銷我憂。昔歲相逢偕旅游。梁多長者不虛語。傾蓋結交子所求。三年契闊意不展。歎彼栖栖爲藪幽。窮愁著書亦自足。有策肯說東諸侯。長安富貴易反掌。末路功名猶捶鉤。天公於予豈愛惜。由來萬事非人謀。陰風朔雪五湖凍。歲窮高臥思同裘。

春寒

越羅裁衫春服新。寒爐委灰無復溫。天桃著花紅滿檻。弱柳吹線青映門。豈知天事有反覆。假借專物矜餘恩。平明雪片白似玉。敗裘死灰仍紛紛。女桑吐葉蠶欲生。東郊草綠方趣耕。玄冥欺人人弗信。百蟲蟄蟄雷已驚。沈陰驅除坐可待。白日隱隱浮雲外。

清明東風零雨頻。曉來料峭寒著人。人言天事不可測。欲回暮春成早春。花紅柳綠皆自若。一氣變化宜有神。漆園老人惜光景。求術卻老無聲影。忽聞春有再韶時。亦覺身當還壯境。花前一酌心熏然。敢道朱顏非少年。

戲謝師直買伊陽田

維陽東周蘇子賢。兄弟馳說雄當年。一身曾兼六國印。舉世皆羞二頃田。君才十倍鬼谷子。碁年已出揣摩篇。公侯將相可自致。何竟高蹈伊陽川。

陽翟賈人歌

潁川陽翟趙邯鄲。大衢如砥車班班。重裝富貴名游間。輕執寶玉高若山。關西王孫龍虎驅。此中奇貨奇可居。千金入秦藉短策。立談須臾分王符。華陽松柏成高邱。壽陵蔓草令人愁。沈沈相府士如市。山東供事河南侯。

和王平甫韓幹畫馬行

韓幹畫馬出曹霸。得名不在陳栩下。詔令師栩辭不可。苑中萬馬師在我。王侯讀書愛此言。由來能事須天然。看圖作詩寄慷慨。錦文作字珠聯聯。乘黃驥裏久埋沒。安西大宛路超忽。丹青能令千萬年。不比燕人空市骨。霜蹄踣鐵真權奇。耳截筒竹稍垂絲。超然挾後三十尺。一日千里御者誰。舐筆和鈇人所同。爾今獨成第一工。神凝意會不可料。天駟降精來此中。少陵作詩譏畫肉。惋惜驂騮氣凋縮。未知良工嘗苦

心空使時人爭賤目。九臯相馬觀天機。神駿不辨黃與驪。君知畫手貴自我。何若相法非有師。拙工俗子紛紛是。畏避權豪如畏死。生棟濕塗多覆屋。巧書掣肘真難使。吾知君詩正如此。丈夫特立嗟已矣。

次韻蘇子瞻韓幹馬贈李伯時

韓幹畫馬名獨垂。冰紈數幅橫素絲。諸公賦詩邀我和。我如鈍椎逢利錐。區中纔容三萬里。正可騷裏一日馳。朝燕暮吳亦其亞。幸得夷路無繫羈。此間三馬皆國馬。瑰資逸態成崛奇。有如秋空見霜鶴。下睨衆禽俱伏雌。良工苦心爲遠到。天機要眇潛得之。區區駑駘浪自負。豈可醜骨包妍皮。李侯洒筆定超詣。尙有天驥君未知。宛王母寡今授首。汗血不敢藏貳師。

送程少卿〔原註〕江西轉運使

使君舡舸如浮宮。蕩蕩帆影垂白虹。苦無三江五湖水。安見一日千里風。長蛟巨魚遠避去。水府泉室深玲瓏。使君按俗不異此。意氣自覺凌虛空。滕王閣前流水白。西山落日銜微紅。城頭臺榭眺望極。玉壺置酒光融融。勝遊重臨不隔歲。塗歌巷祝歡南公。作官得此亦是少。況復章綬彌尊崇。南金折鈎富九鼎。荆揚塗泥多歲豐。會令利術析毫末。萬古江流常向東。故鄉秀水三百里。送遠遊子情無窮。遙知躡履待高士。安得羽翼隨飛鴻。

懷信驛亭晚望題其楹

吳橋東風曉來入。楚客齊橈暮去急。行人西。行人東。逢迎送歸景不同。夕日春煙一望中。

戲題西湖中魚

重明水深波洗空。嘉魚萬族連西東。鯤鯢細碎長者惜。赤鯉成就隨飛龍。南風吹雨中宵雷。衆鱗不去真常才。魴魚如玉鱠第一。安得大網相隨來。

盆山

青泉盈池底白石。中有高山高不極。連峯絕壑知幾許。朝霏暝煙無定色。山下清波清淺流。魚龍浩蕩芥爲舟。今君欲渡何由得。縱有神仙君不識。

出門無馬行

市兒暮歸錢滿把。田翁秋收禾滿野。人生勤苦必有獲。天事豈常遺拙者。鄙夫能言知讀書。十五著論驚羣儒。文章不作少壯用。白髮垂領皮肉籠。作官不如閒日多。得祿無若飢寒何。百年陳人誰比數。滿眼貴士難經過。欲爲揣摩心智短。欲學造請顏色赧。黃金難成丹砂貴。紫芝將秀白日晚。退居長安百不爲。出門無馬還步歸。高天報施固有待。可得不如翁與兒。

次韻子瞻贈橋道人

昔有仙公項曼都。去家十年若斯須。還歸壯語驚妻孥。月邊朝拜雖勞軀。流霞一杯真味腴。世人但怪醫多慮。不知列仙山澤臞。陰陽變化隨指呼。日新無窮非故吾。喬公築居近濰都。交遊洞賓儕爾朱。又言其師奇丈夫。璞玉粹美名不沽。郎官仕晉更五胡。我今老病須人扶。衰顏白鬢日已渝。捐書絕學休守儒。去

不爲少猶雙鳧。公能濟我良藥無。

俠少行戲王子直

長安少年俠自任。一生意氣過人甚。許身直以豪取名。快意那知武犯禁。寶刀強弓千里馬。風馳電射無敵者。有時獨醉倡樓春。一身歌舞兼百人。休來著書吐胸臆。脫落章句嗤邱墳。王侯願交不可得。貴者雖貴猶埃塵。君不見漢家雲臺畫良將。高冠長劍森相向。由來落拓塵土中。不妨論議巖廊上。乃知功名爲世賢。安知輕欺惡少年。

王家酒樓

〔案〕此詩自夷門城東門以下。詞意與前不相屬。疑有誤。

君不見天漢橋下東流河。渾渾瀚瀚無停波。遊人閱水看白日。駭浪瞥遠紅影蹉。感歎世事亦如此。振頓兩足行吟哦。提錢買酒聊取醉。道傍高樓正嵯峨。白銀角盆大如斗。臠雞煮蟹隨紛羅。黃花滿把照眼麗。紅裙女兒前豔歌。樂酣興極事反覆。舊歡脫落新愁多。夷門城東門南對屠兒墓。信陵今安在。賓客散如霧。竊符事可鄙。袖椎復何慕。猶令主人成大功。千歲英名若可遇。笑殺平原君。恥從毛薛遊。選士十九人。毛遂晚見收。丈夫一身貴。特達因人成。事良足羞。

和章都官洞庭詩

閱水須閱秋水時。洞庭八月爲最宜。百川湧溢注平曠。倒卷溟海翻天池。瀟湘沅澧紺碧色。千里一片清瑠璃。蜀江亦濁遠不雜。正若黃組縈鑑匣。長風簸軒一何壯。雪浪成山相蹙移。奔霆擊電恣轟磕。素車白

馬交橫馳。朱垠騁望更無地。翼軫落影光參差。南極老人坐盤石。赤足皤鬢濯項頤。修鱗巨鬣出萬族。窟穴鱣鮪泥蛟螭。身軀長大竟無益。機械利器潛相隨。但令漁師賈餘勇。冒突死地常安之。巴地斷骨不自免。此曹么麼何能辭。秦皇屬車八十一。赭衣伐山豪不羈。九疑不到二妃泣。聖賢失勢令人悲。憶登洛陽值搖落。暮霞新月含風漪。古今光景共一瞬。獨遶四壁觀題詩。神官威嚴鬢似戟。樓船持節森畫旗。湘靈奔走伺顏色。鼓瑟獻巧招馮夷。新篇秀句遠爲寄。清風白芷叢余思。呼兒疊紙作報語。衰老撫事情孳孳。

新灘行

巴江之水西南來。峽束川壅聲若雷。瞿唐五月不敢下。滌瀨中流大如馬。風波雖惡石不去。太古以來怨行者。君不見前日巴山復摧裂。萬仞臬兀江中絕。孟冬水涸石角見。上流下流盡精鐵。當時長年皆有語。後來艱危從此數。上天設險知爲誰。但恐防人如灑瀨。

彭城集卷八

七言古詩

和楊十七傷蘇子美

蘇君在朝素機警。氣排青雲力扛鼎。鵷鴻遇風鄙巢栖。騏驥得塗嗤坎井。千金置酒宴長夜。錦繡照爛絲篋靜。明珠盈車謗隨起。白巾還家酒未醒。翟公署門賓客改。魏牟去闕江湖永。濯纓漁父唱滄浪。結廬陶令依人境。時浮扁舟就什一。出從數騎非造請。窮途詩語尤慨慷。暮年筆法加豪逞。霜凋蘭蕙不待老。一世驩悲竟俄頃。遺書猶缺茂陵求。卜宅乍許要離並。生平相望不相接。凜凜氣概吾能省。川流既逝安可回。駿骨雖買何由騁。知君金石嘗定交。末路人琴俱不幸。大招無復修門期。懷舊邈與山陽等。

城東觀魚

東城水深色如黛。居人來過不知愛。我浮扁舟轉城曲。蒼煙古樹寒相對。忽如身在松江游。況有漁子前操舟。霜天黯黯始下鴈。雪浪杳杳頻驚鷗。萬魚挂網同時急。赤鯉長大猶人立。舊疑古潭有神物。倏見金鱗卻騰入。檝師獻功喜相顧。岸傍驩聲仍坌集。主人置酒樂未央。艇子行舂輕相及。吳酸縷鱸白玉盤。四

座相喻同加餐。人生萬事豈有難。我能爲公成此歡。興極意移令我歎。落日藹藹沈雲端。岸草露白天風寒。

觀魚

清濠環城四十里。蒹葭蒼蒼天接水。使君褰帷乘大舸。觀魚今從北關起。開門漁師百舟入。大罟密罾雲霧集。小魚一舉以千數。赤鯉強梁猶百十。濁醪賞功傾瓦壺。公言錫爵爭謹呼。餘人不及色沮喪。數奇天幸相賢愚。濃雲吹雨寒蕭散。置酒移船泊前岸。暴殄天物古所矜。誰道於今爲壯觀。

送張太保知冀州〔原註〕自羣牧副使除

使君使敵前歲中。手爲單于畫吉凶。敵人破膽不敢迂。卽日歸報明光宮。漢家牧師三十六。水甘草豐馬數足。問誰虎臣司苑門。極望離宮皆首蓓。長河東來橫冀州。雄雄大府森戈矛。紅旗照天軍令肅。紫髯昂藏居上頭。將軍威名動殊俗。天子今無北顧憂。舊傳冀土多良馬。歲看北客輸旃裘。廟謀將新赤岸澤。強鄰猶知博望侯。使君家聲仍世傳。慷慨功名方壯年。黃金如斗組丈二。富貴光華真謂賢。

送裴如晦知潤州

柳陰深碧黃鸝語。川水平堤鷗鳥舞。送君臨流眼暫明。愛此虛涼少塵土。何況連檣一月行。吳山楚水相逢迎。稻花吹雨香不絕。蘆葉搖風聲正清。北固樓臺似圖畫。廣陵欲渡聞潮生。縹壺盈前京口酒。紅旆相隨北府兵。少年投粟常爲樂。晚歲甘棠空涕零。望君鴻飛不可攀。白頭方出玉門關。獨向天涯共明月。猶

應夢裏借千山。

送章學士知湖州

昔賢爲親屈小官。使君專城情更歡。連山大湖水凝碧。高蓋駟馬車塗丹。綵衣兒戲養顏色。箬酒賓宴羅杯盤。吳興釣碣亦可羨。悵望從事空南冠。

陳和叔賀蘭溪所居。近有信來言水竹事。戲贈。

北山移文那爾爲。淮陽招隱殊未歸。流泉漲溪可厲渡。修竹飽雨添舊圍。鳴禽作巢皆有託。白雲抱石初無機。主人已知戰勝樂。溪童未老情庶幾。〔原註〕小謝詩云。方同戰勝者。剪去北山萊。

柿紅

柿紅梨紫漫山熟。冷雨蕭蕭落喬木。東田收穀畝數斛。築場斂積高如屋。柴車斑斑黃犢健。丁男肩頰兒指秃。烹豬漉酒樂社神。急鼓悲笳斷仍續。田家此樂何所憂。閭里至老還相收。道傍滯穗如山邱。何處老翁寧有求。

寄題岳陽酒務水樓

洞庭蒼蒼水拍天。巴陵居人無斗泉。天生地勢正如此。抱甕臂飲真堪憐。架樓竅木出百尺。剖竹接筒如筆直。驚雷發地山鬼憂。白波統靈湘君惜。吾侯智與神鬼侔。古來能事皆悠悠。會令太湖變春酒。更使騷客忘離憂。

關西行

關西居人多閉屋。屋底老翁相向哭。縣官禁錢錢益輕。百姓無錢食不足。平時斗粟錢百數。今者千錢人不顧。大家蕭條無十金。小家流離半達路。憶初鑄錢爲強國。盜賊無端皆得職。邇來救弊因寬民。盜賊自苦民逾貧。安得萬物皆爲銅。陰陽熾炭造化工。鑄錢萬萬大似尺。官定足用民家豐。

移舟城東

厭聞九衢車馬喧。汎舟初出城東門。陰虹吐雨水勢怒。河聲浩浩如雷奔。棹工謹呼事拳捷。童稚變色愁驚魂。濟危經險正當爾。安得拱默爲希言。雖無清冷可澣滌。喜見黃濁來原原。便風催檣兩快意。千里萬里何足論。

游濟堤傅家園亭

濟水與河俱至海。陶邱之北川原改。由來天事不可料。黃濁長存清晦在。猶餘平堤十里長。逶迤東注如高岡。水泉味甘土脉膩。固知餘潤宜羣芳。君家園籩臨濟堤。荆扉茅屋隨高低。當軒古木密如蓋。無數雜花行有踐。谷虛遙聞樵斧應。晝靜便有幽禽啼。穿栽卜築事未已。上爲層臺深鑿溪。東鄰可買莫惜費。臆月課〔原註〕平聲。種當令齊。柳綠正如陶令宅。桃紅應似晉人迷。城中老守厭窮束。行樂得至城東西。此家園亭可屢往。薄酒自足充提攜。

和楊彥文嵩山詩

楊侯作邑山水中。縣南百里維青嵩。官閒身老詩筆健。樂與邱壑研豪雄。是時新涼背炎夏。草木秀麗全天功。重青疊碧百萬狀。有如耄老攜兒童。懸泉落崖瀉萬丈。震雷發地聲隆隆。陰風巖洞忽悽愴。寒生六月如凝冬。祠官祀典有常秩。掃除給復何其恭。孕靈產異遠不極。面周負鄭人殊風。生雲觸石始膚寸。倏忽澍雨成冥濛。羣山相望不足算。禮若小國來朝宗。幽人羽客此獨往。深處時與神仙通。念君吏職有章綬。池鴻籠鶴思長空。暫留靈境寄心賞。仰止萬古希遐蹤。梯高逕側目力短。涉歷庫下非穹崇。山中居人亦富逸。翠竹寒松名素封。願言攜家事卜築。採薇飲水欣長終。巖田種芝地高下。茅屋遡水溪西東。君能挂冠共此約。何必綺季東園公。

送徐君章

每秋送客常羨人。今秋送君尤惜別。白髮相知無幾何。明日扁舟成楚越。忘形誰復到爾汝。末路轉憂欺老拙。西風落葉密如雨。信宿長淮見清月。紫蟹出簞加二螯。白魚掛網色勝雪。人生功名何由致。適意勿羞徒舖啜。何時亦得東南征。赤腳吳溪嘲釣碣。

送楊康功知安豐縣

楊郎作文殊勇爲。辯如濤波捷刺蜚。相逢喜吾故人子。門風宛存令我悲。艾蘭驅車最先入。百箭穿楊誰可及。擢第勝人十改官。作官不辭萬家邑。勸耕課桑力有餘。吏事不受崇空虛。後生才資動出衆。何至苦心城旦書。清泉百里環芍陂。楚人千年長不饑。叔敖子孫負薪苦。念爲廉吏何可爲。忽憶雲臺故侯司空。

公五郡士馬河西東。功名亦有際會數。退讓自是雄雉風。誰謂鄙夫老昏忘。屈指古事猶初終。作詩寫此豈有意。正若指點山水書魚蟲。

天馬行

漢家天馬來宛西。天子愛之藏二師。甘泉貴人寵第一。昆弟封侯真謂宜。軍書插羽廟選將。一朝百萬皆熊羆。大射廬山亦快意。死人亂麻非所悲。論功廟堂誰與敵。外廐皆是麒麟兒。白茅金印結紫綬。老將流落多瑕疵。天生富貴實有命。寧復憶君貧賤時。勢高累愚計慮遠。大志落落嗟徒爲。渭橋祖道一語泄。身繫邊鼓家流離。

和梅聖俞食鱸歌

黃河赤鯉非龍材。欲化不化煩風雷。隨波浮沉偷自得。網羅失身成暴腮。火鬢錦鬣鱗雪霜。紅眼照耀珠夜光。若無鯢鮪與蝦蚪。安見品格非尋常。主人愛客不計錢。少婦縷鱸情可憐。蜀薑吳橘正相益。炊菰絮羹還慊然。燕人寸腴不足貴。專諸全鬻非珍味。屬饜默懷一飮報。欲令主人千萬歲。白玉換米桂作薪。主人家居長不貧。賣魚一值任公子。厭鱸與遍長安人。

兗州古檜

兗州宅西有古檜。十尋度高百圍大。生理成全不增長。半枯半榮常常在。游人相與疑汝年。檜不能言聊意宣。百番桃李香撲地。一輩蒲柳長參天。束薪尋斧不旋踵。種子著花還比肩。老身寂寞無顏色。猶有黃

鵲來枝側。

早行

東方未明天紫色。涼風吹空聲惻惻。船人起語鳥奮翼。兼葭茫茫江水白。石潭轉旋蛟龍窟。巖壁冥蒙虎豹迹。生存古木數十圍。老死懸藤百餘尺。民生有爲俱事役。豈獨羈人不遑息。商歌濁酒聊慰懷。君不見仲尼旅人常接淅。

夜攜賈十五過巨源作

鄙夫開年便四十。白髮垂頤眼眵澀。不甘老態日見侵。自計多憂諸病集。待詔侏儒飽欲死。囊空有時都絕粒。丈夫立氣須激昂。豈能中夜牛衣泣。朱門貴人那易見。後生美仕尤難挹。敝裘敗屨欲安往。蹭蹬衢還獨立。賈侯游從久不厭。孫君風誼今相入。由來大瓠矜濩落。尙喜靈珀勤收拾。暮通水火並鄰居。巷無牛羊時屢及。汎愛已許金石堅。覺我衰遲情汲汲。清霜著屋萬瓦明。白月當空北風急。排門上堂童孺謹。青燈照書簡編緝。縱談自爾外形骸。虛舟不值呼張翕。赤桐燒酒傾玉杯。念君屢空此遣給。葡萄紫熟梨甘津。寒菹盈盤更啜汁。酒腸雖狹底能足。邂逅歡娛論串習。百牢九鼎亦盡空。金帶玉符誰等級。三更還家燈火斷。浩氣凝虛榮都邑。斗杓落北草木死。層冰結水魚龍蟄。何時春雷起霖雨。宿雲温媚天衢濕。

次韻裴庫部二月二日遊博園

二月二日春意動。東風生物來無垠。苦憐清濟不如古。卻愛小園方及辰。谷鳥出聲已脫俗。林花一枝疑

占新銀壺擔酒馬馱妓。草草乘興寧傷頻。

桃源

武陵溪深山合杳。巖谷掩映秦人家。仙俗迷途不可到。春風流水空桃花。山中道人多百歲。翠髮蕭條神骨異。漁舟往往傍林麓。相逢亦問人間世。

黃金

黃金能成不願鑄。封侯可得差有求。小來一意今白首。世事萬變都無謀。詩書已廢徒博奕。交友益落空沈浮。江湖漁釣足自給。拂衣歸去營扁舟。

瑞荷

西濠本連金水河。天潢之下分餘波。波深水靜生物秀。十步百步皆圓荷。五月浮舟人不見。瑞荷亭亭尤可羨。連二雕成白玉盤。合歡裁作青油扇。浣紗女子紅連房。背面照鏡勻鮮粧。斜陽弄影並高蓋。下有戢翼雙鴛鴦。人情貴少瑞云美。亦自天和獨鍾此。周王嘉禾獻同穎。漢皇奇木誇連理。君不見今年大田所收十萬倉。上客爲子歌吉祥。

鑿井

旱天雨少官鑿井。鑿深源長水泉冷。塗人無復觸熱憂。居人況有操瓢幸。前王扇暍方已勞。後王舞雩功不省。此功一成千萬年。卻願炎日長當天。

次韻和羅著作風琴詩送畢長官

君不見長風蓼蓼起山林。大木怒呿喧萬竅。是爲天籟來無方。中有知音全衆妙。洛陽琴工誇死桐。齊魯諸儒頌清廟。刻商變羽不得騁。擊手高張空改調。豈如風琴得自然。但令雕虎長清嘯。鏗鏘闐緩連晝夜。已斷復續誰能料。不論九奏金石諧。那辨五絃宮徵少。世間俚耳何足聽。幸有楊琴嗑然笑。高堂置酒月如霜。金盤照筵紅燼燒。淵明子賤皆有琴。兩君叵惜清樽醪。

保州亂

緣邊戍兵精絕倫。腹飽官粟思食人。健兒睚眦殺刺史。可憐百口同埃塵。燕雲蒼蒼日色紫。帳前血流守尉死。亂兵相謹肯畏天。保州去邊無百里。

耳病

風林幾處颼颼葉。石磧無時浩浩泉。正欲登山驚雨過。未經烹鼎怪湯煎。病身老態何由避。耳疾行當耳順年。

竹間亭作

溪東雜花亂如谷。溪西老樹交篁竹。橫槎波水纔一葦。繚逕出林凡幾曲。半旬霖雨泉脈動。四岸春風柳芽綠。眼前景物向人好。心事幽憂傷局促。

城南行

八月江湖秋水高。大堤夜坼聲嘈嘈。前村農家失幾戶。近郭扁舟屯百艘。蛟龍蜿蜒水禽白。渡頭老翁須雇直。城南百姓多爲魚。買魚欲烹輒悽惻。

鄧聖求往爲武昌令。刻石元次山窪尊。及蘇子瞻謫官黃州。遊武昌。見前刻。後同在翰林。因有詩示余。余爲次韻和之。

側江小屋香酒醅。出林繚逕蘂花栽。溪風暫過響修竹。嶺雪未盡兼寒梅。往遊武昌值佳境。白雲漫漫縈崔嵬。孫家舊事頗可見。樊山杳靄臨釣臺。赤壁樓船不餘燼。屬車豹尾空塵埃。埋名腐骨彼誰子。正見邱墟黃土堆。三分割據亦徒話。今人尙爲羞餅壘。謝公伏令首佳句。遊衍相與期江隈。次山孟宰繼有作。窪尊取飲摩蒼苔。兩公雄才又超拔。明珠照人眸。險開騰龍始知爪。牙壯掣鷹無復毛。羽摧腰金佩魚見官秩。不似遷客談象雷。朝廷一入不得出。邱壑何事煩公來。南人歌聲易慷慨。公詩感激成歎哀。

蔡河漁叟

河冰始消春沮洳。老翁求魚日來去。川流容船網罟繁。上流下流密如霧。跳蝦潛斗不自惜。時復鯤鮪聊可識。吁嗟勞心能幾何。信道相看猶羨他。

高樓

青樓高高危九衢。朱欄畫栱相傾扶。佳人當軒玉不如。紅簾翠幕深沉居。危絃促柱鳴笙竽。哀音感耳心意舒。浮雲不行飛鳥徐。游人駐車馬踟躕。嘉肴桂酒白玉壺。浩唱爛醉何所居。樂極哀多盈必虛。世故萬

變誰能圖。飛鳶墮鼠殘。諸虞里閭豪傑何時無。茂陵老儒空歎息。曲突徙薪纔賜帛。

古詩詠歐陽永叔家白兔

飛若白鷺。衆不足珍。走若白馬。近而易馴。古來希世絕遠始爲寶。白玉之白無緇磷。乃知白兔與玉比。道與之貌天與神。瑩然月魄照霜雪。紅眼顧眄珠璘璠。山農提攜越千里。主人得之誇衆賓。網羅脫死鷹犬避。一以潔素能超羣。清江愴神龜。大野傷麒麟。剝腸折足不免患。智若三穴方全身。主人好奇意不倦。有來往往蒙金銀。老翁守株更有待。勿使珍物遺今晨。

始涼夜坐

八月秋風高。涼風動天地。漸疑晝短少閒暇。況復宵長減眠睡。空林露下物色清。閒堂明燈門不扃。四隅寂寞羣動息。我與蟋蟀皆宵征。

劉五草蟲扇子

吾宗白團扇。畫作草蟲樣。天時變炎涼。棄置幾惆悵。網蟲蒼蒼顏色晦。畫工筆法依然在。剪裁帖綴復生光。白月團團仍可愛。蒼蠅輕巧蝴蝶狂。怒螳散斧誰能當。老蠶作繭意自了。露蟬孤嘒殊清涼。其餘百品隨變化。天機所動俱閒暇。座人咨嗟用筆精。不知猶是今人畫。畫工侯生今白頭。有時看畫還淚流。壯年名聲却自惜。老去心神無處求。始知能事須當年。盛時一過殊可憐。卽今拙工各自喜。豈知此家先日前。落筆輒得千萬錢。

題歐公廳前兩鶴

明公眞愛鶴。相鶴選仙骨。遂令千金姿。爲君軒墀物。啄腥豈復辭。雞羣鍛翼欲。比鳧鷺馴。聆音發舞似。矜客避寒孤。警將依人。吾聞芝田逸。翮不如此。世上悠悠誰識眞。

苦熱

南方炎德非尋常。六月高下俱探湯。羲和未息不可避。寒門安在徒相望。苦憐萬物渴且死。反顧一身困在牀。願呼快雨洗六合。徑馭微風周八荒。

和永叔春雪

陬筒吹灰變冥朔。生氣萌泉天不覺。凝陰忽升氣橫厲。重雲大同勢綿邈。通衢漫漫走流沙。近甸稍稍堆喬岳。焚爐姹女姿飛揚。匝野神姦誰彫琢。刀圭不惜透牆隙。捷業俄然垂屋角。戶斜尺劍未及收。窓缺連環如可握。鮮粧宮女喜深印。紅手庠童鬪堅搨。暝雞誤曉屢咿咿。飢雀衝人猶啄啄。雖憐林篁有摧折。却喜隴苗就優渥。貧廬敗褐憎破牖。富屋珍裘轉深幄。使君高義仍汎愛。穎士多文方力學。獵師得雉鮮棄藁。廚釀薦甘清間濁。氣隨陽春破凝烈。巧奪鈞工畏名貌。吾知郢人不復歌。古聲比今爲拙朴。

次韻和裴庫部喜雪歌

四時平分氣升降。當冬宜藏反宣暢。玄冥羸孱失其職。驟弛威權避威仰。由來萬事可盡料。一夕同雲迷下上。始疑羣靈久猜阻。勿爾覺悟驩相訪。周宣商湯號明主。圭璧垂盡虛卣鬯。豈如聖神備參兩。精意潛

發天垂貺。朔風蕭條嚴莫犯。四野皜白光彌望。乾施無方意必均。陰殺夸多力尤壯。松篁得意忍枯槁。鷹隼乘時戾寬曠。層樓眺遠復褰簾。密室就煖仍施幃。舞投牆隙到中堂。響拂紙疏喧北向。樵林無聲自斤斧。野渡爭趨急船舫。富觴屢舉極嚙呼。貧屢踐行赧嘲讓。誰令小邑盡華屋。不覺南山失青嶂。月臨靜夜絕氛埃。濤起風江采蕩漾。豫期晴和當勸耕。徑入園林稍挾杖。宿醒未解雞三號。照梁輝煥晨光亮。裴侯清通思豪絕。郢曲不比巴人唱。老均茵憑遊益歡。閒藉杯酒神俱王。明年三農飽牟麥。病民自可逃無狀。

地震戲王深父。〔原註〕俗云地震鼈魚動

員方肇開坼。積塊成坤輿。漂浮大波不自止。幸有萬里之鼈魚。抃首戴炎州。尾直崑崙墟。億載不墜陷。始知力有餘。揚鬣播四岳。鼓鬣搖五湖。豈知古今士。竟以地震書。自是世俗聞見拘。潢汙蛙黽相隨居。我從龍伯借鈎餌。釣鼈惟子知非誣。

戲作賣雪人歌

北風沍寒紅日短。火爐燃薪不知暖。南山闌干雪塞滿。連玉疊瓊何足算。時移事異不可言。眼看星火垂南天。道傍喝死常比肩。市兒相與贏金錢。微功有時難久全。物生豈有金石堅。煎湯沸騰在眼前。可得意氣長矜權。

刁景純得假還丹陽

晨霜落川水。行子自相趣。帝城桂爲薪。斗米勝白玉。丈人乘老猶愛書。十年厭直承明廬。漢廷三最得予

告此行亦是思鱸魚。沙頭打鼓朝發船。捩柁已見江湖天。落帆京口望北固。此溪此山如宛然。壯年封侯豈不好。金朱祇令夸者道。聞公東岡長萬杉。采芝何似商山老。

櫻桃

中庭兩櫻桃。枝葉密相對。蟠根不十年。不能開花如繡蓋。前人費力後人賞。曩日春風今日在。世間萬事或如此。富貴功名豈無待。共知韶光過眼疾。霞紅雪白不足賴。繁華及時數快飲。烏散蜂飛無所悔。

上書行

仕不至二千石。賈不至五百萬。此事夸者憂。而非志士歎。君不見下邳少年授書起。幄中運籌制千里。功成不受二萬戶。拂衣歸從赤松子。君不見計倪半策誅強吳。鳴夷扁舟浮五湖。三致千金不自擅。至今籍籍宗陶朱。大賢富貴不爲己。心事邈與常人殊。逢時致身如反手。雲蒸龍變無時無。君勿愛上書獻賦稱賢豪。刺繡倚市相矜高。丈夫昔曾笑徒勞。商賈旦旦爭錐刀。

題合肥縣效裕堂詩并序

江侯旣成縣堂。以詩及序遺予。而請名焉。予曰。夫十人之聚。其曲直不可勝聽也。數口之家。生生之具。蓋益廣且備矣。況以大縣百里。占籍數萬。民之所以望於上。吏之所以求於下。不太多事哉。又況風俗之好訟。賦役之無常乎。及至乎事修而身佚。此固能吏之成效也。周書曰。乃其裕民。孟子曰。綽綽有餘裕。吾故名江侯之堂曰效裕。言侯之才旣能以裕民。又身獲其餘裕。而效於此堂也。肥之人

皆以爲知言。予因復爲七言以報江侯。

九月霜降公堂成。江侯寄詩求所名。定名揣稱事不易。以子樸直言必誠。百詞號呶片語決。十役漫汗一教行。令乎於此有餘裕。堂以效實非無形。庭羅芳草寒轉碧。池有魚鳥閒不驚。左經右律給嘯咏。雨軒風檻含秋聲。今我不樂歲云暮。蟋蟀在堂鴻鴈鳴。主人愛客豈有極。助爾美酒長河傾。

傷孫曼叔尙書

金聲擲賦惟興公。西河智略稱會宗。曳裾置醴初奮發。聽履題劍方從容。上倚壺遂以爲相。衆恨王駿不得封。韞吾良臣九京地。此意自昔悲重重。

茂陵徐生歌

茂陵徐生老且迂。一心區區長信書。拜章北闕三待報。意欲霍氏安無虞。那知世主心不同。積惡未極難爲功。徙薪曲突事不爾。壯侯幾人能受封。高岸爲谷邱淵移。魯酒之薄邯鄲爲。人生決已各以時。舊意望君君不思。

幽谷泉

幼卿初鑿琅琊溪。憶當大歷六年時。歐陽今疏幽谷泉。復在慶歷之六年。兩公相望幾百載。中間游客常比肩。山神愛惜第一境。邂逅知者方流傳。乃知勝事未有盡。可憐歲月猶依然。穿雲斲苔色澄澈。寶鏡霜刃光蛭。巖前濫觴如可鑒。山下積石還成川。如公好事誠難得。推公此心人莫識。且如泉源在污泥。誰

道汲引非人力。作詩刻石歌泉池。欲問何似陽冰題。

熙州行

自敵請盟供貢職。關西二紀剽兵革。敵人歲來受金帛。地雖國本常不惜。帝家將軍勇無敵。謀如轉圜心
匪席。精神動天天不隔。鑿空借籌皆碩畫。賈生屬國試五餌。買臣朔方發十策。偏師倏然畫西海。一月三
捷猶餘力。百蠻解辮慕冠帶。五郡掃地開城壁。葱嶺陂陁蒲類深。回笑秦并與禹績。尙書論功易等差。御
史行封自明白。武功貲爵十萬金。徹侯印組丈二尺。奮行過望理自爾。少從進熟來無極。憶昔漢武開西
域。天下騷然苦征役。哀痛輪臺置肥美。割棄造陽損斗僻。豈知洮河宜種稻。此去涼州皆白麥。女桑被野
水泉甘。吳兒力耕秦婦織。行子雖爲萬里程。居人坐盈九年食。熙州歡娛軍事息。天王聖明丞相直。

彭城集卷九

五言律詩

庵嶺漁叟詩有序〔原註〕時年十四

庵嶺高數十百仞。其下有溪。才深五六尺。左右多樹木。自高望之。謂非人居。有叟乘短舫。鈎罩于其中。予甚嘉焉。贈以此詩。

溪叟厭塵網。移家臨水居。開扉對山色。堰水活嘉魚。蓬棹自相得。笑歌還自如。猶嫌子陵傲。老更就蒲車。

道人申演

先生隱君子。暮齒寄山林。蒼鶴齊筋力。清泉漱語音。衣冠猶似俗。心事獨非今。歸去峨眉路。千峯何處尋。

幽居

住處必松竹。經年長自閒。青苔仍有徑。亂石更成山。飲水却餘樂。荷鋤誰愧顏。悠然謝車馬。聽客到門還。

小雨

微雲興縹緲。疎雨過森陰。潤積衣裳膩。涼生戶牖深。塵埃聊洗眼。宇宙快開襟。寂寞城闌暮。歸飛見水禽。

好風隨細雨。蕭颯過吾廬。野興鋤瓜後。衡門隱几初。積陰生綠縹。清氣襲空虛。耳目遺塵土。還當讀我書。宿雲留暝色。細雨逼殘春。芳樹看紅濕。垂楊亦翠顰。高風吹燕翼。定水漲魚鱗。漸恐年華改。桃源憶晉人。

立春

得新矜白鬢。數九喜和風。菜甲成春事。郊園付野翁。天開池水碧。雪盡樹梢紅。頗復尋樵隱。柴門步武通。挽故相國尙書令忠獻公

四轉更注意。兩朝公受遺。大明開日月。全德冠皐夔。已悟騎箕事。猶餘罷市悲。太常難紀績。天語詔豐碑。意氣萬夫望。衣冠八尺身。有爲悲鳳鳥。不作畫麒麟。餘烈周宗近。英威漢相真。召棠終勿剪。畫錦仰鄉人。殄瘁虛人望。哀榮備寵章。疇功蕭相國。異數郭汾陽。鼎寶宵無味。階星晝隕光。惟應文考廟。萬歲共烝嘗。

曾魯公挽詩

扶陽詩禮樂。丞相始安車。世祚公之魯。門風行在書。三朝推帝賚。九敍見民餘。古有騎箕事。今知定不虛。雲臺存畫像。畢陌想遺風。文彩階符在。儀型嶽鎮空。考終方備福。言念始爲忠。今日緇衣美。能明善善功。南公工說識。故老筆通靈。本自符千運。宜然享百齡。嵩高雄作鎮。河潤溢爲榮。考卜佳城處。無須石槨銘。

齊國公主挽詩

湯沐侯家貴。山林主第開。天孫烏鵲水。蕭史鳳凰臺。遇事悲風燭。新阡愴劫灰。清秋降北渚。不奈楚聲哀。

秋園晚步

慘慘高秋興。蕭蕭欲暮天。地荒逢敗葉。日下聽殘蟬。感物偏無賴。悲秋私自憐。如今已如此。何待二毛年。
搖落西風早。蒼茫晚日斜。木蘭休紫豔。籬菊委黃花。興似陶潛賦。愁如庾信家。向來吟思苦。直恐鬢霜華。

晚步

日沒城陰合。人歸草露涼。淺池宜短艇。高樹倚胡牀。清嘯激秋氣。孤吟留月光。敢言吾獨善。魚鳥正相忘。
城西晚歸南山馬上口占。

塵土辜雙眼。驅馳損壯顏。夕陽銜遠樹。馬首看南山。應接都忘倦。神明自覺還。無心非自強。最識白雲閒。
便風掛帆欣然有作。

泛梗江流疾。轉蓬風力強。天時周必復。吾道不終藏。白鶴先余路。飛鳥送客檣。掛帆資隱几。北走萬山蒼。

巢湖

天與水相通。舟行去不窮。無人能縮地。何術可分風。宿霧凝深黑。朝曦浴嫩紅。四山千里遠。晴晦已難同。

晨至後園

白露晨已重。晚花秋正繁。城陰到少息。林下寂無喧。圃老能呼鶴。樵奴競戲猿。山林何異此。機事復誰存。

寄范佑之

徽宗隨武後。相與亦通家。望氣如豐劍。聞名省渥洼。將門嚴棨戟。王略盡流沙。好取封侯印。誰能讀五車。

寄和父〔原註〕時自宋之任越州

行李資章甫。秋期看海濤。埃塵乍振袂。淮泗幸容舸。颺鳥雙鳧健。飛鳥五兩高。須君菊花酒。慰此寸心勞。

寄楊十七

〔原註〕楊有詩道和父蕭山政善。作此報之。楊詩所稱說三事。故首句及之。

宰邑成三異。吾兄復妙年。長愁越聲短。不似古詩傳。高唱今獨步。知音深謂然。還疑剡溪上。紙貴幾多錢。

寄梅聖俞

獨騎駑馬出。強逐衆人行。貧始怨寡與。老仍畏後生。吾子忘年友。新詩獨步名。秋風夢無限。時過許昌城。

寄王深甫

箕穎多奇士。他年洗耳翁。古人皆直道。吾子嗣高風。解榻迎徐孺。名鄉禮鄭公。正憐賢太守。心賞與人同。

寄隱直

遠身嗟道敝。築室笑勞生。應接知儕俗。浮沈得避名。陳家星不昧。灌氏水長清。往事今閭里。悠悠旅客情。

洞庭寄張四

壤俗三苗舊。湖波八月寒。天形漸水近。秋氣逼楓丹。漠漠萍號雨。瀟瀟澧有蘭。東流無限水。一洗故人冠。

〔原註〕時聞隱直欲仕。

滑州罷爲白馬縣舍弟司法省歸寄此詩

散軍收檠戟。改邑壯三畿。太守朝行在。諸曹自免歸。大河終北注。旅鴈獨南飛。遲爾寬相憶。他時信息稀。

送韓太祝罷官歸許昌觀

吏課三年最，歸裝五日糧。朋情惜分散，子舍想輝光。泉潔湖波白，春融柳帶黃。因君老萊戲，遙奉使君觴。
自江南將歸，先寄和甫。

五湖休作客，八月去乘槎。天地凝秋日，山川照落霞。寄聲西道主，好在嗣宗家。盛醞重陽酒，登高飲菊花。
狂直非儕俗，文章念及門。無成似馮衍，失路比虞翻。抱礬機先息，書空事不言。江南香草地，一一賦荃蓀。

風雨寄張野人

宿雨萍號苦，淒風虎嘯頻。喜開蟲豸蟄，悵阻物華春。雞叫思君子，鶯遷憶故人。泥塗塞車轍，相過獨無因。

寄張六

十里一反顧，去君垂五千。遠身卑濕地，歸意淡寥天。南極多來鴈，秋陰減跼鳶。寄書江漢水，好送北歸船。

寄張宜

屈指張生老，無人事隱淪。鯨魚空自飽，章甫向誰親。丹荔充庭實，明珠逐賈人。如何滄海上，甌石一生貧。

寄張六

君爲棄官去，豪氣故風流。無復池中物，真能方外遊。浮生都物變，衰俗使人愁。聞有桃源路，歸來試力求。

省中寄王平甫

簿領禿千兔，禺中強一餐。未爲勤事吏，空負寫書官。奇獸名天祿，層樓近井幹。林花今正盛，夢想月邊寒。

重寄蘇子瞻

空胸迷舊學。華髮悵頽齡。江海容孤翼。雲霄寄客星。未堪循吏傳。默守太玄經。正恐聲聞酒。令人醉不醒。

寄仲馮

府掾西曹貴。星華使節雄。我行千里鎬。卽敍百餘戎。〔原註〕匈奴傳有百餘戎。王略持籌內。邊山聚米中。因成率然勢。不陳取奇功。

夏木聞禽

愛此南軒木。親聞好鳥聲。夏陰雙綠緝。幽韻獨淒清。帶霧知天曉。因風覺晚晴。忘機是幽客。相見不相驚。

挽盧通議

射策蘭成歲。歸全韋相年。聰明百齡事。冠帶五朝賢。賜几元知止。臨雍尙缺然。秋風正搖落。哀挽向新阡。
山東推望族。泉室闕歸真。善政餘談舌。清風在縉紳。薤晞無復露。草弱漫棲塵。賴有傳家慶。光華列世臣。

唐參政挽詩

天奪悲楊綰。人亡愴魏公。終疑仁者壽。尙想直臣風。聽履餘榮在。牽裾舊事空。惟應司隸姓。更使世知忠。
倜儻先言路。經綸重鼎司。武文兼二允。愛直見雙遺。無復靈臺論。空傷薤露詩。邢山向鄭國。千古意同悲。

挽馮當世母朱太君

郡封家邑盛。羹遺主恩頻。所以令勤貴。由來得孟鄰。文軒空舊事。弔鶴怪來嬪。搖落千山暮。陔蘭不復春。
躬績維公父。平反在不疑。榮兼綵衣養。孝著白華詩。黃髮全天壽。遺風盛女師。畫輜丹旆遠。寧記鹿車時。

挽王正仲母永壽太君

天錫期頤壽。恩疏石窳封。母儀兼事事。子貴亦重重。歸旆滄江水。新阡翠嶺松。曾參無所係。不待祿千鍾。平日南陔養。諸公爲美談。兒啼因戲綵。羹遺復調甘。盛事一知十。修齡百與三。青烏傳吉卜。喬木藹相參。

濮王任夫人挽詞

思齊疏慶族。聖善積慈恩。子貴哀榮在。舟移警效存。緇謳悲薤露。象服照魚軒。惟有秦原望。東西見寢園。

挽韓侍郎夫人范郡君

名卿俱令族。慶善集清門。珮玉師柔訓。稱詩得婦言。已嗟封馬鬣。不待歸魚軒。從此公侯事。淒涼屬采蘋。夫尊因受郡。子貴亦通朝。象服違偕老。幽宮不復朝。長川空滾滾。落葉自飄飄。哀挽青郊道。悲風送大招。

西戎〔原註〕時元昊始死

旄頭占虜候。鳴鏑射單于。哀死知明主。和親愧腐儒。邊鋒少南牧。天馬自東趨。看撤山西戍。無勞議遠圖。

晚過西湖

落日微雨好。浮雲近水多。空濛亂林樹。涵泳著星河。賞極興不盡。跡歸心更過。猶須明月夜。濯足弄金波。

泛舟西湖

靡疊蘋萍合。賁綠島嶼深。操舟非有術。鑿水會清心。老樹成重蓋。初荷散萬簪。名園皆有主。費日試幽尋。懶意適自強。舊游疑觸新。如從剡溪客。忽晤武陵人。鐘磬高低寺。漁樵來去津。涼風水雲合。天半是魚鱗。

鄭侍郎挽詞

置驛無留客。名卿擬上公。應惟泣遺愛。競欲頌寬中。賜履靈臺隔。開阡夢澤空。秋音送歸旆。依約認樵風。治獄餘陰德。哀矜出片言。千金無重比。駟馬見高門。星落林烏暝。愁悲薤露喧。江風傷遠目。楚些一招魂。

送張六入浙東

君侯曾一仕。已作棄官歸。又欲過吳市。還愁脫賜衣。春風解冰雪。澤國盡芳菲。相望不可及。孤雲天外飛。

上清宮花木自夏及秋相續

信此神仙地。經時玩物華。殘紅未零落。暗紫續矜夸。掃石分文繡。開林碎晚霞。秋風蘭菊茂。此去有黃花。

將去上清宮題梧桐

舊日見春華。圓陰羽蓋斜。野軒何必掃。小徑故從遮。秋氣先摧葉。春風別有花。野夫心好靜。異日到山家。

九日

九日秋蕭瑟。登高亦少歡。黃花宜澹泊。碧樹早凋殘。醉舞烏紗落。彈歌短劍寒。可憐西北望。白日遠長安。

九日寄江北兄弟

登高雖有興。羈旅亦消魂。插鬢茱萸細。題詩蟋蟀喧。黃花一樽酒。斜日最高原。回首江天迥。翩翩塞鴈翻。

張比部景真挽詩

埋輪負壯志。持節向炎墟。反戶驚殊俗。彤襜豈定居。跼鴛愁瘴霧。斷鴈哭來書。天理真冥漠。誰能問太虛。

五嶺瘴癘地。宦遊前事存。求爲勾漏令。臥念少游言。夫子獨不返。壯心誰復論。淒涼大招賦。不見入修門。
蘇度支挽詩

翰墨兼能事。功名自壯圖。雲霄會幾許。意氣卽通衢。埋玉情何已。修文理不誣。敢忘徐穉禮。絮酒望江湖。
前年伯鸞死。卜葬近要離。今日延陵墓。仍書季子碑。人琴俱已矣。林壑助悽其。心許千金劍。終當挂樹枝。

建公挽詩

燕祺歡受福。陽祿痛離災。胙土乘初載。賓天遽不回。弄璋迷夢幻。壯髮變塵埃。唯有華封祝。能寬上聖哀。

題魯氏老檜堂

當日山林客。移根近小軒。樹陰今百尺。人世亦曾孫。堅節寒逾甚。清風老更存。猶餘雙白鶴。終戀主人恩。

柏悅堂

往說齊侯寢。此堂申甫餘。千齡長秀聳。衆木旣消除。杖履每多興。冰霜采自如。涼風破蒸暑。眞賞復誰須。
華堂柏兩株。清景喜多餘。密影隨步武。涼風自掃除。蒼顏師尙父。勁節蘭相如。寄謝繁華子。榮枯可立須。

夜涼

稀星映斜漢。孤月靜前軒。意喜涼風過。遙看碧樹翻。勞生共裘葛。辭秩愧田園。高枕息羣動。吟蛩依草根。

自蔡河之陳州

扁舟去鳧鴈。川路正龍蛇。日色暝如午。風烏端復斜。漸漸過隴麥。短短被堤花。涕淚元無極。那堪視物華。

重傷胡二

逝水竟不復。死生嗟可憐。所思今已矣。歸使一悽然。尙想飛鳧鳥。終辜憶戴船。神交如有驗。會付廣陵絃。

五龍井禱雨

湯年不過此。丘禱亦何頻。石井無多水。泥蟠詎有神。舞雩聲寂寞。剪爪事酸辛。萬古爲霖意。長嗟傅野人。

苦寒

苦寒殊不意。衰老若爲謀。賜隔青綾被。貧餘白罽裘。蟄龍才自脫。過鴈可深憂。靳靳西頰日。牆陰肯爲留。

秋過薦福院竹亭

入秋纔一到。風物已淒涼。舊篠全侵席。新梢亂出牆。蕭蕭吹葉雨。稍稍墜枝霜。爲有留人意。嘉遊不可忘。

濟川亭

誰謂此池小。遠將天漢通。分明涵列宿。迢遞引來風。松竹凌虛碧。軒窗倒影紅。高明推李杜。不負傅巖功。

曬書

幽事隨時有。移書曬日華。囊開魚蠹字。眼暈石榴花。病忘多三篋。勞心愧五車。賜書仍有品。前輩羨吾家。

夜過曾孚先

索我形骸內。從君里巷居。度阡仍越陌。酌醴更焚魚。殘雪春泥熟。青燈缺月初。誰能憚乘興。歎息歲將除。

將赴官廬州寄張四隱直二首〔案〕敬監衡州鹽倉。不應赴官廬州。詩題疑有誤脫。

一爲彈冠仕。遂廢東臯田。不至二千石。行登四十年。羈遊無定許。鬢髮欲蒼然。萬里南江路。春風棹客船。

江路西南永。風波歲月淹。賴君同此役。久客復誰嫌。榜叟誇忠信。津童識孝廉。雲山仍在眼。詩興力能兼。

賀隱直

舉國皆儒服。吾人智有餘。焚舟濟河後。埋劍發硎初。天路騫黃鵠。雲濤縱巨魚。殷勤故人意。青眼看鄉書。

送隱直歸扶離

〔原註〕隱直近學南宗法。故末句及之。

羈旅自無友。非因七不堪。逃空見人喜。失學向君慙。貧病意不展。滯留情未甘。相從欲有問。空法本傳南。

雪中憶隱直

北風吹朔雪。遙想度關西。覆閣眼初熟。登樓望獨迷。巧妝梅意密。偏壓柳條低。竟日思君飲。空憐駿馬蹄。

哭張隱直

結友兒童歲。對門兄弟辭。存亡殊不意。晚暮可勝悲。宰木歸吳遠。輜車出劍遲。善人鮮百福。神理儻吾欺。

二星占使者。九折見忠臣。白髮猶強力。青雲早致身。勞生真夢寐。過事悉埃塵。已矣寢門淚。石交兼懿親。



彭城集卷十

五言律詩

占晴

南國無全臆。江天可喜晴。山林開霽色。鳧鴈與風聲。春物催羣動。年華強旅情。無人同此酒。歎息滯蠻荆。蒸濕何由解。暄和自不禁。片雲常蔽日。小雨不成霖。蚊蟆晴明地。蛟龍老病心。雄風不易得。無處可披襟。

雪晴

山雪喜初霽。意行因肆觀。巖光花半散。峯勢玉新攢。鳥去樹冰落。水來溪舍寒。還愁向融散。立到夕陽看。還郡寄洛中諸賢

雖勤車馬役。而與故人同。濯熱宜清洛。忘饑爲碧松。御風思禦寇。縮地憶壺公。待我成仙術。相過豈有窮。送江淑寺丞棄官歸江州

時事不可願。還家方自由。看山一長嘯。飲水亦消憂。林竹通鄰里。陔蘭潔膳羞。還將計然策。江上倚扁舟。霍邱謝令寺丞

明府雙飛鳧。南歸鴻鵠俱。東風解冰雪。春水渡江湖。光祿詩爲樂。淵明酒自娛。公田皆種秫。三徑更何須。

送王肅侍禁新安監酒

丹穴鳳皆好。藍田玉自溫。流傳洛生詠。歎賞貴公孫。好事欲成癖。著書經閉門。看君桂枝擢。祿仕復誰論。

山寺

疊嶂橫秋水。招提隱半峯。白雲迷到路。曉日自鳴鐘。法會樵漁熟。齋時鳥雀慵。試尋方外士。繫馬就長松。

畫雪扇子

灑落瑤花薄。蒼茫殺氣深。因風驚拂面。濯熱幸開襟。夜色非關月。朝雲不待陰。秋風來應起。好在郢中吟。

曉起東園

禽鳴知欲曙。野客自晨興。春草生三徑。朝光下九層。園林問圃老。笋蕨待巖僧。卽此甘幽屏。趨時要未能。

古檜亭

散櫟厭爲社。枯梧非有神。一身具松柏。千歲作秋春。風影日亭午。露香宵向晨。唯應仙鹿跡。不悔白頭新。昔聞上昇檜。傳作亳宮神。念此亦千載。玩之經一春。涼蟬號永晝。獨鶴起清晨。誰與畫屏幃。長令水墨新。

上懷亭

人世南柯夢。看君葺舊居。小庭長汎掃。暇日省文書。黑葉生煙外。黃花過雨餘。那知山谷興。不向市朝疎。

登樓

溪谷含冰雪。川原見草芽。春生三峽水。日照萬人家。時節長如此。風光會有涯。唯應多美酒。厭看海棠花。

雨中過汜水關入鞏縣

泥塗出關惡。風雨過雲寒。懸水餘百仞。層峯知幾盤。攀躋頭目眩。揭厲衣裳單。稍出萬山外。始知人世寬。

次韻謝三利涉寺見寄

衆水會蒼山。僧房積翠間。夕陰留到客。清暑獨開關。月出亂峯白。天明遊子還。他時望君意。餘恨不同攀。

題利涉寺〔原註〕寺有唐利涉禪師葬塔。故呂宮師相公讀書齋。

雲水上。方居迢迢百尺餘。水光搖几席。嵐翠徹牕疏。鶴樹追前佛。隆中問結廬。已知禪寂意。仍得揣摩書。

哭王子直

積水忽變濁。聚星無復光。風流都滅盡。天理竟冥茫。過事皆陳迹。餘哀祇淚行。遙憐轉塵柄。顧影夜燈旁。衰老惜年歲。羈孤慕友生。一哀誰爲勸。百志爾無成。弓劍輕前敵。詩書足自名。人皆期不朽。持此傲公卿。

荷花

白水滿方塘。荷花五月芳。弄珠圓不定。濯錦冷逾光。香憶風醒酒。聲宜雨送涼。扁舟學騷客。葺室近滄浪。

黃州臨臯亭

遠國江千里。荒城水一涯。居人愁避虎。過客競乘槎。秋雨吹天暮。寒濤浸日車。從來遷謫地。卑濕是長沙。

野竹亭

勁節四時好。此君常服青。影搖金破碎。聲動玉瓏玲。方丈塵埃絕。高齋醉夢醒。由來謀野意。不異在林坰。
聞西戎乞降

玉關依斥堠。荒服祀春秋。干羽由來事。桑榆尙可收。發書迎寶馬。錫首入貂裘。高枕興王世。吾生免外憂。
冬夜賞月

暈逐陰風起。光隨凜氣多。霜應摧桂樹。冰恐徹天河。池鏡初容鑑。窻櫺亦戲磨。關山千里雪。此夕共金波。
雪夜月中

雪霽流雲盡。天虛片月升。氣清羣玉府。光徹滿壺冰。過雁明可數。啼鳥寒不勝。山陰自此去。野興豈難乘。
玩芳亭

誰與玩芳草。慨然思古人。東風千里日。紅藥一城春。賀燕自高下。浮雲無舊新。南山際滄海。更覺爾爲鄰。
留別諸兄弟

羈遊路萬里。物色共悽然。霖雨傷秋意。西南接漏天。壺公縮地遠。列子御風旋。信有神仙術。諸公一見憐。
暫之霽上留別一二兄弟

回首嗟行役。吟詩愴物華。西風凋木葉。客子去天涯。日暮看邊雁。江秋見海槎。重陽誰對酒。野菊自開花。
春日登樓

水國春歸晚。晴樓旅望賒。青絲垂地柳。白朶出墻花。聽鳥參人語。看雲任帽斜。滄浪殊不極。春色故無涯。

野性耽章句，春容看旅愁。眼前都俗物，天外倚高樓。芳草茫茫綠，清淮澗澗流。片雲還欲雨，悵望恐花休。
綠野亭偶題

記得春晚句，緣情因謝公。名賢共標準，清境定無窮。樂矣登臨際，悠然坐嘯中。壺觴聊發興，隨儉亦隨豐。
倚郭徧禾黍，安知私與公。爲農亦可樂，遇歲不終窮。累榭白雲外，壤歌明月中。誰言魯酒薄，自覺勝新豐。
日晚步過孫監丞

夕陽喧鳥雀，幽逕入蓬蒿。於此興不淺，行吟殊未勞。市朝移俗態，麋鹿共吾曹。稍稍鐘聲暝，林梢白月高。
望華山〔原註〕荆華相連也

荆山連太華，青翠望難分。嶺首明新旭，山腰暝白雲。玉攢光自照，波蕩勢成文。應接寧知倦，清輝遠送君。
鳳翔官宅園亭

退食自閒暇，空堂仍集虛。秋林長費掃，寒草不教鋤。移石改迂逕，拂墻看舊書。枝棲亦云穩，何用憶吾廬。
馬當山

雲壑斷無土，江流橫倒山。蛟涎晴出沒，鳥羽倦飛還。神禹遺疏鑿，天機藉險艱。長風且破浪，帆席慰愁顏。
送畢長官

銅墨非君志，仙鳧爲我來。三年話傾蓋，十日算銜盃。許與羞垂白，飛騰指上台。倚門方有待，未覺厭京埃。
送鄭推官

此邦人事少，離恨不關心。頓與吾子別，如何旅思深。暖風隨躍馬，永路變鳴禽。蓬鬢添衰白，知予厭滯淫。

詠雪

北風吹朔雪，楚塞亦凝寒。天地浮雲滿，江湖行路難。醉宜乘馬出，高愛倚樓看。會是豐年候，居人意似寬。

書堂對雪

天寒不成寐，看雪坐清晨。默怪人聲絕，都迷物態真。璇宮寒爍目，琪樹靜無塵。信有崑崙圃，神游屬此身。

和裴庫部諸家雪

侯家

裘馬寒逾壯，歌鐘暝未閒。排雲朝象闕，踏凍獵黃山。上客珠裝履，妖姬玉綴鬟。園林通夜賞，洞戶不須關。

山家

雲暗峯疑斷，林長路稍迷。庭隅時臥鹿，旁舍遠聽鷄。隱几添樵火，應門倚杖藜。兒童別村至，薄酒自提攜。

酒家

繚徑集餅罌，江樓倚上層。青帘吹淡墨，翠幕映飄燈。勸客寒威壯，歌時歲事登。十千賒可得，不恨價仍增。

獵家

寒事輕盃酒，晨裝急製衣。狐麋尋去迹，鷹隼競橫飛。沙路濃隨馬，風毛盛合圍。興酣生鼻火，狂發會忘歸。

樵家

山木瓊瑤合。溪風虎豹哀。舊材迷處所。破斧獨歸來。世路深泥滓。生涯半死灰。誰憐廊廟語。正復此遺材。

船家

雲白連沙渚。風高雜浪花。解帆依下雁。沽酒看棲鴉。篷響投珠亂。門欹墮劍斜。山陰路不遠。去問戴逵家。

雪後

尙城催戍鼓。病枕聽哀鴻。灑竹蕭蕭雪。開門峭峭風。消憂罇酒綠。久雨燭花紅。旅夢還知路。孤舟向剡中。朔雪凍乾坤。黃雲晝景昏。宿醒猶戀酒。靜臥亦開門。烏鵲時時語。松篁處處翻。問知淮水凍。不復渡頭喧。

陸子履有詩贈行次韻留別

尙白不自悟。愧君稱絕倫。高秋獨去國。下水不留人。菊秀鴻初過。魚肥稻已新。淮山見明月。千里最情親。

留別傅欽之

驅車長值險。投足正臨深。白首抱壹意。故人知此心。巢禽驩避弋。轍鮒偶爲霖。去矣江湖興。淒然東武吟。

苦熱

炎暉不可避。鬱鬱度朝晡。飛鳥有時墮。高林無事枯。形骸等外物。橐籥任洪爐。正有捐塵濁。東浮萬里桴。

炎暉共茲世。南紀獨何偏。天地大爐耳。江湖沸鼎然。魚龍危失所。黍稷恐無年。浩蕩思雷雨。長吟雲漢篇。

畫鶴

置此憐神駿。三年故不飛。軒車寧假寵。野客會忘機。燕雀那相笑。鳧鷖直自肥。蓬萊千萬里。正想玉爲衣。

得楊十七書見報所居近種花木詩。

堪憂雖陋巷。寓興卽名園。似得壺公樂。如吹黍谷暄。豔花爭獻笑。芳草共忘言。近種南軒竹。春來亦有孫。

眼昏

因循衰便至。邂逅眼成昏。稍與詩書隔。初慙長老言。〔原註〕陶淵明詩云。昔聞長老言。掩耳每不喜。談空迷起滅。蠅翼競飛翻。懶臥稱長策。深居欲杜門。

登浴室院閣

秋霽登臨好。危欄百尺梯。層城斜照裏。雙闕五雲西。雜樹黃映綠。生煙高復低。章臺少年子。走馬錦障泥。稍出紅塵外。方知萬象虛。林端辨遠水。樓角怪行車。燈續黃金像。香餘貝葉書。誰能捐世事。卽地亦山居。

中夜見月

月午四鄰靜。高齋人寂然。虛空時有警。影響善驚眠。宿羽移深樹。商胡慣夜船。無雲更可恨。珍重此嬋娟。

新月

稍見桑榆上。還沈河漢西。氣涼知露白。天闊見星低。靜色餘簾額。回光射鳥棲。城烏偏可恨。到曉不休啼。

次韻和黃朝議

下武新周烈。謳歌屬禹謨。恭開始元詔。遠紹帝軒圖。山海無加賦。戎胡遂息徒。英風逾草偃。俯仰逮樵蘇。已作華顛老。欣聞紫詔新。經綸兼事事。哀痛及人人。願輟須臾死。求觀富壽民。短歌隨擊壤。感動不無神。

傷丁元珍學士

休沐非連騎。投沙迫去身。似鴉憂鵬鳥。比鶴望鄉人。夢與江湖隔。情存翰墨新。定交相得晚。撫事亦酸辛。

喜雨

山雨來何暮。高天始震雷。江聲翻灑瀆。水氣逼昭回。灑落年芳晚。空涼醉眼開。蛟龍定神宅。蝸角更誰猜。

漫成

經旬柳已綠。過雨草齊生。無事觀兒戲。閒遊識鳥情。看花低帽立。弄水棹舟行。宦學都如夢。浮生底自名。

次韻和司法椽陳鄂

晚得詩人賦。長謠長者言。坐曹涼雨過。歸舍暮禽喧。交態傷貧富。時情任輕軒。懷歸空有夢。郢路屬營魂。

送慧思歸吳

塵埃十年夢。江海一身歸。境與夙心會。事容前日非。連山橫遠勢。定水湛明輝。別後相望處。雲孤雁自飛。

奠昭禪師

昭公不住世。岑寂白蓮宮。煮水終還冷。浮雲本自空。諸天方丈室。萬事百年翁。俯仰成今昔。蕭蕭鶴樹風。

送僧子南

脫身游萬里。空手出長安。猶以抱琴樂。不知行路難。春歸吳國遠。水滿紫溪寒。越俗今章甫。疑師不著冠。

宋門城下新居

頗習田野事。偶居朝市間。前塵應妄想。舊觀輒來還。甘井如汲澗。高城疑望山。更憐車馬絕。日在掩柴關。

新居

舉世同逆旅。此身那拙謀。趣營容膝地。適似種瓜侯。藥餌扶多病。躬耕強隱憂。彈冠仍應客。車馬肯淹留。

雪後行小園

晚照開霽色。閉園幽事增。樹搖風落雪。池漲水浮冰。鵲亂聲已變。鳶飛誰爲矜。風光看滿眼。取醉此吾能。

過丁晉公舊園

寧知陵谷變。遂見曲池平。喬木祇益老。儲胥空復情。廢堦盈疊蘚。頽榭迹微行。桑霍爲厚戒。千秋餘歎聲。

雪夜酌酒

雨雪寒休市。春泥早閉門。嚴城深窈窕。孤月靜黃昏。棲翼此中樹。高春何處村。物容煩應接。乘興卽開樽。

送雍元直使浙右

詔給四封傳。自乘千里船。雲山深發興。秋物正蕭然。零雨隨持節。驚濤避執鞭。鱸肥稻米白。勝事奈君偏。

引泉

春池凍已消。泉落白魚跳。石淺喧鳴玉。沙虛沒暗潮。晚寒妨溜足。竟日欲平橋。最愛臨波柳。東風萬萬條。

金鳳花

妖嬈如自媚。紅白競爲娛。共笑翔千仞。猶疑將九雛。軒墀蒙暎暎。風雨易泥塗。靜掃蒼苔地。還令近酒壺。

景潮亭

澤國水遙遠。歸舟亭短長。他方向夕景。此地正朝陽。物色桑榆上。風波鳧雁行。臨流問漁父。好在濯滄浪。

退朝觀御溝上雜花贈陸四

溝水去無窮。宮花映日紅。惜陰猶宿露。照影獨衰翁。燕語晴明外。風香錦繡中。爲非温室問。心賞幸君同。

上三山磯

江湍趨絕壁。山木映雲濤。野路青冥近。孤舟應接勞。魚龍防碎首。鳥獸幾亡曹。生事垂堂戒。愁心欲二毛。

過龍眼磯

洪波浮一葉。弱髮引千鈞。虎豹公橫道。蛟龍喜得人。強顏猶失色。乘險屢傷神。回首雙鳧翼。隨波愧此身。

送鄭五下第西歸

萬里河西路。憐君徒步歸。遊人並塞少。落葉待霜飛。相得不恨晚。知音深謂稀。壯心須慷慨。勿學淚沾衣。

送人之官嶺南

過嶺幾千里。孤城近海涯。地溫饒瘴毒。民惡半蠻家。并日初開市。非春亦有花。知君望星斗。西北認京華。

和孫少述中秋

月出東山表。遙思澤國秋。綠雲孤鏡上。透水大珠浮。重露梧桐落。微寒蟋蟀愁。我時携客飲。浮白最高樓。竟夕雲四斂。始知天意偏。西風不勝冷。亭午更添圓。老髮緣詩苦。秋懷得酒便。君居江浦上。望我想依然。

春日野次

溪雲晴漠漠，野日晝陰陰。
燕翼飛高下，花房亂淺深。
和風快吹面，淨水喜清心。
極目傷千里，曾無楓樹林。

南原

南原殊可望，桑柘百家村。
紫赤春晴氣，青葱舊燒痕。
遠川飛雁鷺，平壤牧鷄豚。
更待花如織，臨高置一樽。

彭城集卷十一

五言律詩

遠信

清秋萬里夢。久客一討書。長日看鴻鴈。呼兒問鯉魚。涼風郢路遠。落葉洞庭初。無限歸鳧翼。南飛最跂予。

金沙花

苒弱金沙樹。花奇名字珍。移從今日晚。恨失去年春。嫩綠藤垂架。深紅棘刺人。東風會入手。照眼萬枝新。

贈鄰翁

與彼茅茨接。看渠卜築初。丈人真耄矣。孺子復何如。翁且勤杯酒。兒教讀道書。衡門來往近。時爲過吾廬。

初晴贈某翁

雲隨夜色改。日與曙光升。已變前除雪。猶餘北戶冰。鴻飛知適意。鶴語若矜能。天事寬羈旅。幽人亦有朋。

晨起

斷角續鳴鐘。惜時春已空。曉星猶伴月。早雨不禁風。眠食須頽老。衣冠強自公。庭陰全綠色。無復見殘紅。

挽胡元夫母壽安縣太君二首

應嫗金琛社。桓釐邑致膳。母儀真盛德。祿養現興門。尙想君羹遺。那悲口澤存。蒼山松梓暮。弔鶴去翩翩。清德畏人知。傳家賴母慈。何時丹桂擢。相戒白華詩。戲綵歡無極。藏舟事密移。千鍾已不暨。後日可勝悲。

孟冬

十月江南暑。居人尙葛衣。秋花看不絕。沙鳥聽忘歸。氣鬱愁成瘴。霜輕嘆失威。異方羈旅思。歲事每多違。

午睡

浮雲蔽白日。風雨近秋天。車馬欲安適。戶庭方閔然。世塗高枕外。身事曲肱前。似覺松生腹。迢遙不記年。

古槐二首

地有藏丹井。人傳不死鄉。南柯經腊李。黑葉勝枯楊。甲錯龍鱗斷。花明鼠耳黃。離宮緣望幸。仙檜儼相望。仙人鍊形骨。枯槁不知年。秀色倏還觀。陽和仍宛然。今古山川異。乾坤雨露偏。東陽無歇息。生意會緜緜。

復和前韻二首

遺履事悠遠。白雲飛帝鄉。潛真社寄櫟。觀化肘生楊。秀葉髮垂綠。雜英牙變黃。犧尊與溝斷。俗骨爾何望。父老見枯朽。皆從童稚年。孫枝復秀色。仙事故依然。巢鶴千齡異。源泉一溉偏。頗笑海棕陋。崎嶇留在縣。

秋暑呈馮守

秋律何時效。炎雲莫肯陰。烈風長鼓鞞。去水亦流金。藿食無求飽。單絺不自任。開懷幸寬政。事省得清心。

宿荆門

山行厭曲折。小邑正謹譁。流水纔一帶。居人聚兩涯。池偏饒草木。山晚聚雲霞。郢路定未遠。夢魂還到家。

西湖水決

干原出大水。蟻壤潰長汀。舟楫疑藏壑。波濤駭建瓴。蛟龍隨過雨。魚鼈問滄溟。聞道蓬萊水。桑田亦屢經。

素屏

陋室避塵雜。深居惟此屏。虛空自生白。樸素擬忘形。畫手山林迹。先生几杖銘。長來師絕學。未肯事丹青。

燒殘樹

異時龍起蟄。一夕鳥焚巢。摧落殘孤榦。荒涼委近郊。莓苔深蟻穴。風雨詫神交。尙想知音遇。空心或遠庖。

(原闕十八行。每行廿一字。)

夜雨

天暝龍蛇化。風高鳥獸呼。塵囂一洒盡。暑病暫時蘇。電火將焚野。雷車若隘塗。坐疑陵谷變。明發蹈江湖。

江上夜雨

江黑暮潮生。雲深驟雨傾。風波兩舟語。燈火一川明。短夜苦難曙。羈懷方未平。空憐夢中路。依約盡歸程。

慶壽挽詩二首

史占書五鹿。世德活千人。孝養東朝盛。徽音赤管新。濯龍虛望幸。繭館不知春。歷數姜任事。寧如復辟辰。

鹵簿嚴仙仗。笳簫去掖門。晝閒長樂衛。春寂灞陵園。壹德詒謀地。羣生顧復恩。神遊餘仿像。日入際崑崙。

營冬二首

羈旅殊多事。崩騰欲老身。連年俱異邑。幾地愧鄰人。板屋秦詩舊。衡門泌水新。何時仲長子。卜築離風塵。薤草元畱徑。開窗祇近簷。成冬須少有。爲客未嘗淹。朋舊看都絕。詩書贖欲嫌。自知踈懶劇。決意老幽潛。

思歸

扁舟到北郭。屣履向東門。不改蓬蒿陋。猶憐松菊存。因秋動歸興。值物愴離魂。早晚城頭月。呼兒坐小軒。

楊花

不分春色晚。楊花意氣驕。吹噓輕一羽。容易點層霄。細細穿簷隙。姍姍學舞腰。暫來幽僻地。還復去人遙。

移居觀音寺

棲息避城市。塵埃將浼人。虛空見佛性。簡傲得吾真。霜過草木改。齋餘鳥雀馴。席門常晝閉。誰與駐車輪。

題陝西圖三首

干戈今日事。關塞此圖看。白日長安近。蒼山壠坂寒。由來名百二。自古有艱難。指以安西道。凝情意據鞍。萬里靈州地。他年漢朔方。山河從割棄。關輔急隄防。轉益豺狼窟。堪嗟禮義鄉。拔胡須壯士。看畫意蒼茫。河源來積石。天馬涉流沙。耳目成千古。丹青在一涯。荒涼都護府。斷絕使臣槎。安得山河將。收功似漢家。

五月二首

五月黃梅熟。江邊晝雨初。鏽痕侵匣劍。潤氣蠹囊書。亂恐翻銀漢。喧愁洩尾閭。時時雙水鳥。往往上吾廬。一榻移隨樹影。杯側見山岑。白鳥渴求水。玄蟬清噪林。道書無近語。天籟有遺音。向北新開逕。行苔過竹陰。

江上雨中

江雲似無信。山雨易翻盆。鵬起天形黑。龍驤水面渾。大舟纔弱纜。孤樹小前村。濯熱吾知慰。風波勿重論。

和王待制湘東王故苑

故園悲帝子。高興復清秋。密竹娟娟靜。通波細細流。干戈餘魯殿。池沼似滄洲。魚鳥應無恨。山公肯醉遊。

冬暖

南瘴無消息。玄冥爲失威。水深鴻鴈宿。霜薄鷓鴣飛。處處憐喬木。人人慣袷衣。生涯卑濕地。日飲自知機。

忝官

忝官東北藩。老拙復何言。曹事輒付外。客車稀到門。臨池看魚樂。倚杖聽禽喧。莫恨三年最。從今長子孫。

雨中

沈陰連日雨。六月似高秋。涼冷宵眠穩。泥塗晝事休。塵昏舊銅鏡。朽蠹敝貂裘。賴有盈樽酒。能爲懶病謀。

雨後

積雨黃梅後。多風夕景天。少陰回玉燭。秋氣變薰弦。孤鳥爰居外。殘雲蟬竦邊。羽陵書蠹盡。數怪絕韋編。

欲雨

久晴驚礎潤。信宿候風回。仰月光如瓦。燒雲色變灰。謹鼃疑自得。青鷁競飛來。正想江南地。清涼接過梅。

北牕聞雨

庭梧不隱響。秋入意蕭條。過雨喧天籟。高風會海潮。寒侵知洒近。氣豁想雲遙。歲晚看搖落。無衣恥敝貂。

雨

繁陰晝漠漠。日雨暝紛紛。鬪蟻仍移市。乖龍亦過雲。泥塗休不出。鐘鼓遣相聞。願得辭昏墊。長風破宿氛。

醱醑軒雨中二首

小雨疎陰響。高風綠幕斜。冷吹能卻暑。細滴不妨花。輕濕苔痕滑。連陰草色加。路長車馬少。暫喜息飛沙。病身常自力。杖屨及比鄰。繼日傷霖雨。深居若避人。陰苔無數綠。秋草一番新。入夜添涼冷。書燈頓可親。

巢湖阻風二首

重雲迷日月。異縣失西東。苦畏連天水。何須竟夕風。微明分白鳥。搖落望青楓。久客嗟留滯。吾生事事同。四月風猶北。湖邊氣似秋。天時如反置。吾道信淹留。望遠還吹帽。憎寒更擁裘。無由開白日。晦暝使人愁。

安河阻風

隨湖寄漁浦。村戍起孤烟。水色連天黑。沙禽亦晝眠。柘田春種麥。客渡晚爭船。盡日無他事。尋村聽野泉。

凝翠堂

聳聳排修竹。蕭蕭拂蠹簷。秋聲送涼雨。晚影碎寒蟾。居處貧非病。生涯智養恬。著書聊自守。非欲效幽潛。

留張十二宿

靜外塵土息。故人從我遊。襟懷已瀟洒。杯酒聊勸酬。大笑呼五白。浩歌遣四愁。勞生如此少。歎息爲君留。

王太傅河北閱馬

豐草河壩地。平沙冀北區。離宮連苜蓿。舊苑半駟騅。夫子深詩者。無邪頌使乎。寧令漢馬少。不議擊匈奴。

庶幾堂

碧草衡門裏。涼天過雨初。驚秋數甲子。隱几讀殘書。近郭多鳴鶴。坳堂可釣魚。異方無到客。非是故人疎。

歲除立春乾祐縣獻梅

除日應無歲。新春不待年。風光生意裏。梅信客情邊。冷艷來冰谷。疎風暎雪天。不逢江上使。相與競芳妍。

挽胡太傅二首

州來推博物。伯始貴中庸。論道宜黃髮。銘功遍景鐘。龍門餘舊客。馬鬣悵新封。後世瞻遺德。南山萬丈峯。路車申伯去。白馬庾公歸。殄瘁人相弔。哀歌露易晞。石麟森立木。蜜印鑱泉扉。絮酒慙徐孺。回看旅鴈飛。

挽西京左藏使石太保二首

勇擲諸生筆。終乘使者車。家聲唯孝謹。將略亦詩書。鶴髮遺榮始。瀧岡卜兆初。謬承公叔薦。曾未撤衣裾。青綬股肱守。毳衣方伯監。威名眞落落。碩望自巖巖。道遠年如待。才長志尙緘。家多二千石。會見集門凡。

挽宋司空丞相二首

斗樞齊七政。鼎鉉象三公。文武兼人際。安危注意同。規隨餘故事。止足暢高風。他日雲臺畫。依然想寶融。蜜印加泉室。哀簫去國門。降龍嚴冕服。畫鹿並車幡。山甫中興業。臧孫既歿言。定應天壤內。長與日星存。

月夜吹簫

長路見秋月。空江連夜明。吹簫不能寐。舉酒遞相傾。賈客或垂淚。羈人多失聲。湘絃苦沉絕。曲盡一含情。

秦國公主挽詩

渭陽追舅氏。婺女嫁天孫。平日諸姑問。當時赤綬尊。烟波空北渚。荻竹自長門。後夜秦樓月。哀簫闕九原。

宿峴山寺二首

倦予倦羈旅。坎壤林壑間。落日投古寺。秋蟲吟亂山。月明露已白。風定雲方還。王事殊未暇。悵茲清夜閒。蒼山若無路。落日聽鳴鐘。旁舍適眠虎。古潭微見龍。空窓向雲月。高枕聽風松。幽境昔未遘。仙游如可逢。

觀虎翼士戍宜州

虎賁王爪士。銅柱國南門。魍魅非人境。蠻夷盡鳥言。瘴烟旗纛黑。霧雨劍鏗昏。卽路皆無色。何時見北轅。

再見士卒戍桂陽

驛書頻插羽。漢士遠征蠻。四月天將暑。三苗舊阻艱。悲笳背城邑。苦霧濕關山。後夜東南望。妖氛翼軫間。

悼楊公縉二首

得君雖恨晚。白髮幸前期。分手遂陳迹。晤言成獨悲。隙駒得未久。風燭不勝危。詎有修文選。高天可易知。

寄書曾未報。題墨宛如新。長路歸丹旆。孤兒泣畫轡。江湖餘氣槩。星月聚精神。冥漠九原上。空將萬鬼鄰。

秋懷二首

搖落看秋色。淹留倦郢城。登臨想自昔。非土最含情。白露黃橙熟。清風綠桂生。異鄉隨衆醉。須爾析朝醒。兼葭晚已變。天宇向來高。風露一瀟洒。江湖久鬱陶。鱸魚越人膾。白露廣陵濤。歸興憑三鳥。悲秋嘆二毛。

夕霧

日落山氣改。汀洲寒霧生。深沈轉墟落。迢遞失重城。樹裏迷人語。沙頭見火明。商帆宿何處。髣髴棹歌聲。簽判承議携官酒。并具殺炙。晚飲檜下二首。

煩攜光祿酒。愧舉使君觴。伏盡轉秋熱。月明纔夜涼。暗蛩聲蕊蕊。古檜影蒼蒼。衰老淡薄味。殺蔬猶徧嘗。風月近秋好。君來蒙十觴。塵勞我休息。炎暑此清涼。玉露衣襟爽。金波鬢髮蒼。知心一爲足。何必似原嘗。

送儀父清溪縣丞

雖方六七十。皆有萬千家。贊府亦製錦。到官殊及瓜。山苗甘筍蕨。溪飢飽魚蝦。爲爾傳清白。遺黎每歎嗟。

次韻和周承議登仙源宮樓

屏星駐真境。喬木盡蕭森。野曠日偏永。山寒雲更深。九皇容盡信。萬事盛來今。回首靈光殿。飛鴉起暮林。

送從兄思甫尉富陽

南州吏數千。尉事獨神仙。平日稀桴鼓。端居數醉眠。潮聲雷出海。山色劍橫天。會盡登臨興。淹留肯計年。

送劉誼先輩尉涇縣〔原註〕先輩補監生。予定爲第三人。

詔除芸閣吏名屬太常書高第余無愧同宗誰不如鄉情歡賜服壽酒慶安輿正復秋風起滄江厭膾魚

周節推移曹州〔原註〕此君凡換五幕府

珠履幕中客行行亦倦游勞歌一長缺歷聘五諸侯捧檄爲親喜問程輕旅愁遙憐在陳士無友重悲秋

送張益宣州法曹

謝守宣城句偏矜呂法曹郡齋應似舊廷掾不徒勞東北歸流駛空虛去棹高木瓜因贈客并擇兔千毫

韓康公挽詞三首

初還丞相印併授上公封門戟交行馬衣章雜繡龍策書休命畢拜老未臨雍遺愛無時息淒涼在輟春
八龍歸濟美四輔號無官魯衛聯三壽韋平屬二難大勳流竹帛盛事絕衣冠今日哀榮禮賢豪共永歎
乘輿錫臨弔朝士盛班辭笳鼓千人仗輶輦數仞旗壞梁蕭畫在藏壑說舟移無復龍淵劍空傳禹甸詩

傷王都官正卿

巍然積德門識此貴公孫譬彼芝蘭秀行看鴻鵠軒誰令武子死無復孟嘗言寂寞總帷暝流塵空酒樽

傷胥平叔都官

欲爲大招賦期子入修門昔爾南宗學慙予莊叟言清樽湛凝綠丹旆杳飛翻晨夕高堂念此情難重論

傷楊元明都官〔原註〕知國子書學判吏部南曹。晏相外甥。

傳家推德祖。似舅識劉牢。刻意鴻都學。精心常侍曹。萬金酬六體。一字禿千豪。詎有修文事。蒼蒼空自高。

歸鴈

楚水幾時綠。歸鴻前後聞。江湖久漂泊。南北忍辛勤。意氣融融日。聲音漠漠雲。青冥易凌厲。況復未離羣。

雪中聞鴈

四海困橫絕。經年長往來。雪霜空盡力。道路有餘哀。水宿稻梁薄。雲深羅網猜。北方有殺氣。緩緩及春迴。

新雁

南飛洞庭鴈。稍復過衡陽。宇宙同爲客。春秋各異方。邊塵猶處處。殺氣苦蒼蒼。恐有傷弓翮。哀鳴少稻梁。

觀南戍士

膂力三軍士。由來百戰經。舞旗翻鳥隼。疊鼓會風霆。殺氣過銅柱。驩聲塞洞庭。九州防盜賊。儒服媿青萍。

彭城集卷十二

五言律詩

平山堂

吳山不過楚江水。限中間。此地一回首。衆峯如可攀。俯看孤鳥沒。平視白雲還。行子厭長路。秋風聊解顏。

伯父挽詩二首

遂有終焉志。纔成智者居。戶庭連水竹。几杖接舟輿。愛客樽中酒。傳家篋裏書。疏公知足計。不益舊田廬。民思常在去。令德久猶存。慟哭新阡樹。遲疑舊里門。大招聲斷絕。丹旆影翩翻。後日談隨會。人知歎九原。

挽刁景純二首

承明通佚老。仁智遠歸居。門下無留客。燈前不廢書。舞筵交履舄。倚杖及田廬。以此爲家事。忘年八十餘。延陵君子墓。南極老人星。自古稱遺愛。斯文重典刑。一生隆許與。五福最康寧。逝矣俱陳迹。臨風祇涕零。

挽孔經父二首

鄉里東南秀。衣冠伯仲賢。先鳴俱中雋。競爽故無前。朔雪凋華萼。炎風急逝川。斗間占紫氣。應復在龍淵。

往昔方聞策，中間五諫書。直繩無廢墨，利刃必投虛。任重生何薄，年長恨有餘。悲君雖視草，不及馬相如。

挽丁元珍

顏駟縻三省，君山困六安。宦遊俱邂逅，行路正艱難。去水爭還壑，凝霜苦敗蘭。唯餘青簡在，時爲拂塵看。

挽蘇明允二首

季子才無敵，桓公義有餘。空悲武儋石，猶得茂陵書。郢路營魂遠，江源氣象虛。康成宜有後，正使大門閭。漢儀綿蔭盛，周諡竹書存。益以春秋法，因知皇帝尊。百年當絕筆，諸子謝微言。詩禮終誰及，賢良萃一門。

〔原註〕蘇增諡法。又修纂禮書成而卒。

聞雷

過臘山微雨，開正兩震雷。漸南風土異，傷早歲時催。放逐漁翁問，淹留漂母哀。餘寒附煙火，尙有復燃灰。

和孫宣德中秋不見月

便有倚天劍，決雲殊細微。清光自無蔽，絕境轉知稀。露重蟬時落，風高鴈已飛。嫦娥苦幽獨，會載客槎歸。

和中秋對月

星稀如有避，雲卷不辭勞。露已深秋白，天應爲月高。幽懷向誰盡，詩興更何逃。勿負盈樽酒，須營千兔毫。

十月四日離都歸陳州

南浦三篙水，歸人五日糧。寒沙晨起鴈，古樹夜經霜。久客復去國，有情知望鄉。鬢毛渾欲變，鳴笛不須長。

去陳二首

近關蘧舍衛。接浙孔違齊。今日思狂簡。儒生自滑稽。歸歟那慍見。去矣約輕齋。潁水清如鏡。風波定弗迷。
禮賢齊相國。〔原註〕平仲愛客鄭尙書。〔原註〕崇徐孺曾懸榻。馮公預食魚。甘棠勿剪伐。客館遂邱墟。長
缺還相語。冥鴻幸起予。

端午

萬里荊州俗。今晨採藥翁。浴蘭從忌潔。服艾已同風。泛酒菖蒲細。含沙蠖蜓紅。沉湘猶可問。角鉢畏蛟龍。

嘉祐大行皇帝挽詩十首

七月期先遠。三泉異卜征。悲憂同軌事。遏密兆人情。晚出蒼龍駕。真游白玉京。稱天騰茂實。厚德始能名。
北發聲名遠。西域劍戟銷。萬靈潛受記。百獸樂聞韶。昧谷迷升日。璇霄失建杓。仙遊那可問。賦諷已飄飄。
盛德終無逸。元功孰間然。啓疆神禹績。著記帝虞年。桑變旋觀海。弓遺杳望天。霸陵無石槨。不改故山川。
盡禮三神事。齋居五日朝。綈衣仍澣濯。禁籞亦芻蕘。汾水遊何往。華胥夢轉遙。羹藜與環堵。無日不思堯。
屬車全鹵簿。寶玉煥渠眉。萬國瞻龍鬣。三辰會素旗。雪迷帝鄉望。風動海隅悲。今日西巡守。仍非八月期。
清光非可望。天道亦難聞。策府開羣玉。賡歌續慶雲。一經皆賜復。九譯尙同文。會盡南山竹。成書紀帝墳。
陵闕儼因山。明中恍下天。燃魚常照夜。耕象自成田。鴻洞深投玉。莓苔密瘞錢。涕流昭德舞。無復柏梁篇。
帝車旋北斗。馳道繞青松。銀海浮雙闕。虞淵頓六龍。深思傾杞國。遺恨泣華封。述作無憂事。靈臺與辟雍。

車書共文軌。律度出聲身。明白垂中典。優容禮直臣。熊羆渭川叟。風雨越裳人。更想攀髯士。猶知不犯鱗。哀挽千人唱。崇岡萬歲居。呼關想傳警。羨道法周廬。晚日塗車靜。深山灌柏初。谷神知有術。猶欲信前書。

次韻和麻直講題楊直講所種三樗樹

誰能知散木。封植亦無心。歲月如視蔭。棲遲還息陰。宦情移柳在。詩興愛棠深。定有歸飛翼。懷音似泮林。

神宗皇帝挽詩四首

制作夸三正。規模壯百王。自然推大略。誰得望清光。東樂來蟠木。南琛過越裳。白雲那可測。應復向汾陽。綿字正歡心。虞韶驟遏音。戴天憂杞國。就日悵崦岑。貫朽三泉府。方輸九牧金。斯民已仁壽。至理更難忱。四塞聯初郡。千官僅代工。舟車逾漢迹。臺省變唐風。賢傑程能際。戎夷率服中。軒威百年在。何必畫周公。晚駕嚴仙御。西巡卽舊都。天寒餘鶴語。弓墮脫龍鬚。白髮孤臣淚。清湘萬里途。無由宣室問。回首叫蒼梧。

大行挽詩二首（原註）劉熙說大行云。大行受大名。

受名從大行。復土自因山。秋草龍髯墮。宮煙淚竹斑。不知汲水遠。猶與化人還。寂寞崦嵫日。空瞻咫尺顏。謳歌前授啓。桑穀遂興商。恭己朝無事。優賢禮亦莊。那驚同軌至。方奏萬年觴。西望歸雲白。悠悠指帝鄉。

又二首

萬國依無外。三登頌太平。樵夫亦談道。耆舊莫知兵。雲去仙鄉遠。龍來寶鼎成。西風動閭闔。哀涕不勝情。供張連三輔。梯航會九圍。屬車疑晚駕。清蹕望來歸。草露淒金闕。松風颺玉衣。舊傳當脫躡。遙見五雲飛。

日晚

清秋來早晚。落日正蕭然。稍見林外水。獨聽風際蟬。牛羊暝知道。墟落遠生烟。歲事看禾黍。方知沮溺賢。

挽杜祁公太師二首

孤童迨耆老。仕郡至三公。任重仍長道。材全信永終。時推子房智。人識伯夷風。存歿哀榮禮。千秋誰與同。

秋雨四首

冷雨黃昏暮。秋聲衆葉喧。濯煩天宇闊。流惡楚江渾。鼃黽煩當道。魚龍稍在門。一樽聊自勸。還欲笑臧孫。

〔原註〕時方詠湖南雲氣

漠漠清秋雨。蕭蕭萬宇寒。蛟龍移窟宅。江漢急波瀾。瘴霧深蠻洞。旌旗濕漢官。南征愁失道。后土若爲乾。

有懷北歸

海風吹暮雨。淮上始秋聲。點滴潛滋潤。陰沈未放晴。林塘雲似密。水鑑鏡來清。無事看魚鳥。飛沈體亦輕。

祕閣梅花

炎天常畏酒。秋興憶開觴。海面孤雲黑。林端一葉黃。島夷歌似楚。村笛語如羌。更覺非吾土。登臨思舊鄉。

雨中晚涼

落日浮雲暝。滄江雨氣來。風燈殊未定。洞戶故頻開。秋意梧桐急。宵征蟋蟀哀。客心聊灑濯。天地久塵埃。

始涼

秋風來幾時。客病不相宜。搖落令心苦。虛涼益氣衰。生涯貧更拙。交態臥尤知。安得千金贈。鴟夷與爾期。

送張直溫主簿赴南陽

張君年少予。冠歲聚公車。留落成強仕。聲名就子虛。穰橙千戶富。潭菊萬家居。吏隱何爲樂。優游不廢書。

黃知錄園池

劫火無遺者。靈光獨巋然。寒池清照日。古木碧參天。細雨來幽鷺。涼風急亂蟬。頗知魚樂意。仍得離鈎筌。

游李氏園池二首

從人問喬木。繫馬得名園。柳帶晴先綠。禽聲暖更喧。臨池照清水。拂石置芳樽。不畏歸侵夜。嚴城未掩門。樹密渾成塢。花深更有蹊。來游春尙淺。重到客應迷。已近無人境。深憐快馬蹄。風光不負約。樽酒會長攜。

春陰

峽雲春易雨。水國暮多風。原草萋萋綠。林花淡淡紅。清江晚寒外。落景半晴空。物色憐新燕。歸懷自去鴻。

秋雨

南國秋常暑。涼風起自今。洩雲無白日。度夕亦層陰。搖落梧楸意。蕭條蟋蟀音。窮愁抵衰病。坐作老翁心。

樹陰二首

清陰方丈得。暑氣乍來無。塵榻從箕踞。前賢亦鍛爐。晚蟲多黑羽。秋草半青珠。安得遺方客。玄談似給孤。
避世長梧子。居貧五柳生。清秋葛衣薄。晚日濁醪傾。雨蝶輕〔原註〕去聲猶舞。風蟬涼不鳴。淮南搖落早。倚樹不無情。

夜坐

積雨凝涼氣。疎林滴露華。流星占使者。斜漢挹浮槎。喜近天流火。回看斗轉車。秋風下閭闔。消散萬人家。
飲酒城南門。贈高子中。

蒼山際碧霄。綠樹及山腰。青靄照殘日。白雲縈麗譙。偶然成勝賞。長嘯隔塵囂。少駐飛鳧鳥。吾無獨酌謠。

酬晁單州二首

九載一相逢。侵尋頭已童。喜君真傲吏。老我未成翁。簡易文書省。悲歡酒盞空。平生懷舊意。盡見醉醒中。
彈琴君子邑。賢守智逾多。不作長沙賦。仍傳白雪歌。解醒應用酒。成佛卻須魔。正買千金骨。何憂驥跋蹠。

送呂國博知常州

計然餘半策。賈子就新書。屈意銀青綬。之官鳥隼旟。丹楓千里遠。秋興二毛初。最可羞晨膳。尊絲雜膾魚。
李公擇自滑州移知鄂州

黃河魴與鯉。不及武昌魚。好去連城守。翩然雙隼旟。諫官仍重外。天祿不成書。可待三年最。歸來侍赤除。

朝回

朝回還閉戶。講徹復觀書。重祿爭消得。微軀且自如。俗情矜不及。生理付無餘。寂嘿懷張摯。淹留苦魏渠。

同宋次道飲王史館園

珍館掃塵埃。賓階餘綠苔。涼風知廣廈。清唱急行杯。修竹端藏日。交流靜殷雷。歡窮有餘恨。不及壯年來。

同韓持國飲城東俞氏園

貧家常汲汲。一飲自難營。不笑烹雞黍。因之同耦耕。林花含秀色。谷鳥變新聲。歸馬無庸疾。郊扉最近城。

泛舟城南二首

清溪亦多曲。窄地頗宜花。出水游魚樂。驚人白鷺斜。孤城舊郢樹。三戶楚人家。歸興仍風雨。蕭然賸物華。風逆湍聲急。雲酣雨氣豪。川蜺垂飲近。江鶴去飛高。洗藕還餘味。操舟未覺勞。蒹葭彌極望。秋意晚騷騷。

早行

山鳥相呼曙。檣烏自指南。健看帆席滿。坐數舳艫銜。水闊蛟龍舞。魚肥鸕鶴貪。陣雲濃似墨。送雨向湘潭。

晚行

天闊西曛久。風多客語聞。九江秋落水。三峽暮歸雲。飲啄鷗相並。歸飛鶴不羣。湘潭早搖落。稍稍悵平分。

次韻酬錢少卿

簿書非力學。何事不窺園。乘興緣心賞。忘懷到酒罇。露蟬涼寂寞。風葉靜翩翻。少駐東方騎。前盟豈可溫。

送楚南

心寄江湖上。樂聞遊子歸。送君從此去。脫葉正秋飛。雲水聊破浪。風塵今振衣。山僧不善飲。定負蟹螯肥。

送袁生

巴蜀窮天險。驚君便向西。長年勞賈勇。懸度約輕齋。行止千金子。艱危萬丈梯。自憐傾蓋舊。卽事復睽携。

送劉四畋二首

四海皆兄弟。吾宗加老成。好書如子政。飲酒勝公榮。今日鱸魚膾。羨君乘興行。秋風峽中度。快意聽潮聲。肥水不能遠。祇今行子東。高秋千里月。暮景一帆風。時節迎黃菊。汀洲下早鴻。江天多勝事。無術與君同。

山陽送王中甫

弱扇避風瀾。卑飛歲復單。君行反閭闔。人望接鸞鸞。齋日容臺峻。書籤策府寒。誰言今昔異。王貢本彈冠。

送某

詞曹大府掾。誰謂詔恩輕。遺愛念諸父。司存從汝兄。男兒貴壯志。子弟習家聲。努力自勉勵。吾衰觀爾成。

送王同年殿丞知鄞縣

結愛愧同年。君先予著鞭。稍遷鈎盾省。歷試武城弦。越嶺霞明日。南溟水浸天。微官等不遂。欲治子猷船。

江亭後池

清江長望極。餘興曲池深。俯視游魚族。仰嬉喬木陰。通津厭離會。勝地有登臨。暮雨寒潮急。歸飛聞水禽。

送胡因甫知湘鄉縣

雲水長沙國。銅章邑大夫。俗傳鵝似鵬。仙化鳥爲鳧。卑濕加殮飢。絃歌豈壯圖。洞庭見歸客。書信不宜無。

季夏雨過小有秋氣

雨過猶長夏。秋深從洞庭。江涵郭門白。山到戍樓青。天意憐卑濕。吾謀有醉醒。柴門夜不掩。高枕看流星。

觀雲

江上秋多雨。山中晝出雲。太虛終日曠。疊嶂不時分。半覺蛟龍氣。皆成虎豹羣。微風動闐闐。暫喜見西曛。

山行

危塗頽側足。積水向吹襟。雲樹參天直。風湍殷地深。翠香秋後草。巧語霽來禽。信美非人境。無爲久滯淫。

泛舟

野境尋不盡。幽歡良自如。猶疑夢爲鳥。誰謂子非魚。岸樹綠已合。渚蒲長且疎。逍遙此中意。何減漆園書。

初夜

海氣三陰早。秋宵一刻長。涼風吹樹動。疎雨過雲忙。寂寂庭槐落。微微筵竹香。蛩聲畏人寢。故故近眠牀。

夜三首

積水浮南極。流沙聚客亭。暝聞漁父曲。秋揖老人星。初月霜華薄。孤山石黛青。天高多影響。髣髴見湘靈。涼風吹素月。深夜欲眠時。露自入秋白。漏從前日遲。河光如劍直。螢影似星移。多少流年感。聞蛩輒易悲。

流雲卷殘雨。初月淨中宵。秋色河漢白。涼風星斗搖。暗螢猶奕奕。高樹獨蕭蕭。客鬢非松柏。何時得後凋。

寄題康州陳氏連理木詩

陳家聚德星。累世若同生。天事知常象。林珍獨應誠。相傳殖嘉樹。不復羨名卿。坐使炎荒化。何如谷口耕。

哭吳道粹學士

結束并州騎。雍容使者車。乃心長象闕。稱旨得金魚。熊鳥空遺術。龍蛇有識書。平生一笑樂。回首涕盈裾。

次韻酬盛祕丞黑桃二首

度索方殊域。崑崙起素封。幾人曾白眼。吾子幸先容。晦迹煤竄暗。含滋沆瀣濃。上林求異木。詔使會尋蹤。

春華各自媚。秋實頓能殊。悴貌從黎黑。丹心固碩膚。榴花隨使者。荔子賜匈奴。寄語玄都客。相疑失味腴。

雨夜三首

急雨吹喬木。孤燈暝小軒。神傷徒隱几。夢極不招魂。老淚悲朝雉。摧腸怯夜猿。舊惟眸子亮。一月遂全昏。

孟夏樹木長。夜涼風雨時。明燈掃塵榻。散帙坐書帷。曠野波濤合。中宵虎豹悲。形骸吾喪我。隱几向爲誰。

雲闌黃昏雨。風淒九月秋。老便安坐久。用卽置書休。知命應無念。虛心自不愁。三年同此興。中夜一燈留。

季夏雨夜

烈暑殊未艾。更籌初少添。電光金作屋。雨氣瀑吹簾。巢燕密諄語。闐蛩爭出潛。何由掃氛翳。試使祝蜚廉。

靈壁張氏園亭二首

落帆楊柳渚。步屣松竹園。叢石千巖秀。涼風萬葉翻。主人昔傲吏。燕翼此衡門。略看題詩客。空令悲九原。密竹換啼鳥。清池添放魚。懸藤林下坐。響石洞中居。興趣自無盡。傳聞那得虛。如何仲長子。刻意但成書。重到謝氏園。亭寄裴博士。俊叔王主簿。宗傑時裴往淮南。王出京師。

徘徊遠林下。幽草爲誰芳。前日同游客。今朝俱異鄉。東風雖淡蕩。陳迹似淒涼。何用江千里。春心故易傷。八月十五日秋分是日又社

秋分當月半。望魄復宵中。難得良辰並。仍將吉戊同。高樓連卜夜。濁酒任治蠶。注想乘槎客。何如擊壤翁。

送裴太博

桑子頭垂白。斑衣歡過人。官知爲親屈。祿足代家貧。歸鴈江南遠。芳蘭雪後新。仙舟興不淺。致意越鄉春。

夕陽

驟雨無多潤。殘陽不復遲。陰涼庭樹老。點綴石苔滋。鬪雀輕投地。懸蟲賸倚絲。林櫻供口實。美味及童兒。

馬氏中隱庵

千歲知名士。文淵與少游。平生款段馬。晚歲伏波侯。鄉里足稱善。功名仍可收。聞君事中隱。歎息此孫謀。

望荆山

宿雲收疊嶺。初日上危岑。鸞黹千重黛。光芒一線金。秋高怨搖落。野曠快登臨。誰怪欣然樂。山林慰此心。

送李太博知梓州郫縣

亦有飛鳧鳥。那知蜀道難。峽山從劍盡。江水向浯寬。近邑輸鹽井。連城接錦官。清風足富裕。唯寄七弦彈。
送邵中允知華亭縣

一登文石陛。立拜紫泥書。省戶方通籍。絃歌想下車。飛鳧來不遠。唳鶴聽何如。莫作陶彭澤。田園與世疎。
晦日自薦福汎舟泊女郎臺下又汎東湖

雪解寒生水。平湖照眼新。扁舟徐送客。絕境漸無人。逕草芳非淺。沙禽羽翼馴。佳辰數攜酒。晦日已疑春。
晨興

宿露寒猶重。升曦旦尙昏。高秋凋衆木。百里見平原。水澗看魚族。田收長稻孫。冥山不可望。那復更南轅。
將遊吳中寄原父

久宦減仲產。行歌非五噫。歸來問長缺。習水看吳兒。弱喪殊可恨。儻來今自知。江山不我厭。有意卜居之。



彭城集卷十三

七言律詩

次韻和梁郎中詠太一碑〔原註〕御篆額。呂舍人撰文。孫密學書。

翠琰盤螭近玉題，芝書光彩賁雄辭。
方從薄忌真如在，事絕鴻都豈易窺。
幼婦色絲輝錦組，銀鈎金錯照琉璃。
暮年無望青藜燭，時就祠官效祝釐。

次韻和郭固太保留別長句

關西兵馬盛車鄰，君向吳門望緹羣。
聚米山川都掌內，折膠天氣及秋分。
大將軍令窮青海，三受降城起拂雲。
壯士不甘文學老，應須一劍取功勳。

年三十三

年光過眼日復日，世事無成三十三。
尙子幾時當畢嫁，倉公殊恨不生男。
老知尙白書無益，貧作歸田計不堪。
傳劍由來笑逢掖，簿書何必減清談。

晨起汴上口占寄韓玉汝

戍鼓鄰雞催啓關。繁星未墜重愁顏。雲含雪意朝寒外。河帶冰光曙色間。去遠不堪登灞浹。言歸時復念東山。梁臺客在文章盛。修竹何當復共攀。

謝霍丘靜樂亭

河陽種花春已滋。彭澤釀酒醉無期。宣城家聲故未泯。單父絃歌方爾爲。會知丘壑潛高興。新作池塘出夢思。多慙嵇呂相思意。空寄羊何共和詩。

海陵

楚江葭葦帶青楓。小市魚鹽一水通。度日冥茫吹凍雨。欲晴撩亂起涼風。秋花舞蝶蒼煙裏。古木啼鴉返照中。扶杖塔除搔白首。可憐卑濕負衰翁。

寄陳和叔內翰

六十衰遲祗自寬。讀書無味細書難。一麾已愧腰銀印。百選何由及治官。潮過石城如雪白。山從鍾嶺似虬蟠。元龍豪氣踰堅壯。投壘能同客醉歡。

寄楊元素內翰

四世清名悉上公。看君羽翮勢陵空。戲成爐鼎誇方士。妙奪蓍龜執鬼中。家有秦聲居自樂。書非尙白智無窮。華光講罷承明直。墨客無煩賦射熊。

同諸公晚游開寶寺福聖院

微雨吹涼晚更清。老人牽強逐君行。縱談灰燼疑燒劫。指顧樓臺似化城。盤屈庭槐爲狡獪。扶持山薜喜
縱橫。偷閒光景易侵夜。十二街頭坊鼓鳴。

奉詔再任。諸掾曹有詩。因次其韻。〔案〕題再任下疑有脫字

天下英雄將相才。自銘重石畫雲臺。老夫不薄淮陽守。明詔幸緣黃霸來。豈有豹文容霧隱。更慙鵬翼待
風培。諸卿相與望此府。詩筆縱橫武庫開。

感事

誤以雄名薦九重。天書待詔未央宮。白衣不召崔亭伯。賦筆猶殘亡是公。魂驚晚出芙蓉輦。淚墮春生楊
柳風。衰鬢邇來元自白。可堪回首望遺弓。

建業華藏院此君亭〔原註〕王介甫先有此君亭詩。予因繼後。

何可幽棲無此君。層軒高下絕囂塵。金聲玉色三千士。雪戟虵矛丈六身。定有霜飈驚長夏。兼疑寒谷近
比鄰。阿戎風味真難得。好事由來我輩人。

答張屯田朝退過閣下諸公

紫宸歸路接銀臺。複閣重門相望開。浮俗共譏惟寂寞。高賢獨肯少裴回。照人珠玉驚塵骨。落筆埴籒寫
逸才。白日自嫌天上樂。不應滄海隔蓬萊。

衰羸

衰羸因底病相和。留滯俄然去日多。卻是天憐令壽考。任從人會作風波。寬心總與歡欣受。述意無妨慷慨歌。更有南華書數紙。鵬聲蝸角奈渠何。

途次馬上晨起寄章運判

去年候客燕趙魏。今歲述職青兗徐。無窮道路不相捨。將老光陰仍暗除。官燭鄰雞常曉色。林花巢燕總春餘。未知前古才士意。爲底願乘萬乘車。

傷梅聖俞直講都官

論兵自負縱橫略。獻賦端從遲暮年。筐篋成書莫知數。田園生計獨無錢。郎官列宿爲時貴。博士三科不待遷。已向九原悲蔓草。尙疑吳市有神仙。

送劉長官桂府掌機宜

桂林風物舊宜人。雪片梅花五嶺春。心喜大江流瘴霧。眼看南極異星辰。軍中羽檄時無警。徼外明珠日獻珍。酒量問君能幾許。越猿蠻鳥易傷神。

雨後向景亭

春泥軟熟步成黏。水外風光一頓添。境爲偶來生喜色。情緣久住失憎嫌。黃鸝慣習沙鷗野。古木龜疎徑草纖。更向樽中得真趣。天然柔旨不因甜。

酬送吳潛朝奉

衰翁同歲喜相收。同病同心同白頭。委吏除官俱逆旅。瘴烟香草等荒州。六千里外拋機略。二十年來謹校讎。工拙是非無會處。下陂紅日若爲留。

酬送羅朝奉

二年流竄逐卑棲。歸集蓬丘顏向低。病到鈞天都是夢。老如濠汜已平西。兩幡更忝魚符寵。雙鬢誰憐鶴髮齊。相愧清詩無以報。回將燕石塞縣黎。老去光陰若電驚。此身已復愧扶行。歸田悔不如元亮。畢娶猶能似尙平。曩歲薦賢終未效。太音從古竟希聲。最憐閭里人相語。北部威名動帝城。

冬至登樓

澤國風光早早催。陽生已復似春回。不妨野史書雲物。會伴南公進壽杯。塵世光陰俱短日。客心冥漠過潛灰。此心未厭隆中臥。亦任東風起蟄雷。

送高士敦成都鈐轄

使君出守腰銅虎。東第歸來上濯龍。四姓禮容均馬鄧。三刀形勝夢巴賈。軍中樂事隨談笑。徼外威聲待指縱。壯歲勳名當自致。舅家恩澤不成封。

留別蘇安上

高閣橫霄梧十尋。回廊曲檻晝陰陰。期年不就長楊賦。晚歲空爲梁甫吟。童稚相親俱白髮。風波失所更

情深滄溟極。目雲濤壯。相見胸中快病襟。

與顧子惇同爲祕書少監。今年余以病求守汝南。子惇亦除河東漕。作詩紀事。亦用送別。

蓬萊閣下枕書眠。一日除官不後先。并土山河多馬地。汝南秔稻濯龍淵。壯心自喜談兵策。暮齒長慙守乘田。別後天中相望處。參旗橫注太行邊。

郡樓望雪

遶郭蒼山高復重。東風朔雪曙雲濃。層樓已出紅塵境。到客寧知羣玉峯。萬樹羽儀翔白鷺。四原鱗甲動真龍。玉尊清酒留終夕。更看山明霽後松。

和通判裴庫部城樓雪後

數刻又移半日閒。倚樓朝雪正怡顏。委蛇原色蒼龍甲。宛轉城陰玉帶環。曾是茵憑借出處。聊於木鴈得中間。傷春一振曹風陋。不羨淮南大小山。

復雪

九江舊瘴冬無雪。三峽悲風近有冰。山岳出雲寒處處。樓臺倚玉照層層。不憂鴻鴈飛無力。直畏蛟龍病莫興。凍酒一杯還自勸。夜窻飄灑讀書燈。

次韻宋職方雪

梵天銀界談非想。仙府瑤臺恨隔塵。何事同雲移絕境。不知高譙卽良因。林芳散漫裝珠蘂。粉面光輝照

玉人別舉一樽邀老伴。迎春送臘祗三旬。

次韻裴庫部雪二首

小雨駐雲風借威。回眸千里玉山輝。塗人竟比麻衣色。野老時驚白鴈飛。梁苑正應延上客。齊宮遙想闢重闈。誰云自鄼無譏者。一曲陽春可見微。

似薄凝霜不振威。瑞凌愛日奪光輝。變成鹽浦風沙亂。卷起濤江海上飛。西望屯雲瞻魏闕。正思鳴佩賀端闈。孤城牢落無來客。坐待山明見翠微。

太一宮奉安後得雪

八通除道接層霄。五日同雲映泐寥。靈貺那從天馬下。積陰疑有海神朝。潤生塵陌無窮遠。甘入原田不待消。陋巷苦寒方晝臥。靜無人迹到瓊瑤。

雪中呈通判庫部宋職方

冬雪并今早兩回。無風韻膩白皚皚。麥根得潤萌芽綠。瘴氣逢寒霧露開。官爲勸農知我喜。心緣愛客望君來。城頭甚有登臨境。羣玉排峯銀作臺。

錢穆甫楊康功使高麗還爲中書舍人書此爲寄

天子邊人二使星。滄波一笑已揚舲。大明照海陽烏近。黑霧迎潮水怪腥。北貊左肩輸策略。西垣右掖付儀刑。授詩三百成專對。更看黃麻似六經。

酬狄奉議

病臥湘濱面嶽山。每聽鳴鶴憶蘇仙。三苗地闊橫千里。五嶺泉分會一川。門有雀羅甘棄置。人今舞袖足迴旋。梁公孫子丹青似。傾蓋歡然秀句傳。

酬張伯常朝議

郢人蘭雪有餘風。盡在君家七字中。白髮塵纓深念我。青郊藜杖不如公。鄉心正想千年鶴。老計終須一畝宮。不諱求田并問舍。景山何必晚爲通。

酬黃朝議

自無籌略預材難。非有文華聚筆端。涉歷羊腸迷坦坦。穿聯魚目愧珊珊。嶽猿聽久堪頭白。林實嘗來厭齒酸。葵藿傾心由物性。日邊依約見長安。遷公四十九年非。萬事當須向老知。材者不如愚者樂。前人多作後人資。羨君黃髮初傾蓋。矜我迷津數贈詩。聽話朱陵仙府事。慨然清嘯一伸眉。

酬魏朝議

鴛谷相從列俊英。四朝容許濫虛名。忍將百老言存沒。乍喜三人詠合并。春入芳菲皆意思。酒隨衰朽卽心情。新詩不怪煩先唱。猶向君前畏後生。

贈黃朝議

黃公八十健精神。遠近推爲五福身。樽酒不曾輕賤士。爐丹時復遇幽人。晚夸鄉里拖金紫。早見兒孫列搢紳。一事世儒難學處。弟兄歸老樂相親。

次韻和孔朝議

自愧專城無到客。今晨錫晏喜君同。詩言泮水始可與。酒勝邯鄲長不空。但有葵心傾日下。待看雲瑞起封中。高車清輿底易盡。怪似林間束縵翁。

和張給事喜雨

勿驚四野連宵雨。盡是諸山觸石雲。雷響透空如欲墜。電光劃暗總成紋。祝官陳信無虛語。梵宇凝香不斷薰。帝力由來人莫識。始知延譽屬夫君。

次韻韓康公

行馬門闌與古同。客車連軫響隆隆。定知醉飽能容士。當信康寧盡屬公。剽得新聲夸耳性。傳將佳句愈頭風。文人桃李多無數。珠玉旁邊愧此翁。

次韻韓康公二首

疊石疏篁淺藥苗。淡雲清雨意寥寥。鄴侯僻地規摹別。荀令西濠步武遙。繞砌芝蘭歡內集。滿蹊桃李慰佳招。原情獨恨飛鴻遠。悵望三秋詠采蕭。

清汝泱泱紫邏深。綠車紅旆付重臨。聖朝不逆原鴿意。達士俱存塞馬心。日赤報衙容晏枕。夜闌留宴縱

清斟鳳池何必全勝此。薄暮歸休客萬簪。

王史館園

鳴泉傍含水翻車。修竹連雲曲逕斜。謝傅東山非獨往。鄴侯避地此傳家。丹椒紅桂隨時實。綠芰緋薇觸處花。到客可能忘外事。斷年相與玩芳華。

過柏林院僧吉長老有古殿吳道子畫維摩居士又有斷碑是寶歷年中記義岑禪師住院事。靈光歲久獨巋然。峴首遺碑亦未遷。會向三生記前佛。暫從方丈識諸天。篆香徐刻黃金印。梵宇時開貝葉篇。門外霜風正搖落。庭前翠柏自安禪。

館宿有懷平甫

銅壺上水掖門扃。岑寂回廊起獨行。日下屋山三面赤。月臨天井四方明。校經燈火初無禁。汗簡文書不計程。坐憶故人清夜語。淡雲飛去隔層城。

曲阜宣聖廟夫子手植檜二首

秀色擎空四十圍。問年今已倍千斯。移根信假杓關力。息蔭寧無煖席時。文字魯恭經改觀。履綦鍾意想攀枝。季孫亦自譽佳樹。漫負甘棠蔽芾詩。

伐樹商丘去被圍。似於庭檜特勤斯。禹腰堯顙應遺魄。柏葉松身異曩時。恭梓二三千學士。愛棠四十六孫枝。〔原註〕孔氏今爲四十六世攝衣下馬低回久。更就清風一誦詩。

城濠泛舟同畢長官

綠水環城十二里。茅茨帶郭百餘家。侵雲柳影不見日。過雨荷香全勝花。幽事圍碁翻局勢。清歡煮雪試茶芽。眼前景物自蕭散。何必青溪向若邪。

次韻酬姚都官時會堂見寄

百里崑岡半草萊。畫梁危棟一朝開。清川去水縈回渚。喬木濃陰映綠苔。子獻人琴俱不幸。武侯營壘信奇才。斷鴻牢落情愁絕。聞笛那堪賦七哀。

遊船

太液滄波北下流。依然清淺可勝舟。浴鳧鳴鶴輝輝日。折葦衰荷澹澹秋。勝境陳前終不厭。機心去盡了無愁。宋生善賦登臨興。華髮相從免獨遊。

和晁金部感秋

秋來無悶亦無悲。世味年華老徧知。黃葉暮蟬携杖處。斷霞鳴鴈倚樓時。淮陽汲守容多病。水部何郎最解詩。咫尺音書那度歲。春風已復柳垂絲。

雙檜

雙檜森森高出簷。憶昨卜鄰逢吉占。清風似主我爲客。冠蓋相向何凝嚴。愛棠不能如召伯。種柳自覺勝陶潛。春暉漸永羣芳麗。翠影看從一寸添。

題王金吾園亭

烏衣里巷接城隅。東第名園冠上都。家事從前貴公子。宦游當世執金吾。舊蹊桃李春相續。滿地芝蘭德不孤。故有鼎彝傳盛烈。況聞圖史自爲娛。

負暄

聞道帝師仍負暄。遙知愛景滿維垣。鷹揚肯顧踐烏逝。龍袞尤憐夸父奔。赤鳥正宜隨步武。白駒那敢離庭軒。野人皆欲獻天子。他日期公助一言。

陳通議園亭

聚星休沐事依然。社臘安車不計年。五福何妨兼第宅。一壺元自有神仙。種來珍木如人立。移取名花奪地偏。聞道都城曾問卜。始知機石不虛傳。

杜介供奉園亭

側逕羣芳經荷鋤。小窻明日喜觀書。下牀便得山居樂。深巷仍多長者車。省事卽知長脫灑。養生元不待贏餘。客來一醉聊相向。莫問經年甌石儲。

酬黃安期推官見寄

郴江清澈照毫毛。吹笛平陽舍有蒿。鄉信不嫌無過鴈。宦遊正復長兒曹。青楓雨後如人立。南極秋來出地高。齊難楚稱何日就。釣竿元自欲連鰲。

酬黃推官

既將魚目換驪珠。富潤囊箱足賈餘。顧我能知天下馬。呼兒藏作篋中書。老羞流輩爲千諾。狂守初心付兩如。相助飛鳴竟何力。祇宜空手講玄虛。

予所居本章丞相舊第。他日友人楊彥文爲余道丞相時事。因作一篇予楊丞相以郎官始卜此宅。不出都門二十餘年。遂至台衰。故末句及之。

鄴侯常以儉爲師。僻地依然草滿蹊。卻指舊池曾浴鳳。更攀喬樹憶棲雞。清泉惡石皆吾有。樽酒囊書得自携。誰道爲郎多白首。已看霖雨出蟠泥。

與成太博九同年會飲成四韻〔原註〕博士成舖。李之純。崔度。秘書丞戴莊。著作佐郎

張于。光祿寺丞高士綸。觀察推官侯利建。司理王該。高陵主簿張公岳。

江海分龍不計年。異方傾蓋意觀然。壯夫白首驚相問。濁水清塵默自憐。萬事過前都是夢。一杯相屬獨非天。得朋正復同心士。賦詠能忘垂隴篇。

游玉仙觀寄王四十

紫府仙真冰雪顏。丹梯岑寂試來攀。翠鬟濯玉交團扇。濃霧噴香闌博山。不信異人能到此。正憐春意已歸還。吹笙化鳥知君事。猶恨來遊先後間。

京北流人

嗟爾流人亦可悲。白頭老叟抱中兒。不羞遠作投荒客。自恨生遲外戶時。魚失江湖相煦沫。鳥囚籠檻苦啼饑。鄉原日日生荆棘。說似旁人猶涕垂。

觀灌園偶書

一叟汲泉搖轆轤。老妻分水亦攜鋤。青青宿草知春入。浥浥蒼苔過雨初。勞力不應嗤強勉。養生何必待贏餘。白頭當作於陵子。身教兒孫種樹書。

和宋次道三館曬書

天祿圖書一歲開。五雲遲日近蓬萊。後生得見靈蘭策。貴客都傾內外臺。不似羽陵殘蠹簡。正如金谷聚英材。論詩老去無情思。況是陽春未易陪。

送張器判官

平吳舊族仕中朝。湯樂徐馮已寂寥。吾子白頭趨幕府。同年黃綬亦雲霄。着鞭跨馬須爭道。奮臂呼盧更叱梟。顏駟馮唐俱晚遇。不妨青紫老垂腰。

次韻和張舍人北使歸

飲冰重見古人心。絕幕仍當暮雪深。朝出穹廬隨拜日。夜鳴刁斗候橫參。胡兒射鴈爭娛客。羌女聽笳卻走林。聞說虜情親博望。一言珍重萬黃金。

兩府新第〔原註〕張橫侍郎先作。用開字韻。戲次之。是時缺昭文不除。

聖世諸公起草萊。君恩東第一時開。排門畫戟交行馬。轉肘沙堤接上臺。衛國名亭緣伐叛。平津虛館爲翹材。猶分長史待天下。衰老詎能忘儻來。

乙巳早春再遊玉仙觀贈陳道士

十里平郊不值人。解鞍依約記前春。問年已復驚身老。遇境猶能發興新。泉漲池冰舒鴈爪。霜團庭檜疊龍鱗。種桃道士長無恙。自愧劉郎病滯身。

新廣柏悅堂後軒作七言

南榮曝日足娛客。北牖來風亦在予。聊以維摩開丈室。便知陶令愛吾廬。神龜大蔡昂頭際。澤雉名翬矯翼初。戲問庭前雙古柏。閱人無算我誰如。

立春謝賜幡勝口號呈子瞻冲元內翰子開器資舍人

立春幡勝紫宸朝。正以金璫插右貂。便覺陽和生暖律。俱承慶澤下層霄。奇零雪片依樓角。容易風威轉柳條。七十無能不歸去。強將衰白向顏韶。

和前韻

雪寒常怯月邊朝。乍起東風拂敝貂。銀勝綵幡分節物。宿雲晨霧凝璇霄。君爲特達千金璧。我是衰遲百尺條。叩缶烏烏聊快耳。寧知報響得咸韶。

王正仲林子中聯舟西上過睢陽寄書率爾成詩爲報

大帆如翼畫江來。鼙鼓聲乾虺虺雷。洛水登仙惟李郭。兔園延客得鄒枚。寄書上有加殮飯。傾蓋何時數舉杯。想到石渠尋舊境。秋花著子遍庭槐。

呂舍人北使

漢德舟車萬里通。赤心持節復平戎。空同氣色連窮髮。當戶君臣聚引弓。馬酒禦寒朝伴凍。貂裘衝雪晝禁風。清蒲固有安邊畫。可待甘陳傅鄭功。

仲馮北使

極北空同戴斗星。越疆猶有短長亭。漢朝正朔原無外。邊地山河不見經。雪擁旂裘綿欲拆。冰生漚酪酒初醒。我家四世俱持節。送爾皇華卻涕零。

王仲至使北

朔雪如沙萬里程。幽陰戴斗正嚴凝。終軍何必功橫草。沈尹無煩夕飲冰。茗粥邇來誇漚酪。氈裘仍自愧綿繒。歲寒拜日穹廬外。想見東南瑞氣昇。

早春郊外

滿城塵土無窮極。出郭風煙頓掃除。春淺暗泉流脈脈。日長歸鴈影疎疎。強將拙計仍謀野。等復勞生愧荷鋤。安得面山臨水地。種花移竹一茅廬。

贈楊次公祕丞

莫將陽九歸時數。自爲乾封致吉祥。必若中興待雲漢。枉教流議及桑羊。相望冠蓋交馳傳。躬作犧牲屬奉常。膚寸崇朝看變化。吾農從此萬斯箱。

酬潘及甫同年祕丞

困學那知三代英。定交良愧十年兄。斷鴻陳迹悲朝露。喬木孤飛念友生。樽酒相逢開口笑。風波遠別使人驚。海邊春色青青柳。淚落陽關最後聲。

彭城集卷十四

七言律詩

省宿

開旦文書整日勞，漏傳門掩謝諸曹。
小庭待月久不下，喬木降風空自高。
舊學荒蕪多夢寐，微官補益抵分毫。
秋來鬢髮看成雪，不似潘生始二毛。

次韻和陳學士八月十六日省宿

疎簾珍簟倚通中，落燼飄香墮玉蟲。
信宿依然十分月，黃昏正爾一番風。
流螢暗逐星過水，驚鵲時翻葉墮空。
詩興不禁頭已白，醉鄉祇有面微紅。

次韻和登州張使君

層城表海勢嵯峨，車騎雍容樂事多。
八月潮平占候火，三更日上看濤波。
閒留方士談迂怪，醉聽齊謳起艷歌。
莫以高材厭留滯，功名從古喻裘蓑。

和陳五祠九宮致齋

帝家三正付惟清。岑寂容臺最古廳。長日齋居空旦旦。幾年華髮欲星星。霜風洒葉都成赤。籬菊疏花雜
間青。多少舊溪招隱興。暫因釐事遶林坰。

題所種梧楸

曲檻層簷與樹宜。三年初見綠陰垂。聲隨白雨涼生疾。影奪朱炎暑到遲。傍倚轆轤看汲井。下留閒客坐
圍碁。會須百尺參天直。白髮空嗟拱把詩。

還家

草逕茅廬不遠城。歸來松竹已秋聲。鄙人倦客方招隱。弱女非男亦慰情。薄願自甘隨老圃。短才無用至
名卿。閭里相見成幽熟。他日禽魚尙不驚。

城上新亭

野芳喬木共回環。步到西城五里間。值有叢祠休足力。就爲幽境慰心顏。鷗聲遠水連晴日。刹影高臺似
淺山。勝事本來容易集。可憐人自不能閒。

次韻王介甫金陵懷古四首

虎踞羣山帶繞江。爲誰爲國爲誰降。高臺麋鹿看無數。廢沼鳧鷖去自雙。萬里朝雲隨逝水。百年西月過
虛窗。白門酒美東風快。笑數英雄盡一缸。
樓船西下勢橫江。元帥旌旗就約降。旋報前師覆張悌。亟傳單騎馘王雙。燕焚正自當煙突。蟻潰何堪值

水窗回首三軍歡奏凱。萬牛行炙酒千缸。
楚貢來遲詭問江。漢收羣策士心降。一言已重黃金百。再見仍蒙白璧雙。漂客脫身甘馬革。老儒投筆謝書窗。豈知三閣酣詩酒。浩唱庭花倒玉缸。
頽垣落水半平江。喬木風呼不易降。耕出珠璣時得一道逢。麟鳳不成雙。潮聲半夜來寒渚。月色深秋照舊窗。唯有魚鹽城下市。檣烏想望集餅缸。

送馮當世移金陵

滿城攜酒駐高軒。楚老沾衣共一言。何幸期年無吏事。方從款歲識君恩。潮迎綵鷁來瓜步。山映朱旗轉白門。早晚使星還北極。溥看霖雨濟乾坤。

李公擇自滑州移知鄂州

黃鶴仙人去不留。武昌官柳傍層樓。前山欲近滄浪水。芳草遙分鸚鵡洲。漁父嘯歌聊自樂。禰衡詞賦若爲謀。朱輪卓蓋一身貴。談笑豈知千古愁。

得江同州和詩後卻寄

左輔關河二十城。使車全勝直承明。白頭樽酒諳風味。乘興篇章得性情。苜蓿空肥天驥老。風霜有意阜鷗橫。驚沙急雪迷秦樹。不似山陰一日程。

次韻和裴潤州見寄

江城山翠若連環。城下波濤暗楚關。去計祇應勞侍從。歸心願復賜清閒。百年舊法軒丘外。千里傷懷羸博間。過事惱君堪白首。添歡惟有綵衣斑。

陸子履知潁州

稻白魚肥潁水清。重湖光彩動層城。經爲遊客歡閭里。特羨朱軒擁旆旌。整棹鳧鷖橫筆勢。倚樓風雨壯歌聲。聚星賢士兼存歿。配社名鄉見遠情。〔原註〕郡人王回常秩。近有詔拜官。而深甫歿逝。聞常君讓爵不至。故詩及之。

寄韓慶州

萬騎將軍西護羌。邊塵無復近麾幢。烽傳列障來遮敵。雪擁層城接受降。日暮悲笳還自疊。天寒羈鴈少成雙。檄書不得從軍樂。羈弩空令候小邦。

送謝師厚知唐州〔原註〕先是知唐州以興水田受賞。師厚家在鄧州。

腰虎憑熊近越鄉。方城南望色蒼蒼。社人隨處祠桐柏。傳馬來時認肅爽。兩國風煙通置吏。百年荆棘勸鋤荒。王成勞徠先蒙賞。史起猶應問濁漳。

送王廣淵郎中知潁州

二月潁河春水生。檣烏相望使君行。東風不起驚濤勢。遲日何妨短驛程。坐有圖書歡傲吏。靜看魚鳥忘專城。漢庭良守誰先賞。會見膠東舉相成。

送光祿呂卿知懷州

卿秩西來郡組新。東京故事本憂民。太行形勝連天黨。積石波濤會孟津。千里雄風隨坐嘯。百城膏雨待行春。期年定有周堪詔。父老無勞借寇恂。

送龔鼎臣修撰知兗州

楚國清名世豈知。郡章新得泰山歸。靜思鷗鷺霜天勢。卻看蓬瀛客旆飛。去國鬢毛休變色。還家傳瑞已生輝。翠華早晚東巡守。馳道離宮接帝畿。

送呂郎中知解州

南風吹雪暑飛霜。瞬息高車起重裝。胡馬邇來充牧苑。漢兵無處不餘糧。部丞亟上司農奏。腰組仍夸太守章。正賴研桑密心計。晚從王謝識諸郎。

送宋次道知絳州〔案〕前後漢書志。多後人所補。次道必預修唐書。故詩云然。

銅鞮宮觀久塵埃。樊守園池亦壯哉。屬縣老人書亥字。臨汾神祀問臺駘。土風頗記堯遺俗。府吏猶疑楚有材。漢史待君成十志。傳車長望北風來。

送韓文饒知均州〔原註〕自南劍州

嶺梅陰下駐旌旗。五月歸更竹使符。漢上川原連夢澤。鄖人風俗話於菟。奮髯曹吏知無事。坐嘯雲山得自娛。建禮會朝兼夜直。羨君羈弩盛前驅。

寄孫秦州

十年幕府領旌麾。事半前人此復稀。元帥詩書真用武。小戎車甲豈無衣。胡兵候月麒麟鬪。漢馬乘秋苜
宿肥。敵失陰山常慟哭。更聞消息向金微。

次韻和王秦州

粒食由來不願餘。雲飛自愧羽翰孤。已同白首滯三署。卻羨青郊授一夫。出守故人猶虎竹。相忘吾道亦
江湖。秋來臥閣知何事。鈴索生塵獄有蕪。

送喬左藏自太常博士除知施州

志士變衣非變性。丈夫能勇亦能言。東郊不顧田二頃。愛子歡然弓兩韃。黔水犀牛羣解鳩。峽山猿子躁
欺猿。蠻溪未足紆長策。會使天驕祭北門。

送王汝州

讀易絕編經獲麟。廷臣推汝老成人。宦遊獨怪烏衣晚。吏隱何妨青綬新。風穴不應長嘯虎。湯泉寧復爲
煎薪。高齋有勝宣城處。三十六峯爲近鄰。

九月十日趙令園餞送王汝州汝州留詩二篇次韻

華髮悲秋復送行。茂林修竹若爲情。菊花節去香猶在。桑落寒來色更清。趙魏優賢常不欲。春秋知我亦
空名。別離何必皆千里。分手如今越與荆。

五馬來時照路傍。名園秋物自裳裳。吹花酒面蟹螯壯。下豉蓴絲魚膾長。問事不休推景伯。讀書未見屬黃香。窮愁解摘唯須酒。身外浮雲天際翔。

送韓七文饒郎中再知解州

傳瑞生光廐馬閑。使君冠蓋隔年還。莫嫌屈產齒加長。少有甘棠身再攀。白徑嶺前開驛路。哀烏星裏望朝班。鹽車過往繁如織。驥耳能忘一顧間。

送裴郎中知房州

好去臺郎應列星。異於遷客向房陵。且看銀印懸青綬。可在金輿與玉乘。柏塢麝臍香不雜。竹崖牛角價無朋。清通便是循良術。三最從君數吏能。

寄王濟州〔原註〕濟州書言修潔西湖泉石之美

獄市并空俗已和。使君高興足婆娑。畫成林色重裝洗。鑑作湖光更潔磨。歷下軍聲從古盛。濟南名士邇來多。小寒漸有北歸鴈。話與飛翰同一過。

酬王濟州〔原註〕濟州詩言予閒暇望鄒岱諸山

郡印拘人祇看山。簿書無盡且偷閒。不羞暮景桑榆上。聊寄高情宇宙間。頗葺池臺增舊觀。旋栽桃李待堪攀。老公此意君知否。未有菟裘未得還。

送滿龍圖知襄州

鳳林關下七連城。獵獵霜風卷旆旌。漢陰抱甕防機械。峴首沈碑認智名。季孟中間欲誰與。英賢餘事亦難平。習池倒載時一往。卻是古今真實情。

次韻晁單州詩六首

五字酬君詩百篇。知音免負伯牙絃。淹留子賤彈琴地。悵望蘭成射策年。術到仙真皆羽化。師無前敵在中權。古今風雅人多少。名下聲華不浪傳。

材傑知心似合符。不違顏氏亦如愚。文章偏我不得力。懷抱與君非有殊。龜手但知能澣綉。緯蕭何意得驪珠。自攜如意樽前舞。曲盡歌長缺酒壺。

性僻材疎酷嗜詩。頭童齒缺雪垂頤。五十已過無聞爾。三百雖多奚以爲。每向後生知所畏。獨於名士喜同時。李陵蘇武俱塵土。豪傑由來自得師。

多愛不忍緣愛奇。記人毫髮忘瑕疵。垂老此心免愧己。起予它日亟言詩。衣冠爲子最青眼。兄弟數君仍白眉。瓠葉豈以菲廢禮。鮮首燔炮爲宛脾。

側逕蜂飛忙蔽日。綠陰鶯語靜移時。自疑寂寞揚雄宅。最愛清和謝監詩。詞客篇章寫桐葉。飲流籌筓折花枝。相望十舍不相就。兩地風光鎖所思。

貴公門地多陰德。慶事今君大樂生。愛子桂枝新上第。弄孫蘭茁始書名。撥弓試復穿楊葉。負鼎何妨待鵠羹。不似淮陽多病守。十年臥閣見交情。

雜諷

陽武舊恩惟丙吉。中興同學有嚴遵。封侯會自酬陰德。物色終應訪故人。可在介推懷怨望。深疑咎犯亦逡巡。剛腸獨有屠羊說。稱義孤高無與鄰。

送虞太熙著作知番禺縣

遠師猶覺丹青似。大邑知無盤錯憂。梅嶺山長因海盡。夜郎江闊傍城流。鯨魚浪作僮人鱗。槎客常隨賈舶舟。莫爲風帆徑清淺。祕書仍自有蓬丘。

送曹輔奉議福建轉運判官

馳傳典州名字高。溪山更不厭勤勞。吏逢照膽新磨鏡。事似屠牛已善刀。頗說團茶如湮酪。欲將丹荔比葡萄。使君詩思過泉湧。爲賦佳篇悟此曹。

陳植文華斗石高。景宗詩句復稱豪。數奇不得封龍額。祿仕無妨似馬曹。蠹簡傳將蝌蚪字。銛鋒瑩出鸚鵡膏。南州山水能爲助。更看英詞勝廣騷。

劉九經〔原註〕年十八及第

白首儒先困一經。此君年少獨聲名。早知劉氏無蚩者。深信宣尼畏後生。賈誼尙爲門下掾。終軍仍許出關行。限年選舉今留滯。躍馬贏糧見子情。

送隱直

齊楚分飛歲月遷。微官拓落竟依然。青雲可願已三仕。白首幾何頻十年。自昔彈冠深有意。到今同病祇相憐。陰風朔雪河梁別。乘興仍思訪戴船。

送張遂州〔原註〕自開封府判官除

九折無艱蜀道通。使君車騎最雍容。尙書不復拘三輔。御史仍開給五封。接境去思棠樹密。退公歡燕綵衣重。治民固有張京兆。坐看巴人益劬農。

次韻和張宣德合江亭

此水此山今昔遊。蒼煙古木又窮秋。起隨佳士初乘興。忽話離人始欲愁。南極早知無到鴈。北天那可際歸舟。老身學得灰心也。不是灰心淚已流。

秋日寄楊十七

簷日輝輝過午天。棖風槭槭未霜前。不甘翠葉無時落。已分黃花特地鮮。富貴應須三寸舌。文章不及一囊錢。詩翁白髮經秋甚。爲問窮愁有幾篇。

嶽雲亭

山外浮雲橫翠微。海邊初日上朝暉。我無小魯悠悠志。那欲乘風去去飛。上客高吟揮玉塵。佳人半醉舞羅衣。昏鴉獨鶴何勞問。合暝投林各有依。檻外連山如合圍。尤憐昏旦變清暉。雲行驟雨非無事。鳥伴歸鴻卽倦飛。厭見市朝車馬迹。喜看巖谷薜

蘿衣尚平畢娶何蕭散千載高風自可依

薄后廟

駟家冠虎久騰聲。龍躍中都漢道興。人事能無輸織室。母儀終見葬南陵。蒼苔複閣連荒草。喬木參雲掛老藤。欲學靈均紀天問。古堂丹碧正嚴凝。

送鄭祕丞知邛州蒲江縣

明府之官固有程。巴江繚繞趣君行。孤帆去遠滄浪色。百丈牽遲澗瀨聲。火井煮鹽收倍利。山田種芋勸深耕。舊來邛竹通西域。邊吏還知健令名。

李尚書除少保致仕

疏公黃髮欲遺名。詔秩青宮二品榮。自昔爲家皆僻地。更聞題劍得佳城。賜金給館君恩重。倚杖看山世累輕。試問門風過萬石。白頭賢子已名卿。

吳國博未五十致仕歸蘄州

名宦於身甚纏微。白頭青紫莫言歸。曼容自以微官去。遽瑗應知過事非。笛竹滿山經夏冷。江魚如玉向秋肥。避喧不厭塵紛遠。何況孤城人迹稀。

與諸公會趙氏園主人加送酒饌既而求詩書五十六字

落木稀疎存葉丹。別筵秋興雜悲歡。主人愛客願少駐。老子爲君加一餐。蕭相河山餘帶礪。謝公子弟悉

芝蘭會因休沐觀歌舞。正賴微官謁禁寬。〔案〕一本作會因休沐還乘輿。翠竹喬林雪後看。

苦寒早朝

漏絕星沈十二門。烈風吹耳萬車奔。疾驅不敢行馳道。辨色纔能認掖垣。病眼無堪頻唾沫。瘁肌時復強
噓溫。尙衣仍在青冥外。薄願何當獻負暄。

次韻和王舍人酬王工部早朝〔原註〕王時監仙源觀

天門金碧照晨光。躍馬鳴珂曉正當。人到蓬萊知不夜。地從閭闔復無傍。風移宮漏穿花遠。雲覆爐烟繞
禁香。望斷雙鳧候飛鳥。空傳詩句首東皇。

雨後早朝

雨闋涼生樓閣虛。綠槐花落影蕭疎。端門立仗交符後。禁漏傳呼上水初。伏閣預聞明詔語。退朝潛誦直
臣書。愚忠空覺身無補。放去江湖待詔除。

春雪早朝和沈編校

曉寒初怪客衣重。隱約鐘聲長樂宮。出戶萬家橫雪裏。止車雙闕秀雲中。退朝禁柳迎人綠。寓直庭花向
日紅。縱使著書嘲尙白。會應華髮兆非熊。〔原註〕漢宮有止車門

和牟公野館宿早朝

夢回仙府豁中局。未斷塵緣復戰兢。交態出門逢楚越。俗情開口判淄澠。夜長鳩鵲偏留月。歲盡天河亦

有冰闐闐晨開車馬集。五雲深處望朝昇。

嘉祐中與王丞相、吳樞密、韓端明、王學士會飲騏驎池上。去今將二十年。王有感事詩見示。次韻。水色林光照舉觴。陂塘六月起秋涼。壯年過事難重得。末路貧交故未忘。注眼階星元近極。叱臯叱采不成王。嚴徐未抵馮唐老。猶詠君詩意自印。

汾州鄭閔中學士寄蒲萄

漢使于闐伐大宛。蒲萄天馬徧長安。絕塵無復千金骨。結實常迎八月寒。遠愧故人勤置驛。每逢樽酒爲加餐。自身不得涼州牧。何以報君雙玉盤。

與倪秀才酒

學子青青佩與衿。湘中攜手一傷心。君爲壯者我白首。家在秦川書萬金。失馬頗能如北叟。似鴉那復怪南禽。相憐羈旅方無友。齋贈醇醪稍獻斟。

和賈舍人春祠太一壇二首

使節春祠太一壇。漢庭儒雅貴兒寬。星河回轉開闐闔。樓觀參差起廣寒。月射金盤霜更白。風來宮樹雪猶殘。清詩不減高唐頌。萬玉鏘鳴雜珮珊。五城金碧盡樓居。西望屯雲藹太虛。瑞氣長存春不覺。美光相屬夜如初。歸承宣室雍容問。密受神君策畫書。力士傳車空杳邈。眞遊本自接儲胥。

次韻和顧直講

故人相語笑家丘。華髮盈簪此滯留。無限風光輕過眼。邇來春色試回頭。名園秀木藁幽境。紫府真仙熟舊遊。自是山林懷勝賞。非關適野濟吾謀。

晚歸

古木號蟬鴉亂棲。涼風稍稍襲人衣。高樓鼓角悲秋意。小市漁樵競夕暉。雖有簿書容暇豫。強從賓旅復來歸。閉門躍馬俱人事。吾道何能問是非。

燈夕都下〔原註〕十八歲初至都下見燈。到今四十五年。

元夕燈光歲益新。羈遊四十五年春。垂髫已識東西事。回首宛如前後身。繡轂雕鞍驅不顧。丹臺絳闕到無因。清霜著屋風吹面。素月滿庭吾故人。

詠旗

玉關歸馬候全師。虎落無塵指列旗。壯士驩聲歌杖杜。降人破膽望槍纍。禹功遠近逾千歲。漢德并容過二儀。青海遠通青塚地。白羊斜界白狼夷。

送張器著作

長裾欲敝二毛侵。他日聞君東武吟。騏驥老成方得路。梧桐焦尾始知音。蓬萊著作芸香馥。楚澤絃歌笛竹深。七十封侯殊未晚。相看感激壯夫心。

又次韻酬著作見寄

粗了文書過目前。公餘賓宴卽歡然。臘醅趁熟先春味。官燭供燒合夜煙。惡土一番生好木。涸池三面秀紅蓮。不知尙有思人否。吟咏來詩幾絕編。

次韻王平甫直舍未開梅花

複閣深沈人到稀。官梅孤秀及花期。地寒竹柏應爲伴。春近冰霜信有時。不恨未開煩久待。正憐將落賴偏遲。催人頭白何由奈。可在江南寄一枝。

初夏喜涼

季月南州雨過春。雨餘炎氣卽經旬。北風一變如秋色。小屋三間喜病身。出戶燕兒矜羽化。堆盤梅子薦時新。融峯盛夏含冰雪。安得清涼頗借人。

上巳

風光疊疊逼人來。過去清明更不回。已日家人還祓禊。蜀江清水快流盃。關關啼鳥如相和。冉冉殘花欲盡開。自笑野心安淡泊。亦能隨衆上春臺。

南宮鑣宿戲題

複閣深沈橫九衢。京塵斷絕閉門居。士人應怪跳壺術。漢使曾無繫鴈書。暝數月華將復缺。春和庭卉已非初。東風雷雨知何在。快意青冥看化魚。

題禪寺

錦帆牙檣四百年。曲池歌榭兩淒然。又從劫火悲前佛。猶有靈光閱逝川。何處鳴禽新出谷。幾株喬木上參天。春遊不負題詩興。神助仍因夢阿連。

五月望日赴紫宸謁待旦假寐

半夜北風凜凜寒。倒衣驚問紫衣班。雲容不辨陰晴際。月色猶迷爽晦間。偏喜鳴雞識鐘漏。正憐殘夢失江山。濯纓簪筆初無補。空愧紛紛數往還。

凝翠堂

簷前老竹生無數。座上清風處處來。俗客不知看好鳥。紅塵無復污蒼苔。兒童戲掃黃金影。茗飲時傾碧玉盃。會待秋霜堅草木。簡書羌管倩人裁。綠竹參差平拂簷。疎陰掩映似重簾。留徑人誰識。蔣詡開窗吾擬學。陶潛古墻莓苔有石色。長夏江山如火炎。避地真宜近幽僻。悠悠笑謝歲華淹。

彭城集卷十五

七言律詩

送李士寧山人

帝城車馬日喧喧。物外相從意爽然。自有藥壺容到客。獨摩金狄嘆流年。高秋天幕收零雨。清露風林嘒暮蟬。曾愧丹砂爲狡獪。更談滄海變桑田。〔原註〕予妻常病。山人自其家取藥見遺。山人妻能采藥也。山人又嘗談南海神事甚異。

寄彥猷移鎮錢塘

紫垣清切擁鈞陳。閣道分明絕漢津。未怪靈槎滯吳會。祇堪藏劍動星辰。懷金紆組臨鄉社。醜酒椎牛宴里人。行樂從來多壯觀。秋風莫使鬢華新。

平山堂

危棟層軒不易攀。萬峯猶在戶庭間。長空未省浮雲礙。積翠如遮去鳥還。寡和陽春隨白雪。知音流水與高山。吳中辯士嗤枚叟。漫說觀濤可慰顏。

次韻和祕書省林舍人校書寓興五首

客塵作業通三世。儒墨分流至九家。投閣何妨惟寂寞。起予仍自悅紛華。夢緣酒食逢芻狗。兆應錢財屬
火花。安見高人捐外累。獨超無有躡雲霞。
百緣不信皆前定。千古相矜盡小才。夢月豫占沙麓襲。建章如待柏梁災。朱英強欲希无妄。萇叔空勞射
不來。聞道蓬萊更清淺。便應滄海起塵埃。
勇夫常作三軍獲。辯士多從五鼎烹。到了是非皆妄想。不緣僥倖亦無名。小山叢桂容招隱。負郭良田任
耦耕。倚伏會應齊北叟。朱愚那復問南榮。
事緣難易始相成。楹直寧當企棟橫。坐論巖廊從自貴。退棲林壑未爲輕。俗情熠熠陰中火。世路擣菹馬
外坑。要使襟懷似雲月。太虛無處不偕行。
縮手旁觀晒汗顏。未知才與不才間。勞生精衛填東海。多事愚公移北山。語道此身甘髮白。息機他日賴
心閒。良金百煉纔成器。躍冶無知鐵石頑。

黃朝議賜紫

長年金紫最相宜。晚達非干入手遲。白髮閱勞官職事。赤松元作帝王師。魚銜印鈕丹麟舞。鶻勘袍花爛
棋垂。少似主恩崇舊德。掛車無異立朝時。

回致仕董中允

富貴致身良獨難。寄書空復走長安。誰能東郭雙穿履。徑出都門一掛冠。家事田廬隨几杖。君恩班序接鵷鸞。顏生尙少時無用。長缺因公慨屢彈。

次韻酬濮倅李郎中見寄

相見無期得寄聲。更憐詩語獨丁寧。驅之老馬尙知道。行矣泥龜甘不靈。半百光陰頭總白。二三朋舊眼偏青。芳春樽酒何由共。悵望東郊長短亭。

答仲馮宿興慶池作

車馬還城君肯留。通宵歡語破離愁。水風楊柳猛消暑。沙雨芰荷潛造秋。驚月禽棲時落樹。避燈魚鬣暗衝舟。天明紅日驪山道。陳迹依稀似夢遊。

遊凝祥池飲

柳綠蒲新小曲江。洞門岑寂閉僊幢。波心殿影遙相況。花底禽聲各自雙。薄俸猶能償酒券。老年無事守書窗。街頭月色緩歸去。調笑相隨白玉缸。

同都官遊左山晚歸汎舟城濠呈座客

憶過西湖上虎丘。雪霜乘興偶來遊。蒼崖古木見僧剎。落日微波迎畫舟。從道前塵都妄想。亦逢清境爲淹留。座中同是東南客。試說風煙似彼不。

初春後園

雜樹無行小徑開。新陽留客去頻回。梅花著蕊南枝暖。柳帶牽絲春事催。池面水光如照鏡。城頭山色勝登臺。長年慵懶遺詩句。無奈風煙引興來。

寄人

子雲投閣爲奇字。君山殺身非讖書。埋獄誰能知匣劍。焚城何意禍池魚。賜玦應知謝冠佩。杖藜自爾就田廬。丈夫蓋棺事乃已。白髮勿羞樵與漁。

重次新字韻寄子瞻公擇

古來蘇李有三人。今復齊名事亦新。秀出文華喧右蜀。指揮能政接東秦。定交笑我將迎拙。垂老於君意氣親。似向荆山逢珉玉。如從渥水就駢麟。

晁美叔前寄知字韻詩。別求予詩。既已和前篇。因復用前韻作一篇寄晁。

促軫危絃音最悲。傷心那得世人知。由來入室升堂者。意在高山流水時。與子徑爲竹林宴。到今長記角弓詩。文昌近極官清貴。不負羔羊及素絲。

寄熊伯通

竄逐衡湘一病翁。望鄉愁對祝融峯。不同桂管爲元帥。聞道蒼髯益壯容。嶺水分流清注北。雪花成片更宜冬。丈夫生死論交地。書札寧當向我慵。

原父兄近別入都寄此詩

水鄉春盡事何如。綠樹陰成穀雨初。杯裏尙餘寒食酒。城中已賣鱸殘魚。近來慵懶非常甚。別後嬉游益便疎。省事只圖千日醉。勞心不讀五車書。

寄王宗傑

謀拙材疎嬾是真。豈堪爲吏走風塵。已知富貴非吾望。欲以詩書老此身。爲問折腰從斗米。何如白眼看時人。聞君高臥辭冠冕。多幸佯狂亦有鄰。

寄張四

天下風塵日可歎。豈惟西域與南蠻。舉世相爭蝸角裏。此身無事馬蹄間。力耕可以得飽食。從仕于今真厚顏。相勸休官勿待漏。卜居終近虎丘山。

嘉祐末予始爲學官。同舍六人。後二年間。錢醇老爲祕閣校理。楊之美出判潁州。劉隱之、姜至之、麻仙夫、李景真、相次爲王宮教授。曩游無復留者。初秋夜直。偶書寄楊之美。

夷路驅車勢易奔。青冥縱翼自孤鶩。求爲散木甘無用。正似靈光幸獨存。汗簡老生躋壁府。曳裾賢傅遍王門。子雲寂寞經同病。會待庭枝看有孫。

寄仲馮

終南秋雨色如新。舊國登臨易思人。廢塞池臺餘氣象。埋藏金玉見精神。三公七相空丘壠。萬戶千門盡棘薪。安得身隨飛鳥翼。相從談笑折西賓。

寄館中僚舊

落帆江浦念睽攜。遠迹勾吳不自知。鼠穴祇緣銜窠藪。屬車空羨載鴟夷。黃雲海色迷仙境。丹葉秋風感鬢絲。爲誦延年五君詠。敢論平子四愁詩。

寄刁景純

使君歸老意逍遙。黑髮蒼眉見後凋。自力登山不扶杖。等閒留客亦通宵。萬松喬木參雲日。百頃春苗浸海潮。徑欲從公十日飲。豔歌清絕舞妖嬈。

寄胡完夫

去國那無鬢髮華。白沙猶覺勝長沙。晴雲亂眼江楓色。宿雨銷魂野菊花。過客誰能問名姓。加餐自不厭魚蝦。海陵倉粟年豐熟。吾亦慙爲飽煖家。

寄韓持國

承明不許曳朝衫。流落江湖默避讒。海氣無時成霧雨。魚租終歲雜腥鹹。喜逢晴日聽鳴鶴。卻倚津亭數去帆。可是絳侯輕賈誼。自無張禹託蕭咸。

次韻錢虞部九日樂郊有感

前日吟君九日詩。名園興盡復傷離。浮雲色變曾千古。黃菊花開又一時。鍾子絕絃誰與聽。羊公墮淚不堪悲。孤生長抱吹埴感。何況池塘昔夢思。

寄王安國。時復官大理寺丞。監江寧糧料。

招隱長吟叢桂詩。賜環歡奉璽書歸。東郊瘦馬驂騑在。南海明珠薏苡非。賓客重尋廷尉寺。官曹不遠故山薇。須還長孺銀青綬。〔原註〕韓安國起徙中爲梁二千石。二千石銀印青綬。聊看翁思博士衣。

〔原註〕昌邑太守王生。字翁思。

酬王定國

臥讀羣言起欲行。壯夫爲不負平生。上書略數三千牘。掉鞅何煩七十城。築室曾同老農計。寄詩猶見故人情。病軀懶厭金門步。長愧彤廷午漏聲。

酬晁美叔

此身敢與世崢嶸。禿髮衰顏太醜生。長愧使君心匪石。每因佳句贈連城。病來筋力惟求臥。老去文章不近名。酒量消除百無一。未嘗酣暢若爲醒。

酬章質夫

晚悟頭陀塵不侵。何妨居士著朝簪。故人自是相忘者。秀句依然莫逆心。翠柏高松存茂悅。潛鱗羈羽任飛沈。萬緣起滅空花喻。可向空花擬重尋。

次韻酬韓三相公見寄

自昔羊公峴首遊。譙渦開府祇千秋。〔案〕渦水在譙縣西四十八里。韋平繼相聞詩禮。魯衛提衡絕輩流。

功與榮名逾響捷。福隨陽報似言酬。孤生承乏曾何數。玉鉉龍文顧瓦甌。〔原註〕丞相初登第。先太師方鎮亳州。公與弟兄歸覲。題名在壁。今丞相既登鈞軸。而介弟玉汝太中。復在樞府。

酬王平甫

黯澹流雲索莫風。曉瞻雙闕望蒼龍。秋還鷹隼非無意。涼入楓槐不變容。寓直鬢毛悲騎省。讎書編簡待陳農。黃花黃葉催時節。倩問誰家酒最醲。

次韻酬孫少述見寄

退尺無緣復枉尋。信書那免不通今。爭評玉價應輸厚。能爲魚謀豈厭深。待得散人如散木。敢論機械有機心。子荆詩筆興公賦。萬事慙君早息陰。

次韻酬顧子敦見寄

丹砂未化不成仙。白髮衰容五十年。已自灰心當世事。更能回首大夫賢。對棊可待矜無敵。讀易聊須記絕編。寄語山陰顧元歎。人今同病始相憐。

次韻酬曹極司法

越紙題詩寄我來。君家八斗定多才。冰清玉潤高風舊。白雪陽春病眼開。長見夔龍參濬哲。不聞徐樂避雄猜。自緣衰老無能解。戰勝方當去剪萊。

次韻酬孫少述

使節皆窮濁水源。降羌係踵慕稱藩。強顏假守真無補。取笑高人不憚煩。豈有天池容斥鷃。莫將溝斷比犧樽。南山若許堪歸老。二頃平田十畝園。

酬韓相公

病臥湘山念所親。惟公長記可憐人。寄書不啻從容語。問舍仍慙消息真。半死孤松函徵羽。戀軒瘦馬強精神。祁奚鮑叔寧欺我。三入今看總四鄰。

酬劉宜甫

萬價睢盱倚市平。百工紛紜待宮成。神仙亦有丹臺籍。壯士當爲猛虎行。畢娶幸能同尙子。敝衣終不效唐生。洞天欲到先能說。十二樓前列五城。

酬王定國五首

放逐朝恩本自優。衡山猶是古荊州。百年生計羞蝸角。九品人情看馬頭。炎瘴還歸君不恙。風波別去我離憂。柔姬一唱陽關曲。獨任剛腸亦淚流。豈有多方書五車。爾來留意就丹砂。誰將飽食倉中鼠。換取紅蓮火裏花。三顧祇能矜彼善。萬鍾多不悟堪嗟。蟠桃結實何難俟。況值安期棗似瓜。貴公孫子族關西。失路青冥翅羽垂。當世朋游皆父行。古人方略足肩隨。薄材老去歡傾蓋。直氣交新喜盡規。滿目江山屢回首。白雲流水付心期。

江岸青楓連白蘋。片帆如箭射千鈞。風煙何處喧墟市。簫鼓誰家賽水神。雁鴛陂湖爭就暖。杉松廬舍不知貧。滯淫何必多離恨。譬似生爲澤國人。願賜支離不肖身。幅巾田野任天真。我行三逕一廛地。君卽東阡南陌人。晏臥自輕車結駟。食薇從使甑生塵。漳濱卓犖桓公健。盛德由來必有鄰。

承天寺翠景亭

一山篁竹間松杉。伏虎猶存居士庵。鐘磬有時聞絕壁。漁樵將晚會平潭。薄雲未解成春雨。返照偏能破夕嵐。我所思人桂林外。憑高惆悵贈雙南。松有喬林桂有叢。石梯苔壁興無窮。快心疊嶂雲如掃。會意澄波日正中。修竹緣崖高竦竦。早梅飄雪細瓏瓏。狂吟大叫青冥外。驚看漁郎下釣筒。

遣懷

六年長病每愁予。末疾風淫豈易除。予子何曾暫忘履。拮据空恨不能書。苦遭白髮無他術。常得中醫亦自如。欲向明廷乞骸骨。角巾藜杖整柴車。

種竹重寄子瞻

官曹何獨異吾廬。修竹成林手種初。未必七賢皆縱逸。因從三昧得無餘。風聲似水還成韻。日影填金尙覺疎。舊事喜君能記憶。興來當復埽牆書。

周樞兄弟得解。寄王教授察推。

今秋鄉里薦賢書。年少周郎智有餘。全得鳳毛增意氣。正聯鴻翼上空虛。汝南月旦評無愧。諸老先生謝不如。衰白慙居丈人行。長風猶欲助吹嘘。

濟陰縣新成官廨。贈知縣著作。

鼠牙雀角穿垣屋。墨綬銅章愧吏民。製錦可無容膝地。戴星親作執柯人。奮飛翬雉簷雙翼。積疊魚龍瓦萬鱗。若比治蒲增四善。種花仍欲笑安仁。

送學正李秀才歸蜀

金馬書來信不違。相如獨授七經歸。郡迎徐孺知懸榻。家望蘇秦想下機。峽底奔雷江亂湧。嶺頭如雨石交飛。丙魚郛酒歡閭里。悔殺京塵化素衣。

清門

清門早日素風傳。正在圖書翰墨間。惠子應輸五車富。相如才授七經還。朱欄碧瓦森華屋。喬木浮雲滿舊山。渥水丹丘遠千里。鳳雛神驥落人寰。

蜀山漠漠水溶溶。高閣經營得我公。萬軸鉛黃無脫簡。千尋清白有遺風。地留神苑逍遙外。天占仙壺縹緲中。公是蓬萊真學士。故應乘此問鴻蒙。

西省種竹偶書。呈同省諸公。并寄鄧蘇二翰林。

五月十三竹迷日。今年仍自晏陰初。分將池籩千竿翠。就得楓槐一雨餘。紅葉蒼苔相映帶。南榮北戶頓蕭疎。欲爲林下諸君詠。便是濤戎亦盡書。

長安城南

三百離宮何處尋。秦山相向晝陰陰。城南地去天尺五。杜曲田皆畝一金。源發清泉隨種稻。穠生脩竹自成林。老年欲爲五陵客。射獵往來長縱心。

送陳成伯出牧陝府

陳公六十丐朱輪。豪氣誰憐亦爲貧。原上鵲鴿深涕淚。櫪間騏驥發精神。山遠折坂皆夷路。河透醜渠卽要津。千歲海棠死鐵色。因君光彩會如新。

次韻蘇子瞻觀范景仁新樂

大儒高論本升堂。物外光陰更不忙。樂預請觀同季子。書雖未見屬黃香。正聲仍許三人和。古尺應無一黍長。鶴舞鳳儀時莫識。勾陳武帳省中央。

觀范公樂有感

蜀公精思古人爲。論樂成書八十時。那有伯牙爲聽者。空令一足尙傳疑。羊山鉅黍知無用。牛鐸遺音自不欺。便欲祠君從樂祖。出門陳迹奈深悲。

贈黃知錄

此身羈宦閉門居。里巷蕭條到客疎。道舊瀟湘與誰可。無雙江夏卽君歟。塢中吹笛無畱事。悵望何人得異書。翠羽明珠生海滙。更知名下不應虛。

題朱陵閣

蒼煙漠漠石粼粼。坐倚山顛瞰水濱。開闔波濤專閱世。春秋風月不愁人。未知孤鳥歸飛意。聊問長松老大身。信有朱陵仙府在。玉樓珠殿闕爲銀。

步瀛閣

方塘十畝水幽幽。魚自潛深鳥自浮。爲有風光陶永日。故題亭榭擬滄洲。旋移修竹看停雪。未落垂楊正奈秋。客到便留同一醉。山公不問習池遊。

水閣雨中

雨濯苔衣水鏡明。風搖荷扇露珠傾。空堂送暑蕭蕭意。高樹吟秋惻惻聲。笑以稻梁邀鶴舞。莫將鐘鼓使魚驚。煙岑寂埃塵絕。頗愛孤舟盡日橫。

中秋望月

中秋自昔賞金波。爽氣初凝暑頓過。風雨定時看有數。樓臺高處得偏多。正憐白髮宜相照。不爲衰顏惜暫醜。願假長繩留玉兔。望舒能與倩夸娥。

同諸公登祕閣

複閣橫雲不易登。宮煙漠漠柳層層。始知奇獸名天祿。徧見羣書蠹羽陵。此去杳冥無幾許。向來游集類多能。秋風撩亂吹蓬鬢。老愧諸公話得朋。

東園新種雜樹

青苔翠竹吾人好。穿徑誅茅野老家。豈爲素封增橘樹。還知避世種桃花。會因叢桂留騷客。卻憶安榴逐漢槎。已有風光催物色。定甘羈旅待年華。

題深甫新種樹

壽張樹梓待成器。方朔種桃因著花。古人旣信十年計。野老今知五柳家。幽鳥鳴春能信宿。翠陰向暑會交加。甘棠不忘角弓賦。與子相好情無涯。

長城逢周鼎

田家秋收朝不歸。客子到門休馬蹄。偶倩樵兒遠相問。倏乘黃犢仍有攜。白頭蕭颯映紗帽。薄酒清冷將臠雞。幽興每於山野盡。爲君一醉判如泥。

臘月十九日雨後

常年過臘雪猶繁。澤國春光已可憐。初怪醉魂迷甲子。稍知客路斷山川。柳條着雨看成綠。花蘂融冰乍欲燃。避地早辭車馬迹。杖藜猶有里中賢。

冬至偶作

郡南百里卽羣舒。留滯頻驚歲月除。閒過著慵思運甃。老來多忘卻抄書。水鄉鳴鴈寒無數。山路幽芳冷自如。晝坐偏知日南極。十分紅影在吾廬。

國子監御書閣觀雨同張主簿

閣外涼風得凭欄。陰晴相望一城間。過雲快雨噴濃墨。收水長虹墮缺環。斜直樓臺經灑濯。空無燕雀自飛還。聖朝百吏都勤事。〔原註〕漢詔有勤事吏優借儒官到老閒。

重題間字韻

棟宇雲生覆畫欄。御風身在杳冥間。露頭不覺吹烏帽。熱手猶須握冷環。欲斷嘶蟬仍自續。倦飛孤鳥亦知還。君看老驥驚秋意。日暮涼生十二閑。

雲水

雲水東南萬里來。宦情羈思兩悠哉。舊交備禮矜垂老。晚輩多端謗不材。匠石頗知幾死木。火爐容有復然灰。過梅收潦秋風起。待得鴻飛燕子回。

和王仲至錢塘

胥山樓閣半空虛。春雨秋風興有餘。溪女載花浮水艦。潮兒戴火棹雷車。君尋故事應如夢。我得新詩欲信書。正是霜天向搖落。拂衣猶自及鱸魚。

賀王丞相賜玉帶

捷書吉語報安西。辨色彤廷喜氣齊。蕭相論功非汗馬。晉公成事有通犀。尙方製作皆金玉。委佩光華想虹蜺。欲問九環加賜袞。何如判白授封圭。

鳳凰臺

江水中分白鷺飛。鍾山秀出衆山微。鳳凰去後高臺在。麋鹿遊來舊國非。萬里孤帆長在目。夕陽游子憺忘歸。六朝人物都荒草。但有寒潮信不違。

郡齋卽事

鶴髮霜髯新復新。爲郎補吏兩因循。爭先不及三千客。顧後猶容五十人。絕學捐書從佚老。曲肱飲水會忘貧。江湖極目連天白。照影知無纓上塵。

與宋次道舍人同在殿中覆考進士次道子姪同就御試贈次道二首

池上君今得鳳毛。階庭蘭玉見兒曹。橫參氣象開衡石。丹桂芬香近赭袍。冀北羣空經相馬。海濱人去復連鰲。西毫里第烏衣巷。賀客無辭應接勞。不恨郎潛有二毛。喜從仙禁接官曹。重吟紫殿森珠網。縱觀諸郎奪錦袍。汗血來時皆驥子。神仙不動倚靈鼈。明堂梁棟掄材盡。世上那知伐斲勞。

燕子來馬上作

馬上春寒透客衣。半晴天氣燕飛飛。不知社日明朝是。轉憶吾廬共爾歸。風外輕輕雙翼疾。沙邊款款數

聲微。畏人自習人間世。何事江鷗浪見機。

酬章朝散

本無材。畫備驅馳。豈有文章結主知。廟鼎陳前羞瓠落。井泉方潔懼餅羸。晚交賢傑真難得。辱在泥塗祇自嗤。澧有芳蘭沉有茝。夢魂無日不相思。〔原註〕楚辭云。沅有茝兮澧有蘭。思公子兮未敢言。事無機變卽無疑。此意唯當靜者知。末路風波成失所。歲寒霜雪正同時。勞生毫髮差千里。醉眼須臾已萬期。江上鯉魚天上鴈。寄書嫌少不嫌遲。

出汜水關

洛河嚴鼓夜方中。上馬西郊滿面風。照野月華鋪水白。轉山銀燭列星紅。視祠太一觀燿火。從獵長楊賦射熊。壯觀已隨陵谷變。龍旌搖颺倚秋空。

齊州史君學士有游山詩。學官諸生成和。史君又有詩二章贈之。以刻石摹本示予。因次韻。

辨如流。輟解連環。稷下諸生大小山。幕府名聲收藉甚。雲泉氣味屬偷閒。茂林深壑逢迎際。細草穠花次序間。值有羽人招隱士。想君乘興不知還。終日塵勞躡轡還。乍臨清濟看羣山。飛來獨鶴應知倦。過去長雲本自閒。開國東西誇十二。待賢季孟哂中間。吟君詩句心蕭散。舊觀神明覺頓還。

還王平甫秀才詩稿

王子能詩古不如。壯心豪氣未應除。百年總付人間世。一腹都容天下書。白雪關山來騷鬣。綠萍池沼秀芙蓉。窮愁已作無聞老。相愧臨濠一問漁。

見蘇子瞻所作小詩因寄

千里相思無見期。喜聞樂府短長詩。靈均此祕未曾覩。郢客探高空自欺。不怪少年爲狡獪。定應師法授微辭。吳娃齊女聲如玉。遙想明眸嚙黛時。

得奉世寄詩

江城花柳復殘春。每上高樓望所親。身滯蠻舒誰與語。書來子弟爾成人。老侵鬢鬢莖莖白。情在篇章字字新。幸有竹林堪縱傲。罷官真作自由身。

偶題

人間變化亦何常。不在他生與彼方。病後公羊哀作虎。顧時司馬懿爲狼。龍眠頓長參天木。龜老猶堵病叟牀。又有此曹惟奈久。非干天地日偏長。

次韻和通判庫部會基

三百縱橫事不平。古今仙俗判昏明。已居勝勢誰前敵。獨暗機先誤必爭。寥落寒星天欲曉。稀疏過鴈雨初晴。南陽畫諾庭無訟。正賴君詩得此聲。

叔父寄李氏庶子泉銘

翠壁清泉庶子銘。文工境絕兩知名。埋藏雲外山神護。流落人間俗眼驚。恨不陪遊如阮籍。遠憐模寫到蠻荆。古書豈獨記名姓。自恐疎慵學不成。





彭城集卷十六

五言長律

章武殿

歷數歸真主。乾坤仗義兵。南夷長後服。下國怨西征。麋鹿荒吳苑。梯航聚易京。春螽那恃力。朝菌欲長生。
雷雨隨金鼓。鷹鷂起旆旌。靈旗概牛斗。白羽射欃槍。散地人誰保。連薨火徹明。晨門迎短策。死斲斷長鯨。
父老前流涕。農夫未釋耕。將軍薦牛酒。愷樂會韶箴。虢滅虞何恃。崇亡紂亦傾。一戎終薄伐。再駕就昇平。
舊邑更脩武。行宮卽顧成。奎芒垂篆刻。天質望氛清。羽衛嚴丹極。潮音接化城。欲回江海水。都作頌歌聲。

溪上

窄地穿茨拙。高城晚日斜。竹籬侵水面。溪女浣汀沙。老樹垂朱實。懸藤結白花。綠萍浮碎點。芳杜上新芽。
一邑過千室。十金無數家。魚蝦與菰米。惆悵此生涯。

和裴庫部十二韻

懷人存蔽芾。招隱賦宵宗。賢傑多能事。音徽自不瑕。偶然新樸斲。一笑爲譴呀。夏屋已隆棟。清池非漚麻。

望。賒。隨。朔。鴈。坐。久。至。昏。鴉。好。事。逢。諸。彥。佳。聲。播。四。遐。燕。遊。安。以。樂。詩。語。正。而。葩。霜。應。豐。山。石。灰。飛。河。內。葭。
涼。秋。將。落。帽。斜。漢。挹。浮。槎。老。木。圍。岑。寂。蒼。苔。積。鬢。上。聲。影。瑤。光。天。不。遠。圭。影。日。無。差。莫。怪。長。吟。苦。良。金。出。
汰。沙。

南征二首

漢。皇。開。五。嶺。虞。帝。事。三。苗。定。有。南。征。問。遙。知。用。武。朝。前。籌。皆。廟。略。選。士。飢。風。飈。潦。水。江。湖。大。雲。山。故。國。遙。
天。陰。凝。殺。氣。師。老。聽。哀。謠。猿。鶴。愁。君。子。龍。蠶。憶。架。橋。繡。衣。方。責。戰。虎。節。竟。乘。輅。白。骨。不。歸。葬。冤。魂。誰。爲。招。
猶。傳。發。閩。左。願。得。聽。簫。韶。旅。泊。時。流。動。何。由。問。九。霄。

揚。越。舊。秦。兵。苗。頌。尙。禹。征。初。驚。一。使。任。那。用。萬。人。行。友。戶。凝。昏。視。滄。波。觸。駭。鯨。越。裳。無。信。息。銅。柱。定。將。傾。
服。嶺。東。南。尉。戈。船。萬。里。程。江。通。夜。郎。道。秋。入。伏。波。營。插。羽。頻。封。檄。馳。輶。屢。請。纓。介。鱗。悲。物。色。猿。鶴。悵。民。生。
幾。日。封。京。觀。歸。師。捲。旆。旌。休。聞。七。科。戍。無。用。五。陽。兵。海。國。犀。牛。遠。南。琛。紫。貝。輕。平。生。一。長。劍。歲。暮。望。機。槍。
寄。橙。與。獻。臣。

清。霜。夜。漠。漠。佳。實。曉。纍。纍。鵠。鷖。攢。修。榦。金。華。耀。夙。曦。狂。醒。香。處。析。瘠。渴。味。餘。衰。採。摘。悲。凡。口。漂。零。恐。後。時。
頌。聲。騷。客。誤。〔原註〕屈原有橘頌。錫貢禹書遺。惆悵生南國。煩君品藻詞。

酬臨濮劉推官

治。民。非。己。長。那。得。士。心。降。爲。問。來。鳴。鳳。何。如。止。吠。厖。壺。餐。慙。鼎。食。鉛。割。謝。矛。鏃。辯。士。更。持。節。佳。兵。正。上。瀧。

薄田桑十畝。小市釀千缸。自喜庭無訟。寧論智少雙。陪京開左輔。振鐸服中邦。禁樹分留印。天枝涖建幢。孤生老將至。壹意信猶扛。賴倚絃歌化。餘風勉政龐。

送賈士彥延平知光化縣

名家千里駒。富學五車書。柱後文無害。絃歌智有餘。素風存翰墨。陰德在門閭。江漢子男邑。穀城桑柘墟。曾爲都尉治。今亦萬家居。安穩飛鳧鳥。新鮮縮項魚。繡衣夸里父。壽酒薦親輿。不作期年別。看君就詔除。

送高麗使

絕域求通使。皇華益藉才。男兒萬里志。笑語片帆開。積鹵生陰火。奔濤起書雷。曝鱗成島嶼。吐氣誤樓臺。城邑東迎日。居人學用杯。詩書自天性。冠帶及家陪。歲月如勤止。登臨亦壯哉。威聲逾肅慎。仙事指蓬萊。鵬向南溟近。槎常八月來。言瞻析津次。遙見二星回。

次韻和宋職方北樓

勝事略就手。茲樓無復加。棟梁宏可愛。丹碧麗非華。風月登臨最。川原眺望賒。斗城知日近。瀛海自雲遮。杖履歡乘興。文移謹報衙。晝閒禽語靜。歲熟市聲譁。柳影重重幕。蓮香處處霞。舳艫隨渚遠。睥睨向人斜。話聽游童樂。詩煩上客誇。國風麟趾應。賓宴鹿鳴嘉。鷓鴣無餘力。騏驎不待撾。衰遲竟何補。襆被念還家。

復次前韻

仙游欺緬邈。古事厭增加。自我新形勝。因之翫物華。不勞工子勸。無價境天賒。雲構森如畫。輦飛勢莫遮。

靜看梁燕賀。閒聽野蜂衙。曹事初無壅。軍聲信不譁。倚欄歌白雪。爲客進流霞。快意涼風起。餘歡素月斜。吳趨應有始。齊難詎爲誇。夏日思王粲。名流得孟嘉。優游琴八疊。悲壯鼓三撾。遍看題詩語。飄然自一家。既和宋君佳篇。因取加字韻中所未用者。別爲十二韻。

板築廢已久。樓居仍可嗟。敢辭才不逮。何說智無涯。史例同新作。民謠異刺奢。棟梁虹夭矯。軒檻獸盤拏。萬室瞻華宇。千兵擁建牙。浮雲生柱礎。杲日透窗紗。明滅穿林水。稠重覆塹花。長空指去鷺。過雨亂鳴蛙。屢獲詩人賦。時紆長者車。薦觴凝縹白。諧語繆壺齟。隱吏容攀桂。終更遽及瓜。多慙雙鬢雪。蕭颯對文綯。合加字韻兩篇。二十四字成一章。更互次之。詠曹之土風。并敍出處。寄呈司年職方。

漢郡王封寵。周宗伯命加。犬牙基自若。麟趾歎于嗟。陵谷隨人世。春秋積歲華。洩雲餘蒼蔚。浮濟變津涯。端木倦游學。朱公精貸賒。於今富而麗。遺俗儉寧奢。使轍常交錯。京藩倚扞遮。鋤鉤非盜用。簫勺換兵拏。樸直叨三組。工夫盡兩衙。戎容剖符虎。士氣肅旗牙。園土幾無訟。虛庭不禁譁。對碁銷白晝。清嘯岸烏紗。池館澄潮水。樓譙冠暝霞。綠梢簷外柳。紅朶砌前花。徙倚危欄峻。行來繚徑斜。巢林安短翼。擅壑愧跳蛙。夙昔未更事。游談多自誇。奏盈方朔牘。書過惠施車。臧室初糜迹。連城晚拜嘉。華顛看欲落。病齒不勝齟。珠璣輕魚目。桐絲陋馬搗。敢論雞似鳳。願食棗如瓜。臺妙前辭滿。安輿久臥家。最容高尚志。那肯待青緇。

又十二韻

絕境可遺老。清心仍去邪。樓頭喧燕雀。川面動龍蛇。碧瓦浮煙素。朱甍麗日赧。倚風時坐嘯。乘月更吹笳。

庭樾交傾蓋。池房雜舞鬢。涼秋乘爽境。吉歲驗汗邪。廚釀全欺魯。兒歌習陋巴。林珍餉桃李。溪飯列魚蝦。勝賞須神會。浮名祇盜夸。誰能貪課最。本自學禪迦。驕旅枝栖鵲。田園舍負蝸。蕭條看白鬢。早晚得丹砂。

酬范判官喜雨

一旬天再雨。惠澤夜來深。震發雷霆事。榮華卉木心。問年如隔併。閱日屢辛壬。安水江千里。良田畝一金。劭農非有術。望歲忽爲霖。雝雝依青隴。跳魚出廢潏。夢成池上作。喜見洛生吟。磔敵聯飛鏃。高張信雅琴。緒風開畫色。遲日媚花陰。更有資清興。連峯映碧潏。

赴官京東同舍諸公觀音院見錢有贈并簡不至者

今日承人乏。東州假傳車。勞生復去國。垂老欲捐書。斗酒相爲樂。諸家食有魚。華燈續光景。鳴笛問吹嘘。卽事已陳迹。懷人方跂予。要官多謁禁。數子莫情疎。啼鳥春猶淺。高花日勝初。朝回應見念。會語殿中廬。景德寺河沙院。餞蘇安上知泰州。劉元忠河北都運。分題得無字。

今朝一樽酒。聊與故人俱。非復少年日。深驚別意殊。燕雲低朔漠。楚水向江湖。報國不一事。出門成異塗。騰鱗安浩蕩。雋翼就虛無。應笑白頭老。閉關方據梧。

過太康縣此路入亳州云是先帝昔東幸時馳道也馬上口占行二十里成三十韻

維昔東巡狩。天王景宅朝。金椎隱馳道。象載下招搖。呂應青雲近。關迎紫氣遙。旄頭前詔羿。陪乘後征僑。奉引三司肅。中堅萬馬調。旂常亂辰象。劍佩雜瓊瑤。多士和相讓。諸侯貴不驕。海神來積雪。仙馭會祥飈。

象帝初觀妙。猶龍此見譙。強名大樸著。將隱德音昭。上善泉仍潔。知常檜後凋。虛心明左契。聞道首參寥。絳節賓閒館。璇宮盛綺寮。洞天留白日。書法祕青霄。瑄玉嚴禋祀。歌童采夜謠。衆神如向座。佳氣鬱通宵。隴麥聞重秀。房芝蹇紫苗。醴泉甘愈疾。舞鳳樂儀韶。舉翼王喬鳥。排雲子晉簫。頌釐知簡簡。奏賦欲飄飄。麗澤驚雷雨。鴻恩霈蓼蕭。百年皆就見。比屋幸寬徭。牧馬猶如隗。封人預祝堯。歡聲喧望幸。舊里不崇朝。萬域車書混。重明禊沚消。鼎成因脫屣。桑變忽觀潮。雲霧常疑祀。衣冠祇葬橋。藏書思柱史。問遠謬祈招。躍馬遵遺轍。談王就采樵。生遲千一日。無所效芻蕘。

次韻和石曼卿泰山

步至東山表。纔知嶽鎮尊。百川趨渤碣。一柱際乾坤。託始無懷氏。談更洛誦孫。後王崇檢玉。方士說天門。巖石居凝命。羣峯遠駿奔。陰陽殊雨露。朝夕異涼溫。學者譏秦事。功臣誓漢恩。氣連滄海碧。影變濁河渾。候日來丁夜。捫星待合昏。仙真疑史闕。宮殿謹司存。落水雷穿谷。危松珀擁根。更尋宣父志。雅意屬崦嵫。將至洛中。先寄宋次道諸幕府。

頻年洛陽道。秋月照征車。關口朝煙上。伊川曉日初。艤船看飲馬。投策數游魚。蟬嘒隨林靜。鐘鳴應谷虛。夙齡懷勝尚。吏役久愁予。及此娛山水。翻知喜簡書。名都士淵藪。盛德世璠璣。羈旅如傾蓋。詹言興有餘。

錢子高舉賢良中科寄賀子飛

當世英雄殼。連年伯仲賢。友于聲競爽。敵萬智無前。讜議天人際。馳辭日月邊。會驚文得鳳。真謂筆如椽。

萬乘親前席。諸生敢比肩。晚成無近器。妙選悉青錢。濟美高陽舊。傳經韋氏專。公侯將必復。廊廟定誰先。步武青雲接。官曹畫省聯。軼羣看赤驥。洵直想朱絃。德賞今誰擬。才難古亦然。從容照棣萼。聞望已陶甄。夏屋方隆棟。雲檣穩濟川。那令得賢頌。祇貴漢王淵。

送裴二知蘇州

著書玄尚白。送客鬼揶揄。積水望江海。秋風吹軸轡。貴人千騎長。紫綬左魚符。遺愛留南國。歡聲接舊吳。曉霜繁橘柚。過雨熟菰蒲。安得如王子。從君飛隻鳧。

和原父同江鄰幾過淨土院觀古殿吳道子畫楊惠之塑像及顯僧傳當世貴人形骨仁僧鼓琴作。

真賞非俗嗜。雅游知勝緣。百身化前佛。方丈納諸天。工以智自表。名由高益傳。吳生擅粉繪。楊氏妙鈞埏。能事古未盡。希聲今亦然。倅圖觀肖像。撫弔置鳴絃。理會均聞見。神交遺後先。衣冠若對面。山水欲忘年。子墨臺中妙。仙翁柱下賢。新詩俱絕唱。塵土更餘妍。

同徐監簿作水始冰

霜落歲將晏。風生水始冰。猶殘夏蟲怪。初比玉壺凝。氣襲璇源潔。光搖寶鑑澄。涵虛同凜凜。履薄乍兢兢。魚鱉悲潛伏。江湖息沸騰。淩陰如獻納。會是却炎蒸。

送韓子華奉使安撫江南

漢庭重八使。同日出東都。仗節年仍少。埋輪氣不孤。詔書敦直指。懸弩肅前驅。宣布君恩被。周爰楚澤紆。秋風捲旌旆。桂楫上江湖。遊子故鄉在。相思天一隅。

送張益宣州法曹

掾曹仁恕用。郎選孝廉爲。之子文無害。居廷敢決疑。一王除制作。三尺著毫釐。過眼皆成誦。讎書自所宜。
〔原註〕王君編前後制敕爲一書。最精。察廉時爾貴。治道吏爲師。去去弦歌化。當如別後思。

郊祀慶成詩

聖瑞歸文子。珍符屬〔原註〕音燭。孝孫儲精凝。景命端拱輯。羣臣禮樂成。中典人神定。一尊亮章新。物覩咸秩備。司存盛德兼。明察彌文付。討論積高參。斗極因吉際。乾坤候景迎。長日萌芽發。舊根律風乘。廣莫卦氣起。昆侖闔闔開。黃道星辰拱。紫垣奉壇嚴。太一推策本。軒轅八廟森。重構諸侯盛。駿奔薦馨光。裸玉告嘏逮。歸騰旄纛羅。千乘旂旛徑。九門龍蛇影。搖動鵝鸛勢。飛翻士勇歡。鳧藻天腥候。晏溫幔城橫。象魏玉果會。春園嚴警連。宵鑿周廬次。屬韃望雲舒。錦石揖月上。金盆廣樂謹。來格升煙續。載燔頌釐如。響答終事寂。無喧輦路祥。飈轉端門旭。日暎天雞還。自舞仙鶴爲。孤鶩河漢驚。垂象雷霆浹。厚恩晝衣期。不犯肺石更。何冤長樂尊。無貳椒房慶。已蕃睿心先。廣愛大策重。臨軒瑞典兼。河洛歡心極。鎮藩名山已。望幸天意肯。周爰願上公車奏。來趨白獸樽。心知摺紳義。展采詎難言。

次韻和王正仲熙寧郊祀二十韻

駿命膺長發。鴻圖本慎徽。八方星拱極。四海日升暉。舊典增咸秩。彌文示表微。聖時均玉燭。天統正璿璣。
南極迎陽復。陰泉候氣歸。積高常眷顧。昭孝每毋違。羽衛來雙闕。和鑾並六飛。風霆齊命令。龍虎會旗旂。
帳殿層城暮。金波列宿稀。嚴更虛夜鑿。雕輦下彤闈。廣樂千人唱。升煙萬目晞。衆神知受記。象物競來依。
陟降兼明察。圓方比範圍。送音仍嚮嚮。昇福想霏霏。霈澤蘇羣動。春陽暢瑾扉。慶深周揭厲。感極至歔歔。
多士參鳴玉。微生廁卓衣。肅雍瞻帝武。奉引近天威。儒館鵷鸞舊。長謠錦繡輝。因知子雲賦。何足頌巍巍。

聞蜀中大水寄閬中諸弟

蜀嶺參天近。巴江向海迂。百城同暗谷。獨鳥視前途。六月蒸雲甚。長風驟雨俱。漏天疇得補。深峽不時輸。
回首虵蛟鬪。傷心虎豹呼。劍關愁斷棧。天漢逼乘桴。臂飲通殊俗。巢居自一隅。遺黎待螺蚌。小邑斷樵蘇。
絕域飛黃鵠。仙人用隻鳧。清秋已收潦。問爾麗泥塗。

馮當世生日

申甫維崧嶽。東方本歲星。舊書容盡信。成事況親聆。南紀浮江漢。青煒變項冥。氣和方毓粹。地勝已儲靈。
德宇何寥廓。斯文實典刑。龍駒來汗血。霜刃脫青萍。智略聯三捷。規模壯六經。羽翰驚海運。辰象屬天扃。
回首煙霄近。橫雲漢閣青。河圖開祕奧。龍節付儀形。萬里風聲肅。三年楚俗寧。里毗羞蟬棘。鄉校謹螟蛉。
聖主思霖雨。羣生望大庭。指期調鼎實。洗眼頌椿齡。授易嘗占晉。論詩竊次駟。莫言狂簡士。足記景鐘銘。
陽月方開旦。商行接素秋。聲華臨盛際。勳業動前修。舊物詩兼禮。公望礪與舟。諫行扶廟算。威克弊邦讎。

翻欲危晁氏。皆能苦絳侯。孤城雖莫可。具美亦誰侑。北闕虛前事。南冠記昔遊。客惟論藥餌。書不號窮愁。迴有閒中趣。高於物外求。賓朋依白傅。潤澤借裴休。跂也身方族。時哉歲欲遒。愁無縮地術。賴有置書郵。理楫王猷拙。稱觴小陸優。傾心日夜急。滾滾大江流。

送子惇出使河北

禹績基壺口。堯仁被冀方。官迎赤車使。詔選瑣闈郎。力學推元稹。高才屬長康。壯懷來慷慨。得志自軒昂。愛直容知默。中和異吐剛。一臺傳駁議。二府見分章。前效平原淺。嚴威夏日長。居常祇逢掖。試躍卽干將。雲漢昭回地。鷓鸞八九行。穹廬休夕拜。羈駟備晨裝。涿水成滔陸。流庸頗異鄉。挂冠勞畚鍤。佩犢問耕桑。哺乳增飢粥。完膚滌疥瘡。朴忠將漕最。惇厚訓兵強。冀馬羅馳傳。河魚飽食魴。細書夸睇視。淳酎沃煩腸。肯作田園計。寧嫌鬢髮蒼。能令老者奮。直與大鵬翔。處世當何語。懷君豈易忘。哂由終所畏。與黠自知狂。

卜居書懷

漆雕未能信。陽甫免歸居。理以逍遙得。材由濩落踈。狹才輕勢利。小隱幸林廬。藿食由來事。茅茨不願餘。南簷容曝日。側徑喜攜鋤。筋力吾如此。功名世有諸。憶初千萬乘。徒步謁公車。投射東堂策。歸來北闕書。先鳴煩指日。弱羽愧吹嘘。雲雨非人力。泥塗亦詔除。江湖輕乘鴈。鐘鼓陋鷓鴣。有道翻羞卷。迷津幸遂初。幽棲謝車馬。至樂狎樵漁。述作稱狂簡。誰能問起予。

渭水

鳥鼠流清渭。岍岐導衆山。懸車循暗谷。斷棧出重關。長路去未已。連峯深更艱。秋高木落外。天曩鳥飛間。日出看羣動。煙收認百蠻。別腸逾九絕。愁淚獨長漣。立志薄軒冕。隱居宜草菅。自甘家食薄。還愛綵衣斑。從吏負夙願。辭親何厚顏。簡書今可畏。幕府尙餘閒。猿叫無勞思。鴻冥不易攀。歸來城闕望。但見白雲還。致齋中太一宮。見屏風有唐賢和常舍人詩。因次韻寄子瞻內翰。子由侍郎。子開舍人。穆父待制。數公皆嘗祠太一也。

禁掖下祠宮。青槐輦道通。薄雲收霽雨。初夏接薰風。將旦羣陰伏。齋居百慮空。夢遊如有遇。反聽更能聰。祕祝寧神外。多儀拜祝中。佐靈猶五帝。執事本三宮。象海鼇山峻。翻堦藥秀紅。守儒嚴講幄。起草麗談叢。夙昔嬉遊並。神仙步武同。吹藜驚燭火。抱法想江楓。已老仍書癖。懷賢愧易東。君王問無擇。留意屬谿工。

羽林通孝經

聖治周方域。儒風暨羽林。一經嚴授業。五孝得潛心。騎獵宸遊簡。嚴廬禁掖深。披文知行在。卽事亦官箴。訓勇寧慙晉。專門詎屬參。從茲六郡俗。不羨滿籛金。

寄杭州通判蘇子瞻。海州使君孫巨源。〔原註〕時罷泰州通判

瀾水三江外。胸山百郡東。專城須聞望。半刺亦才雄。浪海元無際。吳潮近峽中。茵憑那獨異。翰墨自兼工。追昔賢良舉。殊時步武同。百篇傳冠古。半策已全功。咫尺騰霄使。回旋著籍通。龍媒流汗血。鳳羽雜鳧翁。烈士猶難進。清朝各願忠。伏蒲寧曲學。鳴鼓尙深攻。物理安圓鑿。人倫陋發蒙。俟河愁敝筭。破膽忤豐隆。

力擠膠西相。廉欺第五公。絕絃迷促軫。折翼創虛弓。臥閣寧多病。治中有舊風。從容付丞史。咻噢及兒童。使者誅求急。王人禮數崇。湯年偏一溉。稷御不終窮。高宴延仙伯。閒遊歷梵宮。怒濤翻練白。浴日上霞紅。沙鮪能藏蟹。江鳧不慕鴻。五雲瞻碣石。七澤望青楓。瓜戍留麋曠。〔原註〕音軟。漢書作峻誤。茅心憶桂叢。賜環聊袞袞。遺楫漫忡忡。困學今將落。生涯祇屢空。頭風吹過雨。鬢雪亂飛蓬。龜死寧遺策。鸞棲豈願籠。勞生俱夢寐。有道或瘖聾。絕唱常難和。幽光更待融。知音懷感慨。不獨寄絲桐。

寄梅聖俞江鄰幾韓持國

直諒多聞友。衣冠領袖賢。平生三逕樂。少別四時遷。曲策春山祕。絃歌壁水圓。吳門真養性。委吏故依然。杖履兼閭里。詩文孰後先。風雲多變態。鞭弭屢周旋。清汝流無極。維嵩地少偏。微官非擇取。勝事偶陳前。遲日消碁局。殘春賴醉眠。時從謝客詠。不廢遠公禪。吏課輕涓露。官箴恨縹牽。裹糧嗟不遂。回首鎮幽捐。

寄王子直謝師宰

自昔東南美。由來王謝郎。提衡俱射策。繼踵事專場。凡馬驚騏驥。羣蜚下鳳凰。同時冠後進。舉國誦成章。賈子諸王服。蕭生舊友光。青冥看咫尺。雲路更翱翔。

游東寺

籃輿出乘興。佳客不相遺。水色鳴驪外。林光倚蓋時。寒餘草初變。風煦柳先知。複閣披襟久。迴廊步履遲。招提應不厭。幽熟重前期。會待花如霰。壺觴約自隨。

江漢

江漢繫常武。苗民僂舞階。百蠻時暴桀。終古事威懷。壤穴深潛蟻。山林盛鬪豺。墮鳶愁瘴霧。吹蠱厭昏霾。淫毒皆沙蜮。跳梁自井蛙。幾成分服嶺。垂欲罷朱崖。元帥全軍出。天王太室齋。鑿門資感奮。負羽必誰差。壯氣隨霆擊。先聲甚雨偕。遊魂蚩爾輩。賈勇泊吾儕。略野窮飛鳥。圍城盡析骸。饑啼兒宛轉。怨哭鬼歐哇。破竹餘銛刃。焚原祇亂稽。鯨掀才足膾。狸搯可須埋。王略過銅柱。天威暢藁街。斗牛光更潤。溟海靜無涯。賈舶盈珠琲。宮娥賤玳釵。拜侯金篆斗。犒士酒如淮。神武千齡協。歡娛萬國諧。告成方歷吉。名嶽望禋柴。

溫湯和王法曹

火井傳夷檄。炎洲記海隅。仙遊空詣絕。方志每多誣。汎濫浮清沼。淵源自奧區。洪鈞從鼓橐。一氣審爲爐。烈焰方焚澤。騰波盛濺珠。沃焦難與並。執熱諒誰須。鼇抃終當釣。鯨掀會學屠。此中勝鼎鼐。不復待樵蘇。池館他年貴。衣冠萬乘俱。廢興仍在目。惆悵指平蕪。

蔡州城枕汝水。寒日水涸清淺可愛。原父與郡守汎舟川上。甚有佳境。以書垂報。緬想勝遊。因形短什。

積水寒收潦。深淵淨見沙。冷光憐玉潔。清鑒絕毫差。鷗鳥居相樂。漁樵近有家。濟川新剡木。載石去乘槎。樹影魚鱗密。城陰瓠子斜。夤緣忘向背。頃刻變烟霞。練白翻雲葉。金鎔蕩日華。照心同不隱。滌慮愛無邪。客醉風吹酒。歸迷斗轉車。林宗昔無暇。范蠡去空賒。鳧鴈晴餘喜。波瀾雪後佳。謝塘芳草夢。依約向無涯。

登東山小魯

（原闕十八行，每行廿一字。）

集英殿觀先帝御容

墮淚不能禁，彤庭北望深。壽觴疑在眼，宮漏獨驚心。
繪事應神助，天光想下臨。秋毫分萬一，玉色辨侵尋。
未悟攀髯遠，如聞棄屣音。當時萬年木，風動亦蕭森。

王四十監鴻慶宮

沛邑祠原廟，明年啓壽宮。真遊追柱史，吏隱卽冥鴻。
苑路連修竹，兒歌習大風。海鳧隨步武，笙鶴下虛空。
司馬官園令，千秋擢寢中。書成大人賦，夢識白頭翁。
北闕縻徐樂，丹砂愧葛洪。帝鄉那可問，相望五雲東。

代魏秀才和

明府敏爲政，經綸功已深。無欺禮神意，不擾愛民心。
直道容多梗，良時避孔壬。未成宣室召，空賜潁川金。
茲日量天聽，方春報雨霖。望蛺舒黯黯，笑電趣泔泔。
耒耜謹南畝，歌謠變越吟。和應光燕戶，潤足俟薰琴。
久客羞王粲，忘饑學漢陰。鹿門那忍去，留釣此江潯。

又和魏秀才

川原惟漢廣，雷雨向春深。望望三農事，悠悠一歲心。
月離初候畢，龍見亦推壬。向夕風翻海，中天電爍金。
農占不騎晦，史例足書霖。至治無饑穰，元和蔑旱涔。
遷鶡殊自喜，倦客獨悲吟。未必魚生釜，聊因酒貫琴。

奮身從嫖姚。走馬過雕陰。辜負封侯骨。棲遲河水潯。

答吳侍郎寄陝府

天王相有三分陝。按殺函。列國依明德。西人盛美談。甘棠元聽訟。綵服自調甘。餘力斯文貴。珍詞萬象含。氣清融渤海。材絕聳樞柵。請誦詩三百。先知學召南。

次韻和韓持國雪二十韻

層雲升蒼莽。密雪亂高低。巧緻欺工倕。繁多感計倪。因高宜嶽鎮。善下及塗泥。海變方朝若。天通憶命黎。懸簷垂齟齬。投隙置刀圭。冥項豪無賴。娥舒弱易迷。清心還自照。正色故思齊。報曙端成誤。驚春妄問奚。林珍翔鷺鶴。玉氣墮虹蜺。獵野甘燔兔。登川快臞蠅。風回飄柳絮。日暝亂醯雞。蟲篆初難辨。庖羔久未刲。冥鴻愁徑度。饑雀愴單棲。律驗知陽復。天旋測氣躋。浮生共羈旅。外境本筌蹄。置酒容高會。論文慰解攜。詩從載塗唱。賦爲騁妍題。數聽波濤辨。滔滔百仞溪。

詠雪

朔雪三冬暮。同雲萬里間。昊天還質素。長路失幽艱。舞急低仍舉。吹多去復還。增高元稍稍。投隙故閒閒。積鹵輸鹽浦。飄沙聚玉關。怒濤狂振海。疊巘坐移山。喜厚猶多積。憎繁詎得刪。旗旛高卷野。塵壒密通關。點綴林芳亂。裝褫石蘚斑。戶斜遺尺劍。窗缺置連環。圭壁衣裳會。閭閻米粟頒。折篁終不屈。喬樹頓堪攀。執潔裁歌扇。珈明聳髻鬟。運籌思巧歷。語異叱神姦。凍筆無由捉。強弓不易彎。雁號隨雀替。龍蟄並魚鰐。

坎辟威權厲。陽芽勢力孱。晦冥愁運促。溫燠愴時慳。畛域通三壤。塗泥泊百蠻。暝鷄矜喔喔。宵犬事獵獵。腕足傷騏驥。迷羣失鷺鷥。製書思籀頡。議巧謝倕般。蚊翼騰空曲。芝英擢野菅。藩籬容月魄。軒陛絕人寰。感物徒酸鼻。明心肯汗顏。露肌寒得胗。直指凍成廛。簷罅風號勁。爐灰火逗殷。獵狂懷塞漠。漁樂記江灣。飲乏枯瓢棄。磨稀右鐵頑。莫欺東郭履。不愧半通綸。

駕幸開寶寺福聖院新閣

帝圖天不極。覺苑日融輝。〔原註〕音陷劫寧無待。直乘必應機。化城非樸斲。檀施自依歸。香象開馳道。珠瓔接尚衣。梵音潮海會。阿閣鳳凰飛。清蹕通長樂。齋居護卻非。雨花交霰雪。燎桂雜煙霏。默冀南山壽。賢公已見幾。〔原註〕易云。幾者。吉之先見。

原父舍人。爰自春坊遷職史氏。未更晦望。旋有新命。增秩諫省。躋榮綸閣。斐然成篇。以伸歡賀。近署銅龍貴。仙山策府遙。由來稱國士。自致必雲霄。太史題凡例。彤庭奉日朝。除書新翰墨。受賜接晨朝。池水通翔鳳。星垣直建杓。汎槎輕濟海。逸御捷凌飈。獻納當宸扆。絲綸聳具寮。直詞明黼黻。大冊粲瓊瑤。拜舞腰金重。歸來廐馬調。泥書開鵠板。法駕從雞翹。高興吟紅藥。珍辭賦洞簫。宮花香永晝。禁漏靜通宵。枝鵲聲何喜。原鵠意自饒。寄言江漢客。無事老漁樵。

和祕閣趙光祿學士臘月夜閣宿見寄

祕宇聳巖凝。名卿壽作朋。臘殘琪樹雪。夜寂瑣窗燈。交意嘗投漆。高談亟引繩。正憐湖海別。況復歲華增。

詩勇堅無敵。材全問不能。龍淵方出匣。持以喻韓稜。

分題河決東郡

漢郡金堤北。黃河落日東。波濤凝沴氣。翻浪蹙長空。鉅野鮫人室。魚山水伯宮。坐嗟山海變。心恐地天通。未就宣防築。深懷夏禹功。何當開嶺首。西注出湖中。

陪馬守蜀山禱雨

丘禱亦以久。齋居先筮從。鳴騶趁殘夜。觸石會前峰。簫鼓終椒奠。風霆起蟄龍。化工輕瞬息。幽貺振春容。灑濯埃塵絕。虛涼灑氣逢。小人思學稼。卽事喜年豐。

彭城集卷十七

七言長律

送王相公

白麻詔出鳳凰池。金節銅符副錫珪。故事周公不之魯。是行山甫亦徂齊。百年禮樂更禱杙。萬國軍書載狄鞮。開闔乾坤容海運。幹回樞極寄杓攜。故都形勝餘龍虎。開府文章盛壁奎。列坐諸生親絳帳。縱談禪伯得金篋。四山嵐氣連松梓。二水波濤亂鼓鼙。里老傍車看畫鹿。江靈低首避燃犀。鴻河帶地長餘潤。蟠木開花亦有蹊。躍冶空慙折鉤喙。在鈞仍似落巢泥。苦心刻鵠纔成鶩。卑意函牛祇泊雞。早晚重開丞相閣。爲公羸馬踏沙隄。

和楊褒早春二首

雪色留寒風弄和。新陽淺淺故陰多。池冰漸盡泉初潔。徑草猶微菊未莎。歸鴈聲音矜久客。晴雲意態似妖娥。杖藜窮巷貧非儷。隱几衡門嘯也歌。身外閒愁從撥棄。眼前詩景得遮羅。亦知白髮非春事。老伴相尋奈我何。

少年意氣屬時和。春入青門樂事多。試著青衫迎暖日。閒騎駿馬踏青莎。御風直欲從仙子。奔月猶能及素娥。鴈鵞陂前來膾鯉。芙蓉園裏去聽歌。舞狂相屬揮如意。醉起馳歸擲叵羅。寄語子雲天祿閣。新書尙白竟如何。

寄齊州李學士并呈蘇密州

濟水由來徹海清。兩州偕得水南名。遣人頗記睢陽曲。〔原註〕濟陰本分梁國說士猶談歷下兵。碧落羽翰俱失路。白頭章綬偶專城。東秦表海知君重。左輔陪京莫我輕。賓客此邦多長者。〔原註〕漢語云梁多長者詩書前古聚諸生。不知高密何如彼。試仗西風問子卿。

送王兗州

臥閣偏州獨老夫。三年化盡白髭鬚。故人始得班荆語。督府相觀剖竹符。舊學翰林君子澤。雄文策府列仙儒。蛟龍莫作池中物。老驥幾爲轅下駒。腰底印章馳傳乘。道傍冠蓋棄關繻。黃金上冢家相樂。文弩迎官吏疾驅。甲子可憐同步武。光陰稍覺近桑榆。掛車正爾思前路。畢娶由來異壯圖。笑謔會須矜此酒。分飛何必待長塗。側身東望艱梁甫。猶冀君家有隻鳧。

次韻宋職方新脩廳事

事從梁棟拯墮積。民有餘工庫有財。不待公輸泊王繭。肯論新甫與徂徠。經營結構無遺巧。壯麗宏深要必該。廣砌水平鋪淡碧。應門風過絕纖埃。雲山噴墨文屏合。金獸銜環洞戶開。勢似名翬飛天矯。喜知巢

燕到裴徊。陳平社宰非無意。薛惠郵亭信不才。會道曹風如魯衛。牧州元作帝京陪。

再和宋職方

萬緣冥數有興頹。不爲勞民與費財。常怪丘淵猶改舊。足令蒼蔡可知來。黃圖左輔今仍重。甲令名藩此正該。過去英賢聯踵武。幾多能事悉塵埃。僦工匠石三農隙。唾手公堂一旦開。妙選棟梁虹宛轉。觸新廊廡雁徘徊。落成幸有羔羊酒。能賦欣逢錦繪才。衰老專城無異術。祇將勤拙任家陪。

次韻酬李推官

少無風力致雲霄。老寄東藩愧節旄。涉境已憐清濟涸。開門猶喜岱山高。智微黑蟻穿珠竅。術異游魚出鼎膏。思古循良深自歎。視身尸素欲何逃。流光去去車馳轂。過事新新海駕濤。屈指家聲歡上客。愜心風什幸詩豪。青春小圃饒佳卉。遲日芳樽付濁醪。傾蓋強君留一醉。相看前路釣連鰲。

答鄭祕丞見寄長韻

鄭公眞率故難攀。夙昔相期季孟間。畫錦鄉閭嗤拓落。藉糟官局壓清閒。飲腸縱逸卮無當。詩句清新玉作環。屢舞自矜能舉袖。少歌誰復顧酡顏。南金不足償棊進。魯酒頻聞輸罰錢。豪忤里儒連束矢。狂侵醉尉欲翹關。婢勤織衽幾無欲。男飽詩書僅有鰥。疲馬踏泥如得絆。弱弓支肘不成彎。權材未恨原中祕。領邑那知寄百蠻。說將正憐胡越異。問津空復鬢毛斑。江連楚蜀無窮水。路繞巴渝不盡山。青嶂叫猿寒寂寂。亂泉衝石暝潺潺。有生誰得辭羈旅。良苦遙知冒險艱。高興由來向人盡。尺書仍喜不吾慳。

雨後小園

雨多三逕似荒郊。處處秋陰紫翠交。照水白蓮霜雪朵。參天喬木夕陽梢。池光俯見游魚窟。樓角遙臨宿羽巢。倚杖移時看蟻鬪。操舟繚岸試杯膠。牆陰靜色憐甘菊。垣上懸藤識苦匏。老圃不須譏抱甕。野人無事伴誅茅。

五言絕句

終南山

終南際滄海。千里張屏風。落月沈山西。朝陽生嶺東。

火浣壇

天游神不虛。火解形復見。明明學道心。不與劫火變。

許真君祠

舊怪神仙事。燕齊得浪傳。丹青此堂上。想像爲依然。

酒舫

美酒留人飲。乘風縱客槎。秋潭夜深月。春嶼雨餘花。

竹岡

黃緣映層阜。蒼翠復春苔。君知愛霜雪。若个是龍材。

寒食後聞雁

後雁來何暮。春風萬里情。江南多燕子。無處覓同聲。

丹井

古井玄泉色。仙人玉鏡寒。照來知骨相。作意就金丹。

初夜

栖雞已登屋。宿羽復歸林。不語聽鐘坐。默默千里心。

郡樓晚坐同陳掾

雲來湖外雨。樓倚樹梢風。不惜清涼意。持將與子同。

人日立春

花勝已宜春。剪綵更爲人。風光今日好。顏貌一時新。

送韓玉汝司封奉使兩浙聞諸公先分題用池塘生春草園柳變鳴禽字合爲十章章四句

赤驥脫鼻羈。軒然視瑤池。公持漢使節。不減豸冠時。

三江互東南。波浪浮日光。峽中起奔濤。積錢僅成塘。

吳帆若飛鴻。千里長風生。組練白玉粒。一月來上京。

利術析秋毫。心計遊無垠。亦有甘棠蔭。蔽芾如舊春。
忽爲嚴霜誅。慘戚動秋草。狐狸不足問。豺狼詎橫道。
諸公惜分手。置酒倚名園。長廊蔽修景。晝無車馬喧。
露光洗高花。風力曳垂柳。上客請賦詩。主人起爲壽。
春濃芳菲雜。日夕境氣變。望望檣上烏。去去令人羨。
壯年吳會遊。常有懷遠情。想見瓜步南。草長鶯亂鳴。
驛騎傳梅花。書帖封來禽。何以慰別愁。遲此瑤華音。

花嶼

孤絕池心嶼。高低水面花。若無舟楫到。應似隔仙家。

池上

罷客棊仍在。留書卷未終。荷喧知過雨。萍聚見來風。

嘯臺

高臺見百里。長嘯海風生。爲問塵埃耳。能聞鸞鶴聲。

鼎池

仙去遺金鼎。年深認劫灰。懷人何限意。時向鼎池來。

故人謝師厚。刻唐賢淳于先生墓詩于善謔驛。系語其後。刻石後二年。師厚去世。明年。余過善謔驛。讀詩悲之。因作淳于墓詩。又題二韻。追悼師厚。平生忘形。善謔莫逆。惟師厚爲然也。

故人墳宿草。翰墨想遺風。善謔知君意。何傷睿武公。

與持國約游環溪。大風不果往。又過曾氏。值主人之病。

人事不如意。出門安可期。終須賞春物。那問主人爲。

蓮池

蓮花水底紅。荷葉岸邊風。五月蟬鳴後。君應愛此中。

東樓

樓前淮水上。遠樹似魚鱗。來帆與去櫂。腸斷倚欄人。

長門曲

凝笳來鳳輦。玉宇開深殿。君恩春風迴。那向秋時怨。

君心似明月。月缺應再圓。但令黃河水。到海還上天。

書堂對雪


幽居遠人境。竹柏映吾廬。滿目山林意。今晨霰雪初。

積風寒玉折。驚鳥落花餘。定有麝麝迹。環林未掃除。

雨後回文

綠水池光冷，青苔砌色寒。竹幽啼鳥亂，庭暗落花殘。
旅舍不寐，作回文四句。

定雲浮黑月，驚風觸巢鳥。暝燈客單寢，短夢恨遲曉。



彭城集卷十八

七言絕句

勤道堂

西秦公子樗名里，南楚真仙漆種園。
誰顧世人多大笑，偶題勤道志忘言。

初暑馬上

負弩前呼地起塵，炎風烈日正隨人。
暫投茅舍支拳坐，却是從前倦客身。
荆扉茅屋水平流，竹簟棊盤局未收。
無用詢他名與姓，忙閒有分不相投。
臧孫御叔悉名卿，飲酒何妨傲雨行。
未似驅車日當午，敢嫌高士笑勞生。

貝州亂二首

軍書羽騎曉紛紛，兵起清河一日聞。
多少衣冠盡塗地，憑高依約見妖氛。
金印他時恩澤侯，專城意氣凜生秋。
軍中成敗如翻水，空使明堂旰食憂。

遊章運判園亭

自有林亭不種花。總將春色寄鄰家。桃紅梅白須尋得。暮去朝來不算賒。客舍栽花欲爲主。出門騎馬卽天涯。何時置得尋常地。管領春風屬自家。

旅館

滿月還成破鏡飛。流螢清露夜依依。弄兒看織無窮樂。咫尺嵩雲不得歸。〔原註〕鮑昭詩云。弄兒戲牀頭。看婦機中織。

九藥芙蓉

托根不近芙蓉苑。移植猶依瘴癘鄉。並藥連心九相似。看來還使九回腸。

九月吉日澗上望芙蓉。因尋菊。今歲特晚。青藥未作。憮然有懷。

百芳不奈秋風急。唯有芙蓉特拒霜。本以南州積炎德。一爲名誤客殊方。

寄關西兄弟

曉風吹盡淮南雪。昨夜汀洲白芷生。遙想春光西北去。債傳相憶向秦城。

閭闔臺〔原註〕予所居在宋門城下。城脅有平地。可方丈餘。去地一丈以上。每登之

以眺遠近兒童。因戲曰閭闔臺。

看雪望春何處好。城腰山腹暫來登。人知容足無餘願。便是章華與九層。紅日駸駸還暗夜。輕車去去只微塵。老夫獨立聊觀化。驚怪往來無限人。

納涼明教臺

臺上井泉冰冷滑。城隅川色劍光芒。多慙簿領相寬假。全得南風一日涼。

梅雨

梅實初黃暮雨深。寶刀生鏹鏡昏沈。年年卑濕身無病。自覺能勝百鍊金。

隱語三首呈通判庫部

梧上生枝復偏年。白頭傾蓋兩歡然。滿城童子垂髻髮。竹馬羊車戲路邊。
邯鄲度曲盡新聲。稚萼韶華稍向榮。珠箔曲鈎遮密坐。瑤臺靜室伴深行。
宮柳飛花暗度春。斛愁容貯奈傷神。曼聲試作鷄鳴曲。何必陽關無故人。

新開湖上待潛珠不出偶書戲孫莘老二首

貝闕藏珠安在哉。九淵深絕若爲媒。風波可畏且歸去。漫道扁舟湖上來。
合浦因人去不還。隋侯未值報恩年。欲憑泉客傳微信。夜久涼風月滿川。

入汜水寄仲馮

沙起河津迷積霧。雲遮晚日怯層山。客行正似擣菹局。疊馬來過第二關。

新燕

主人恩厚與相依。畫棟危簷晝啓扉。豈是有心希鵠鴈。衆雛成就卽歸飛。

出都

王孫蓮勺鹵中困。文叔蕪萋亭下寒。塵俗豈知湖海士。敝裘羸馬出長安。
致齋太常寺。以杖畫地成二首。

少有閒人訪寂寥。薄雲淡日早春朝。庭花弄藥萱生笋。時見東風趁柳條。
杖藤爲筆沙爲紙。閒立庭前試草書。無奈春風猶掣肘。等閒撩亂入衣裾。

寧陵陂

十里菰蒲百頃陂。秋風嫋嫋蕩漣漪。旅遊已信江湖遠。水國猶將晝夢疑。
屈鈎結網老農妻。鼓楫鳴榔舊牧兒。世事誰令桑海變。可憐機械亦相隨。

長春花

雪霜雨露平分盡。舊紫新紅次第開。自是餘花芳意薄。那知春去不重來。

次子由韻三首

流霞飲過已忘寒。和筆螭坳墨色乾。溫室前頭問名木。此身知不誤儒冠。
四朝傳說直臣言。萬事多君與輕軒。重到彤墀揮翰處。想知雲夢一時吞。
華光勸講想天臨。白髮儒先遇主心。仍寄史臣揮直筆。聖謨文思與幾深。

泊淮上

風波繚繞半天下。鬢髮蒼筮一丈夫。惆悵江湖向時月。又來淮浦照櫓烏。

久旱作問詩

問雲何意復歸山。應恃無心欲占閒。我爲閒多忙折我。勸雲爲雨莫空還。
問風何意掃雲開。本爲虞琴喚汝來。桑麥青乾天不雨。更將何物阜民財。
問山何意及郊農。天欲爲霖不見容。少閉土囊誅嘯虎。也教雲氣得從龍。

遣悶二首

好飲本來身少事。徒歌非是曲彌高。若能全療詩書癖。用底聊均筆硯勞。
草荒三徑尋常綠。樹掩雙扉丈尺高。燕語不如鶯語靜。蜂飛猶勝蝶飛勞。

感懷

澤雉呼雌日出飛。林鴉失子夜深啼。勞生未盡無生理。外境移心不得齊。

題館壁

壁門金闕倚天開。五見宮花落古槐。明日扁舟江海去。却從雲氣望蓬萊。

未伏

火流漸近桑榆上。秋氣新從閭闔來。每歲長安猶暑熱。內官相屬賜冰回。

題湛上人院畫松

水墨乍成巖下樹。摧殘半隱洞中雲。猷公會住天台寺。陰雨猿聲何處聞。

儒生

爲儒自分多迂闊。已老那能更改張。青史異時傳信事。不爲民賊坐投荒。

題荆林館

深山雨過氣清潤。四月居人猶袂衣。獨坐空庭看喬木。黃鶯語歇繞枝飛。

西湖獨行

畫橋朱閣水東西。柳帶花梢聳復低。欲上扁舟還借問。此中時有晉人迷。

種梧桐

鳳鳥非梧不息陰。梧桐非鳳亦無禽。種桐階庀有深意。欲伴幽人介獨心。

種花

種花栽藥一番新。閒繞芳叢到日曛。莫笑人情不開豁。事曾經手自殷勤。

湖口阻風

風波迂直路何限。雲水淒涼秋向高。百里淹留還信宿。可堪殘日看驚濤。

長蘆阻風

萬頃寒濤浸日車。迅風重疊浪成花。雲深不辨江靈事。時見奔駒走岸沙。

阻風

愁思橫江不易堪。惡風終日自西南。逐臣那有回天力。請謝蜚廉亦未甘。寒江常歲起條風。今日檣烏悉向東。定有江神欺放逐。更添留滯作途窮。

寄張十二

先進多於貧賤隔。故交時有死生分。數疑吾子更名字。將謂平生又失君。

寄閣下諸同舍

春風過盡欲無餘。天祿花英玉不如。閉戶清臺誰累汝。正應歸舍悉焚書。

寄丁元珍

南海飛鴻北海鳧。青冥相望羽翰孤。虛弓祇是弦聲急。不向雲霄墮九烏。

蔡州路中作五首寄都下。〔案〕做以疾求知蔡州。故詩中有病餘清骨鬢成霜之句。

病餘清骨鬢成霜。漸負腰間郡組長。等是君恩容臥治。淮西何必減淮陽。雨濕城南輦路沙。歸寧蹀躞喜還家。病軀復作南州守。空使離憂兩鬢華。南城十里短長亭。三月煩君復送行。道上垂楊猶可折。秋風蕭索不須驚。病指拘攣不自如。平居畫諾亦躊躇。雙魚欲寄諸親故。安得陳遵憑几書。朱輪駟馬錦障泥。郡守官儀足品題。自是老身無宿分。臥乘籃舁一雞棲。

寄孫巨源

裊裊柔芳淺淺春。早梅花白柳條新。歸艎去後無來客。占得風光不共人。
居鄰渤澥接江湖。閒數春風鴈與鳧。乘鴈來歸隻鳧起。未應言有復言無。
東門城壁踐胸山。此去蓬萊一望間。潛有真仙自來往。秦人何用不開關。

宮祭畢寄陳五

三百六旬齋復齋。東城騎馬獨歸來。秋風黃葉驚人面。徑向君家就酒杯。

寄金山朝陽巖僧

松篁倚石夜露滴。樓閣緣巖風鐸高。山僧入定晝不起。頂上潮音翻海濤。

寄胡完夫時罷河東提刑知蔡州予亦罷京東轉運使知兗州

懸車束馬太行道。取魯并齊七十城。今日朝恩俱臥閣。故人應得老人情。

次韻和望嶽亭詩

連逢七十二重山。芝朮潛通小有天。自笑何須僊者笑。未忘軒冕顧金錢。
望嶽亭前一凭欄。秋雲蕭索水光寒。北人解道衡山遠。此地衡山已背看。

雪後行小園

一尺春泥頻側足。半池天水欲清神。柳黃梅白貪迴首。驚起啼鶉雪灑人。

水仙花

早於桃李晚於梅。冰雪肌膚姑射來。明月寒霜中夜靜。素娥青女共徘徊。

題餞送亭

還有柳枝能送客。而無桂樹解留人。離腸苒苒隨征旆。愁絕江南日暮春。

竹雞

慣聽巴山杜鵑哭。飽聞湘岸鷓鴣啼。濃雲細雨黃昏暮。竹外傳呼滑滑泥。
致齋雨中寄王彥祖

倚城喬木半參天。雨過交流百道泉。始覺太常齋不惡。秋風靜裏雨蕭然。
細草幽花七月天。曲溝藁石亂鳴泉。齋居三日遺塵事。夢寂神凝亦自然。

曉晴入薦福院

日照庭除上下光。雪殘喬木碧蒼蒼。空無鳥雀隨人語。散漫風煙駐佛香。

雪中羣僚聚飲

衰老歡娛總強爲。興闌蕭索不無悲。任教年少相縱樂。聽說勝於主席時。

次韻酬傅欽之

風力清和日景遲。看花未醉莫言歸。殊方長恨故人少。白髮那論春事非。

新雁

水生巴峽春始秀。葉下洞庭秋已高。去鴈來鴻多少日。羈人搔首看江濤。

出長蘆口

濤翻鷺羽連天白。山疊屏風到海青。客路浮生兩如寄。萬重波裏一浮萍。

秋雪過相國寺

六花飛舞滿長安。古寺樓臺白玉攢。長眉老僧見客語。兩年秋雪就中寒。

女貞花

巴婦能專利丹穴。始皇稱作女懷清。此花卽是秦臺種。赤玉燒枝擅美名。

小雨

烈風呼洶震山林。小雨霏微駐薄陰。南畝旱苗焦欲死。擬將如許號爲霖。

野次

麥苗出隴漸漸綠。花樹迎風淺淺紅。欲就白楊傾一酌。竟無人可暫相同。

聞王深甫下第

驂騑歷塊誤顛蹶。卞子抱璞空歸來。天下何曾識琬琰。市人空復尙駑駘。

送刁節推歸江南。此君辟孫并州幕府。府罷遂棄官。

長平幕府可張羅。誰見當時賓客多。還有任安如砥柱。故山歸臥恣頽波。
中軍高韻拂雲霓。世路能將寵辱齊。君去可無離合恨。不應流涕悵睽攜。
馮當世湖西口占還舟中却寄

落日回船煙水明。殘霞黯黯共離情。南飛多少江鳧翼。好倩橋烏徧寄聲。

次韻錢四

衰老常嫌帶減圍。那堪髀肉厭征騑。東山仍有周公夢。也恐三年始得

嶽雲亭

四更捧日輪困勢。千里爲霖鬣鬣功。但道無心是真意。任辭幽石起封中。

許州西湖觀音像

孤絕佗山碧海濱。天花水月靜無塵。客槎不載支機石。爲見閒遊得度身。

遊俞氏園亭

花外鞦韆柳下門。東城近處辟疆園。樓頭明月終歸去。更爲殘陽盡酒尊。

晝眠

薰風四月樹陰合。無事高眠晝漏長。覺後已疑人世改。起看林影上東牆。

嘲晝眠

利名苦厭茲多口。朝市那能盡信書。一枕涼風雲滿目。民謠民訟不關渠。

芙蓉池

風搖羽扇露盈盤。卷卷翻翻欲定難。醉眼波心歡有遇。水仙傾蓋正相看。

湖口

三日湖雲不肯晴。四山冥晦與川平。繫船汀樹無人語。臥聽波濤瀕洞聲。清溪物色亦消憂。風雨何辭有滯留。定似湖邊釣魚客。一生家事託孤舟。本自悠悠物外人。每逢山水爲情親。慚愧湖波淹客棹。到官不畏上官嗔。

送傅推官

武仲高材筆不休。相逢傾蓋復離憂。黃河赤鯉強三尺。他日無煩數置郵。

和丘直講除字韻

橫經童子一趨隅。擁篲門人爲掃除。遲暮不知稽古力。正憐桑戶欲捐書。

斲冰詞

楚客斲冰行苦難。清音愁絕逼人寒。憑君與製水仙操。傳入湘靈寶瑟彈。

雨後池上

一雨池塘水面平。澹磨明鏡照簷楹。東風忽起垂楊舞。更作荷心萬點聲。

過周修撰池

絕景淹留欲斷年。曉來冰雪漲池泉。盡拈書籍無多子。來問東家亦漫然。

貂裘

季子高談萬乘前。黃金白壁等虛捐。貂裘敝盡風霜苦。却憶周南二頃田。

夜坐

獨坐吟詩到四更。牆根蟋蟀近牀鳴。涼風閃閃吹燈滅。默坐無言直到明。

新晴

青苔滿地初晴後。綠樹無人晝夢餘。唯有南風舊相熟。逕開門戶又翻書。朝陽升空天氣新。荒郊落葉寒紛紛。溪源流潦不可渡。知是蜀山前日雲。

次韻和陳五詠張侍郎小車

富貴於人疑疾顛。名儒華髮獨蕭然。小車何必邱園事。不記千秋始姓田。履及階除杖及園。犢車閒暇過前村。老農未喻疏公意。應怪虛高駟馬門。

桂花

月中丹桂昔誰栽。經歲光華十二回。正似此花多意思。一番紅過一番開。

遊環溪

赤日紅塵幾悔來。垂楊綠水眼先開。踏花酌酒到佳處。把釣臨流始此回。漾漾溪流碧照天。荇絲荷葉小如錢。容易白魚時掛網。插生幽鷺肯回船。

向景亭

四野川原多秀色。非因向著不能知。置亭高爽時來望。自此風光更屬誰。雨後東園

雨後重來春更深。梅花似雪柳如金。青天白日燕雀語。杳杳歸鴻風外音。蠻請降三首

漢軍誅蠻蠻遁走。漢使約降蠻稽首。天威若日照四海。殺人得賊亦何有。官軍萬人宿山下。百姓避兵多曠野。秋來雨足荆棘生。鄰里無復歸耕者。縣官斬敵予金帛。健兒見賞不見賊。聞道殺人多老農。至今過客猶悽惻。

自古

自古邊功緣底事。多因嬖幸欲封侯。不如直與黃金印。惜取沙場萬髑髏。漢約無功不得侯。姦雄惡少善爲謀。却令驕主輕人命。奴僕行師海北頭。

龍山

西城門外龍山路。乘興來遊不厭頻。後日重陽須一醉。青松繫馬菊留人。

果園巷訪楊寺丞〔原註〕果園·本高氏遊宴所·

馬出城門小徑斜。廢園故國總堪嗟。曲池平盡喬木老。舊地分張百姓家。
考試畢登銓樓。

春雲濃淡日微光。雙闕重門聳建章。不上樓來知幾日。滿城無算柳梢黃。

登樓

城外園林非一主。春風總總爲開花。遊蜂語燕隨人眼。過盡南家與北家。

陳州雜詠

歷說諸侯七十餘。絕糧桑落尙歡娛。不容而後知君子。方笑南冠駕乘駒。
鄭莊推士古無倫。置驛諸郊日日新。去病魏公俱改節。一生惆悵杜陵人。
固安功次異蕭陳。深怪材官亦致身。高臥閉箝天下口。不憂聖主責愚臣。

黃橙寄黃翁

江南碧樹映霜秋。丹實清香破客愁。常恨忌辛消俗口。爲評獨憤詫齊州。
將過孔處士莊。聞處士往許昌。不果往。

鹿門隱士肯浪出。荷篠丈人行不逢。朝陽晝雨霽復暝。香山無路雲重重。

和原甫謁武信殿

紫氣東迎太一峯。翠華飛御獵回中。玄女授符開上策。河宗獻寶告成功。願借前籌敢決疑。幹回天地聳當時。舊傳太尉條侯策。今見宣王六月詩。

望廬山

蒼山去郭三十里。日暮雲收獨立時。應是塵埃能眯眼。幾人曾有望山詩。

次韻和王待制絕句

病軀何處識君恩。臥地無令四體勤。客誦舍人詩句好。幾將筆硯一時焚。無年何日蘇凋瘵。死市空嗟費杖筇。舊尹告新應有意。若爲閒暇得遊嬉。蔡邕倒屣貴公子。阮籍清談林下游。人事差池不如古。祇將朱墨繼爲州。

寄韓玉汝待制

南雲不到飛狐口。朔雪來從累鴈門。仗卽仍煩鑿空使。乘槎涇取濁河源。嫫姚不復顧家爲。山謂東山久未歸。卷耳幸容攜婉孌。皇華何啻有光輝。

秋盡野次

丹椒結子菊花黃。山路秋高草木香。日出鷄鳴下喬樹。人來犬吠透疎篁。湖水彌天未覺秋。暫辭鞍馬寄扁舟。菰蒲無禁魚無稅。誰似溪翁得自由。



國立中央圖書館



0007939

